


萬有文庫

第二集七種

玉雲五主編


湛然居士文集

耶律楚材撰



商務印書館發行





湛然居士文集

耶律楚材撰

編主五雲王
庫文有萬
種百七集二第

集文士居然湛

中華民國二十六年六月初版

撰者 耶律楚材

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

(本書校對者曹鈞石)

*E五—六五

嚴

湛然居士文集後序

夫文章以氣爲主。浩然之氣。養於胸中。發爲文章。不期文而文有餘矣。古之君子。其文見於簡策。宏深渾厚。言近而旨遠。辭約而義深。非後世以雕篆爲工者所能比。蓋其浩然之氣。貫於中也。諸葛孔明暨近代范文正公。懷王佐之才。有開物成務之略。自任天下之重。初不欲以文章名世。然出師一表。可與伊訓。說命相表裏。而萬言一書。議者亦比於管仲樂毅二子者。豈嘗學爲如此之文也哉。其忠義之氣。形之於文。亦不自知其所以然也。嗚呼。世之作文者。非不舉也。言語非不工也。及其建功定業。任大持重。不若昔之人者。其胸中所養者小也。今吾湛然居士。其庶幾乎公當聖朝開創之際。膺鹽梅鼎鼐之任。仰贊天子。茂弘德威。臣上古所不臣之國。籍禹貢所不籍之地。公之功業。著見於天下。炳如日星。雖月氏殊俗。蠻荆遠方。莫不仰戴其威名。觀其從事征討軍務倥偬。宜其不暇留意於文字間。然雄篇傑句。散落人間。復如彼其多。或吟詠其情性。或寄意於玄機。千彙萬狀。會歸於正。皆肆筆而成。若不用意爲者。人雖服其精敏。意者何爲而能然耶。殊不知公善養其浩然之氣。充於其中。形於言動。發於功業。見於文章。有不得不然者矣。孔子曰。有德者必有言。其是之謂乎。邇者中書省都事宗公仲亨。更新此集。摹工鏤版。過雲中。同監納樊子通見屬爲序。微以爲文章者。公之餘事也。公之德業。天下共知之。固不待文而顯也。其文天下共傳之。又奚待以序而彰哉。雖然。不爲之辭者。微東城一鄙人也。幸齒於門下士之末。若復獲挂名於文集中。固所願也。於是乎書。癸巳年十月晦日。九山居士李微子微序。

湛然居士文集後序

移刺文正公爲成吉思命。扞圍邊庭。國威遐震。草創法度。功在廟社。諫革初制之苛猛。蘇息民物之瘡。瘼豐功偉烈。衣被天下。非劉秉忠諸人所能望。振興儒教。進用士人。以救偏任武夫及色目種人之弊。亦開姚許之先聲。意者其學術必有服習六藝。秕糠衆流。立天地之心。以佐龜拯之業者。乃覽其遺集。於六藝之學。粗涉藩柅而已。其深造乃在臨濟雲門宗門。梏喝之機用。其師友濡染。又不過李屏山萬松老人之流。夫古今事業。無無用之體。亦無無體之用。公之體用。果安在哉。沈思久之。憬然曰。吾乃今得之矣。孟子通五經。尤長於詩書。其言直指心地。劃清義利界限。操則存。舍則亡。義如快斧利刀。遇事一分兩斷。與孔門四科六藝家法。委曲繁重者。蓋稍稍殊別。直趨易簡工夫。陸文安公在鷺湖及荆門州講學。亦以利之一字。鋼蝕人心。最爲隱微深切之病。所喻在義。則爲君子。君子在位。天下莫不蒙其福。所喻在利。則爲小人。小人在位。生民莫不被其禍。治亂之數。視乎君子小人之消長。不待蓍蔡而知也。今之士大夫居高位者。率終身在利欲膠漆盆中。生心害政。敗壞風氣。亂萌愈伏愈深。此生民之所以生機日蹙。而萬事之所以骯髒不治也。湛然居士。借宗門機鋒。勇猛之指。殺活在手。於此勘入。不著一物。直下承擔。其氣雄直。足以動難說之驕主。其詞簡當。足以折不可迴之邪謀。視儒效迂緩。功德百之。故發爲諫疏條教。語言文字。如春雨日時。百穀萌芽而怒生也。如迅雷乘令。威嚴潛絨。而蟄蟲始蘇也。故能佐成吉思帝開百六十

年車書漸一之基業。豈偶然哉。豈偶然哉。諺曰。正人行表法。表法皆正。況宗門壇衍。聚可苦行。雖異儒流。要非表法。固亦無惡於聖人哉。國家用人。勿偏任才華。首當辨志。苟察其人。一念在利。欲膠漆盆中國之蠹也。雖才何賴焉。陳同甫發策課諸生云。張良習黃老。賈生明申商。諸葛亮以申韓書。發人意智。魏元成習縱橫家。彼四人豈非古。今所謂名臣。何以習異端云云。其故劇可思矣。豈僅讀馮然集。發人慨歎而已哉。觀居士之所爲。迹釋而心儒。名釋而實儒。言釋而行儒。術釋而治儒。彼其所挾持者。蓋有道矣。竊意國家最急者人才耳。今有人於此。墨名而儒行。足以任帷幄。靖內憂。禦外侮。以視夫發蒙振落。曲學阿世。託儒術以爲名高者。其致治亂之數。果孰愈哉。所關係於世運人心。良非一端。盍深思而觀其要矣。錢氏補元史藝文志。著錄馮然集三十五卷。又中書都事宗仲亨所輯文集。止十四卷。此宗氏輯本。其三十五卷之集。則予未之見也。不知海內尙有傳鈔本否。光緒乙亥改元正月人日。芳郭无名人識。

領中書省湛然居士文集序一

乾坤之氣。否之則塞。泰之則通。日月之光。蒙之則晦。廓之則明。聖人之道。鬱之則滯。推之則行。化而裁之。謂之教。神而明之。存乎人。天之未喪斯文。陰有所主宰。亦有所託付。數不終隱。待其人而益弘。況乎啓端發源於新造之初。枝傾柱邪於積亂之後。以任當世之重。以行衆人之難。必有命世大賢。超人異行。舉歷代非常之事。卒前哲未成之志。與時標準。卓然爲吾道之倡。夫道之不明久矣。去古而今。□情其性。案今有岡字典謨遠而淳風衰。雅頌息而淫詞作。以大學中庸爲虛位。以致知格物爲迂論。聖門閉而不開。正路梗而莫闢。加之兵革以來。百餘年閒。宇宙之內。昏昏默默。如夜之未晝。夢之未寤。醉之未醒。病之未藥。伏陰未覩於太陽。寒谷未熙於春律。黎苗之渴望未蘇。黔首之倒懸未解。夫欲躋塗炭而域仁壽。滌瑕穢而鏡澄清。療國脈之膏肓。補天維之罅漏。草創萬有。權輿百度。興禮樂於板蕩之際。拯詩書於煨燼之餘。黼黻皇猷。經緯政體。變干戈而俎豆。易荒服而衣冠。斲雕反樸。鑄頑成仁。扇美化以風六合。沛膏澤以雨羣生。教續將絕之時。功畫無形之世。非天下之至神。其孰能與於此哉。惟我中書湛然居士。天姿英挺。上智誠明。著龜其識。鈞鼎其器。聳四方之具瞻。遇千載之嘉會。作朝廷之翰。維社稷之鎮。牢籠區夏。宰制山川。提封不牧之邦。郡縣不毛之地。正璣衡而秦階平。明曆數而靈符定。開元建極。盡瀾綸之術。驟帝馳王。入酬酢之計。以唐虞吾君爲遠圖。以成康吾民爲己任。涵養乎事業。形容於文章。得之心不受一塵。應之手

自能三昧。游戲妙場。掀揭理窟。運天地之橐籥。奪造化之機械。論性則窮其深源。談道則索其隱旨。以聖經爲根本。故其文體用而精微。以史氏爲枝葉。故其文氣焰而宏麗。盤詰訓誓其格言。詠歌比興其奧義。雖出師征伐之閒。猶銳意經濟之學。觀其投戈講藝。橫槊賦詩。詞鋒摧萬物。筆下無點俗。揮洒如龍蛇之肆。波瀾若江海之放。其力雄豪。足以排山岳。其輝絢爛。足以燦星斗。幹旋之勢。雷動颯舉。溫純之音。金聲玉振。片言隻字。冥合玄機。奇變異態。靡有定跡。夔乎出於見聞之外。鉤鏗炳耀。盪人之耳目。所謂造物有私。賦傳真宰。胸中別是一天耳。蓋生知所稟。非學而能。如庖丁之解牛。游刃而餘地。公輸之制木。運斤而成風。是皆造其真境。至於自然。而然公之於文。亦得此不傳之妙。若夫湛然之稱。不可以形尋。不可以言詰。其處之也厚。其資之也深。靜於內爲善淵。演於外爲道派。卽其性而見其文。與元氣俱粹。然一出於剛正。觀夫所稱。其人可知矣。然則作之者。創於始。亦在乎述之者。成其終。適有中省都事宗仲亨。最爲門下之舊。收錄公之餘稿。纖悉無遺。今又增補雜文。誠好事之君子。舉其全帙。付之於門下士。高冲霄。李邦瑞。協力前修。作新此本。以示學者。可謂兼善之用心。省丞相胡公喜君之文。揄揚溢美。勒成爲書。中或有悞者。更加釐正。命工刊行於世。益廣其傳。真得仁人之雅意。省寮王子卿。李君實。許進之。王君玉。薛正之。皆欣然嚮應。共贊成之。二公承宗公之志。畢其能事。同諸君累求爲序。僕以兵塵中來。舊學荒廢。不敢應命。蓋公之心術至蹟。不能盡探之於文。公之文章高致。不能具陳之於序。雖其文皆公之寓言。筌蹄而忘象。是亦勳業之餘蘊。公如不言。則人將何述焉。嘗謂雲漢爲章天之文。言詞可法人之文。故觀乎天文。以察

時變觀乎人文以化成天下。文之爲用大矣哉。今公之爲言。非徒示虛文而已。實斯世行道之具。所以柱石名教。綱維彜倫。鼓舞士風。甄陶人物。豈惟立崇代之典章。端可爲將來之軌範。於戲。大禹不治水。吾民憂其魚。孔子不作經。王道幾乎熄。夫以文德開通濟物。密藏諸用。扶持聖道之久弊。幽而復顯。見天意之所屬。爲時求定。而能樹治本。遏亂源。活生靈。福奕世。其功德無慚於先聖。斯文之不墜。皆公之力焉。是言也。非獨予之所言。乃天下之公言也。歲次癸巳。十有二月初吉。襄山孟攀鱗序。

序二

夫文章天下之公。其言賦者。自以與賈馬爭麗。則言詩者。自以與李杜爭光焰。逞詞藻者。不讓蘇黃。論歌詞者。輒輕吳蔡。以至氣衝雲霄。而莫肯相下。及其較量長短。探蹟妍醜。得其全者鮮矣。厭人望者鮮矣。中書湛然。性稟英明。有天然之才。或吟哦數句。或揮掃百張。皆信手拈來。非積習而成之。蓋出胸中之穎悟。流於筆端。敏捷。味此言言語語。其溫雅平淡。文以潤金石。其飄逸雄拔。又以薄雲天。如寶鑑無塵。寒水絕翳。其照物也。瑩然。向之所言賈馬麗則之賦。李杜光焰之詩。詞藻蘇黃。歌詞吳蔡。兼而有之。可謂得其全矣。厭人望矣。外有官府得居士文集。古律詩。雜文。五百餘首。分爲九卷。恐珠沈於海。玉隱於山。而輝彩未著。特命良工。版行於世。使四方士大夫。如披雲覩日。快願見之心。嗚呼。言者心聲也。中書之言。如詠物之外。多以國事歸美爲章句。雖稷契之忠。皋陶之嘉。未易過此。癸巳歲十二月望日。平水冰巖老人王鄰序。

序三

士君子困而後學。老乃思歸。□□□流

案思歸下疑作宗淨之流

猶賢乎已。屏山年二十有九。閱復性書。

案金末李之純有屏山鳴

道集與元裕之齊名

知李習之亦二十有九。參藥山而退著書。大發感歎。日抵萬松。

案謂萬松老人

深攻亟擊。退而著書三十餘萬言。內藁心學。諄諄大半。晞顏早立。亞聖生知。追繹先賢。誠難倒指。湛然居士年一十有七。受顯訣

於萬松。其法忘死生。外身世。毀譽不能動。哀樂不能入。湛然大會其心。精究入神。盡棄宿學。冒寒暑。無晝

夜者三年。盡得其道。萬松面授衣頌。目之爲湛然居士。從源自古宗師。印證公侯。明白四知。無若此者。湛

然從是自稱嗣法弟子。從源自古公侯。承稟宗師。明白四知。亦無若此者。萬松一日過其門。見執菜根。蘸

油鹽飯。脫粟。萬松曰。子不太儉乎。曰。閉閉京城。絕粒六十日。守職如恆。

云前賢守職分堅苦不懈。若此豈止不素飽之謂哉。

人無

知者。以至扈從西征。六萬餘里。歷艱險。困行役。而志不少沮。跨崑崙。瞰瀚海。而志不加。大客問其故。而曰

汪洋法海。涵養之力也。若乃冒聖安而成贊。戲清谿而發機。行九流而止縱橫。立三教而廢邪僞。外則含

弘光大。禦侮敵國之雄豪。內則退讓謙恭。和好萬方之性行。世謂佛法可以治心。不可以治國。證之於湛

然。正心修身。家肥國治之明效。吾門顯訣。何愧於大學之篇哉。湛然嘗以此訣忠告心友。時無識者。慨然

曰。惟屏山閑閑。

案理乘文白習閑閑老人金禮部尙書著有滄水集內外稿

可照我心耳。噫嘻。雖欲普慈兼濟天下後世。不由也已。嘗

和友人詩曰。贈君一句直截處。只要教君能養素。但能死生榮辱哀樂不能羈。存亡進退盡是無生路。至

於西天三步遠。東海一杯深。老作衲僧。未易及此。使裴公美張無盡見之。當斂衽焉。蓋片言隻字。出於萬化之源。膚淺未臻其奧者。方且索之於聲。偶鍛鍊之排。正如檢指蒙學對句之牧豎。望涯於少陵詩史者矣。加以志天文以革西曆。翫焦桐而贊南風。在變理爲難能。皆湛然之餘事。或謂萬松闕論。無乃夸誕乎。曰。王從之。雷晞顏。王禱伯。尙不肯屏山閑閑。形於論辨。萬鍛炎爐。不停蚊蚋。宜乎子之難信也。吾待來者。千載一人。豈獨爲子設耶。甲午年仲冬晦日。萬松野老行秀。中夜秉燭序。

萬有文庫

第二集七百種

總編纂者

王雲五

商務印書館發行

湛然居士文集目次

卷一

和黃華老人題獻陵吳氏成趣園詩

和平陽王仲祥韻

和李世榮韻

和李世榮見寄

和李世榮韻

再用前韻

又索六經

和移刺繼先韻三首

和薛伯通韻

鹿尾

過金山用人韻

過雲中贈別李尙書

和裴子法韻

并序

和許昌張彥昇見寄

和南質張學士敏之見贈七首

和張敏之鳴鳳曲韻

和孟駕之韻

和陳秀玉縣黎詩韻

和冀先生韻

卷二

和百拙禪師韻

和平陽李君實吟醉軒

從聖安澄老借書

題西菴師藏佛牙二首

和移刺繼先韻二首

過陰山和人韻四首

再用前韻

復用前韻唱玄

用前韻送王君玉西征二首

用前韻感事二首

過清源和香山居士韻

和裴子法見寄

用李德恆韻寄景賢

過天德和王輔之四首

槐安席上和張梅韻

思親有感二首

思友人

贈李郡王筆

寄雲中臥佛寺照老

寄平陽淨名院潤老

贈雲川張道人

贊李俊英所藏觀音像

題西安歸一室有序

和景賢還書韻二首

外道李浩求歸再用韻示景賢

外道李浩和景賢霏字韻余再和呈景賢

和楊君敬韻二首

過天寧寺用彥先韻二首

過天山周敬之席上和入韻二首

和入韻

丁亥過沙井和移刺子春韻二首

再過晉陽獨五臺開化二老不遠迎

過清源謝汾水禪師見訪

王屋道中

卷三

和解天秀韻

用萬松老人韻作十詩寄鄭景賢

萬松老人眞贊

贈萬松老人琴譜詩

寄曲陽戒壇會首大師

和王巨川韻

釋奠

和移刺子春見寄五首

寄移刺國寶

寄鄭景賢一十首

和鄭景賢韻三首

和李世榮韻

和鄭景賢一十首

又一首

和王君玉韻

過東勝用先君文獻公韻二首

過夏國新安縣

過青塚用先君文獻公韻

過青塚次賈搏霄韻二首

再用韻以美搏霄之德

再用韻自歎行藏

再用韻感古

再用韻唱玄

過雲川和劉正叔韻

過雲中和張伯堅韻

過雲中和張仲先韻

過雲中和王正夫韻

過白登和李振之韻

過天城和靳澤民韻

過武川贈僕散舍人

過燕京和陳秀玉韻五首

還燕京題披雲樓和諸士大夫韻

和威寧珍上人韻

和李德脩韻

卷四

和呂飛卿韻

再用韻送連國華

謝飛卿飯

再用韻紀西遊事

再用韻贈搏霄

再用韻謝非熊召飯

再用韻唱玄

再用韻

和搏霄韻代水陸疏文因其韻爲詩十首

寄賈搏霄乞馬乳

謝馬乳復用韻二首

贈搏霄筆

再用韻寄搏霄二首

再用韻別非熊

愛子金柱索詩

贈賈非熊搏霄一首

和李振之二首

非熊兄弟餞余之燕再用振之韻

和連國華三首

連國華餞余出天山因用韻

還燕和德明韻一首

又和橙梅詩

和竹林一禪師韻

西安上人住夏禁足以詩戲之

送韓浩然用馬朝卿韻

戊子喜雨用馬朝卿韻二首

戊子餞非熊仍以呂望磻溪圖爲贈

和宋子玉韻

和李邦瑞韻二首

和邦瑞韻送奉使之江表

和王正之韻三首

祝忘憂居士壽詩

蠟梅二首

謝禪師□公寄閩山紫玉

和鄭壽之韻

寄沙井劉子春

和琴士苗蘭韻

和人韻二首

和武川嚴亞之見寄五首

己丑過雞鳴山

寄天山周敬之

邦瑞乞訪親因用其韻

和李邦瑞韻

過清源贈法雲禪師

贈五臺長老

卷五

贈蒲察元帥七首

庚辰西域清明

用鹽政姚德寬韻

用昭禪師韻二首

和薛正之見寄

乞扇

壬午西域河中遊春十首

遊河中西園和王君玉韻四首

河中遊西園四首

河中春遊有感五首

過閭居河四首

感事四首

壬午元日二首

過沁園有感

用劉正叔韻

西域家人輩釀酒戲書屋壁

西域從王君玉乞茶因其韻七首

和冲霄韻五首

又一首

和冲霄十月桃花韻二首

和薛正之韻一首

卷六

和景賢見寄

用劉潤之乞冠韻

西域河中十詠

西域和王君玉詩二十首

和楊彥廣韻

題平陽李君實此君軒

西域有感

早行

自敘

西域元日

西域寄中州禪老

蒲華城夢萬松老人

寄巨川宣撫

寄南塘老人張子貞

觀瑞應鶴詩卷獨子進治書無詩

寄德明

才卿外郎五年止惠一書

寄清溪居士秀玉

戲秀玉

寄張子聞

寄用之侍郎

和劉正卿待制韻

寄仲文尙書

雪軒老人邦傑久不惠書作詩怨之

謝王清甫惠書

思親二首

思親用舊韻二首

思親有感

再過西域山城驛

辛巳閏月西域山城值雨

十七日早行始憶昨日立春

是日驛中作窮春盤

西域蒲華城贈蒲察元帥

乞車

戲作二首

過太原南陽鎮題紫薇觀壁三首

和松月野衲海上人見寄二詩

夢中偶得

賈非熊餞余用其韻

用李德恆韻

松月老人寄詩因用其韻

和薛正之韻

卷七

用李邦瑞韻

寄平陽淨名潤老

和鄭景賢韻

和李茂才寄景賢韻

除戎堂二首

寄武川摩訶院圓明老人五首

和李漢臣韻四首

和北京張天佐見寄

戊子繼武川劉搏霄韻

憇解州邵薛村洪福院

邵薛邨道士陳公求詩

過金山和人韻三首

謝王巨川惠臘梅因用其韻

和王巨川題武成王廟

又用韻

又一首

和景賢七絕

又四絕

和景賢二絕

和高冲霄二首

過天山和上人韻二絕

過覃懷二絕

王屋道中

過天德和遷上人韻

贈遼西李郡王

題道人扇二首

題古并覃公雅秀園

題昭上人松菊堂

題平陽劉子寧玄珠堂

題誌公圖

題黃山墨竹便面

請治東堂

請倪公

請照老住華塔

華塔照上人請爲功德主

請嘉公禪師詣天德作水陸大會

和賈搏霄韻二絕

和高麗使三首

夢中偶得

和武善夫韻二首

題寒江接舫圖

題黃梅出山圖

夢中贈聖安澄老

跋定僧嵩

詠探春花用高冲霄韻

寄休林老人

過濟源登裴公享用閑閑老人韻四首

再用前韻

復用前韻

再和西菴上人韻

請真老住華塔

請玉公住太原開化

和薛伯通韻四絕

和松菊堂主人照老見寄三詩

洞山五位頌

大陽十六題

西域嘗新瓜

天德海上人寄詩用元韻

寄白雲上人用舊韻

武川摩訶院請爲功德主

和房長老二絕

過平陽高庭英索詩強爲一絕

卷八

醉義歌

題恆岳飛來石

爲慶壽寺作萬僧疏

太原開化寺革律爲禪仍命予爲功德主因作疏
爲石壁寺請信公菴主開堂疏

王山圓明禪院請予爲功德主因作疏

萬卦山天寧萬壽禪寺命予爲功德主因作疏

請某菴主住竹林疏

請湛公禪師住紅螺山寺疏

請容公和尚住竹林疏

請智公尼禪開堂疏

代劉帥請智公尼禪住報先寺

請某菴主開堂疏

爲慶壽寺化萬僧疏

請亨公菴主開堂疏

三學寺改名圓明請予爲功德主因作疏

平陽淨名院革律爲禪請潤公住持疏

太原五臺寺請予爲功德主因作疏

請定公菴主出世疏

大龍山永寧石壁禪寺請忘憂居士爲功德主代爲之疏

代忘憂居士請琳公住持壽寧禪寺疏

爲大覺開堂疏

道三

司天判官張居中六壬祛惑鈴序

苗彥實琴譜序

答楊行省書

進征西庚午元曆表

西遊錄序

辨邪論序

寄趙元帥書

萬松老人評唱天童覺和尚頌古從容菴錄序

評唱天童拈古請益後錄序

燕京崇壽禪院故圓通大師朗公碑銘

貧樂菴記

自贊二首

燕京大覺禪寺創建經藏記

卷九

和敏之詩七十韻三首

次韻黃華和同年九日詩十首

寄雲中東堂和尚

謝萬壽潤公和尚惠書

燕京大覺禪寺奧公乞經藏記旣成以詩戲之

寄龍溪老人乞西巖香

謝聖安澄公饋藥

和王正夫韻

和孟雲卿韻

次雲卿見贈

和王正夫憶琴

繼宋德懋韻三首

和平陽張彥升見寄

跋白樂天慵屏圖

和請住東堂疏韻

寄倪公首座

和呂飛卿

戲陳秀玉序

卷十

扈從冬狩

用秀玉韻

送西方子尙

用樗軒韻謝秀玉見惠東坡杖

謝邦瑞韻送行

謝西方器之贈阮杖

繼希安古韻

和非熊韻二首

過深州慈氏院

用李君實韻

繼崔子文韻

繼武善夫韻

鼓琴

扈從羽獵

狼山宥獵

對雪鼓琴

寄冰室散人

寄平陽潤和尚

紅梅二首

吟醉軒

寄西庵上人用舊韻四首

和漁陽趙光祖二詩

自贊

再過太原題覃公秀野園

和韓浩然韻二首

張漢臣因入覲索詩

和謝昭先韻

德恆將行以詩見贈因用元韻以見意

送文叔南行

和馮揚善九日韻

示石州劉企賢

和劉子中韻

李庭訓和予詩見寄復用元韻以謝之

和黃山張敏之擬黃庭詞韻

寄嵩公堂頭同參

寄移刺子春

寄妹夫人

送姪九齡行

送姪了真行

和英粹中山堂韻

和武善夫韻

和馮揚善韻

和董彥才東坡鐵杖詩二十韻

卷十一

用張道亨韻

題龐居士陰德圖

和馮揚善韻

和秀玉韻

示從智

答聶庭玉

繼柏巖大禪師韻

和張善長韻

愛棲巖彈琴聲法二絕

冬夜彈琴頗有所得作詩三十韻以遺猶子蘭
夜坐彈離騷

彈秋宵步月秋夜步月二曲

彈秋水

彈秋思用樂天韻二絕示景賢

彈廣陵散終日而成因賦詩五十韻

吾山吟

并序

從萬松老師乞玉博山

寄萬壽潤公禪師用舊韻

寄聖安澄公禪師

寄甘泉禪師謝惠書

送房孫重奴行

從龍溪乞西巖香并方

乙未元日

付從究

旦日遺從祖

旦日示從同仍簡忘憂

元日勸忘憂進道

轉燈

錄寄新詩呈冲霄

寄東林

借琴

戲景賢

再用前韻二首

寄景賢

再用知字韻戲景賢

復用前韻戲呈龍岡兼善長詩友二首

慕樂天

彈廣陵散

戲劉潤之

用劉潤之韻

卷十二

琴道喻五十韻以勉忘憂進道并序

彈琴逾時作解嘲以呈萬松老師

勉景賢

劉潤之館於忘憂門下作述懷詩有弟子二三同會食誰曾開口問先生之句余感而和之

劉潤之作詩有厭琴之句因和之

懷古一百韻寄張敏之

示忘憂并序

和金城寶宮旭公禪師三絕

再和世榮二十韻寄薛玄之

蘭仲文寄詩二十六韻勉和以謝之

又和仲文二首

用曹楨韻

怨浩然

從國才索閑煎茶賦

贈高善長一百韻

再廣仲祥韻寄之

寄金城士大夫

誠之索偈

遺姪淑卿香方偈

爲子鑄作詩三十韻

卷十三

楞嚴外解序

心經宗說後序

糠孽教民十無益論序

釋民新聞序

屏山金剛經別解序

書金剛經別解後

賈非熊修夫子廟疏

永安寺請予爲功德主疏

請旭公住寶宮寺疏

請文公住玉山開堂出世疏

請嚴菴主任東堂出世疏

請希菴主任晉祠奉聖寺開堂疏

請學菴主任翠微山寶林寺開堂出世疏

請石州海秀首座住文水壽寧寺疏

太原山開化寺請予爲功德主因作疏

重修宣聖廟疏

燕京大萬壽寺化水陸疏

請奧公禪師開堂疏五首

請湘公住持興教寺疏

請東林老人住雲巖寺疏

請柏巖儼公疏

祁州重修宣聖廟疏

安慶織萬佛疏

請聰公和尚住山陰縣復宿山疏

題萬壽寺碑陰

和公大禪師塔記

萬壽寺創建廚室上梁文六首

茶榜

約善長和詩戰書

寄萬老人書

萬松老人萬壽語錄序

祭姪女淑卿文

和林城建行宮上梁文六首

爲武州摩訶院創建佛牙塔疏

卷十四

法語示猶子淑卿

和潤之韻

贈景賢

寄東林

寄萬壽潤公禪師

寄甘泉慧公和尚

遺龍崗鹿尾二絕

和景賢贈鹿尾二絕

中秋召景賢飲

請定公住大覺疏

補大藏經板疏

武川摩訶院剎建瑞像殿疏

請與公住崇壽院

寄聖安澄老乞藥

信之和予酬賈非熊三字韻見寄因再廣元韻以復之

雲漢遠寄新詩四十韻因和而謝之

德新見寄二十韻和而謝之

子鑄生朝潤之以詩爲壽因繼其韻以遺之

扈從旋師道過東勝秦帥席上繼杜受之韻

屏山居士鳴道集序

用梁斗南韻

贈姪正卿

寄張鳴道

送省掾郭仲仁行

送燕京高慶民行

和趙庭玉子贊韻

贈東平主事王玉

周敬之修夫子廟

寄萬壽堂頭乞湖山

寄東林同參

寄簡堂頭

寄孔雀便面奉萬松老師

答倪公故人

送王璘行

繼介丘穆景華韻

繼平陶張才美韻

德柔嘗許作鞍玉轡且數年矣作詩以督之

卜鄰一絕寄鄭景賢

寄岳君索玉博山

雲中重修宜聖廟疏

寄光祖

送德潤南行

再和萬壽潤禪師書字韻五首

贈景賢玉澗鳴泉琴

丙申元日爲景賢壽

景賢作詩頗有思歸之意因和元韻以勉之

景賢召余飲以事不果翌日余訪景賢值出余開樽盡醉而歸留詩戲之

和景賢召飲韻

丙申上元夜夢中有得

送門人劉德真征蜀

送門人劉復亨征蜀

趙州柏樹頌

黃龍三關頌

和太原元大舉韻

喜和林新居落成

題新居壁

太原修夫子廟疏

和林建佛寺疏

湛然居士文集卷一

元 耶律楚材晉卿撰

和黃華老人題獻陵吳氏成趣園詩

雪溪詞翰輝星斗。紙盡塵蒙詩一首。湛然揮墨試續貂。嗚嚙使人難出口。丁年彭澤解官去。遨遊三徑眞三友。悠然把菊見南山。暢飲東籬醉重九。獻陵吳氏治荒園。成趣爲名良可取。養高不肯事王侯。閑臥林泉老衰朽。今年扈從過秦川。可憐尙有蕭條柳。歸計甘輸吳子先。麗詞已後黃華手。知音誰聽斷絃琴。臨風痛想紗巾酒。嗟乎世路聲利人。不知曾憶淵明否。

和平陽王仲祥韻

一聖揚天兵。萬國皆來臣。治道尙玄默。政簡民風純。明明我嗣君。寬詔出絲綸。洪恩浹四海。聖訓宜書紳。逆取乃順守。皇威輔深仁。貪饕致天罰。長吏求良循。河表背盟約。羽檄飛邊塵。聖駕親徂征。將安億兆人。湛然陪扈從。書劍猶隨身。翠華次平水。草木咸生春。冰巖上新句。文質能彬彬。冰雪相照映。珠玉如橫陳。詩筆居獨步。唐都一逸民。聖政罔二三。裁物惟平均。綜名必核實。求儒務求真。經術勿疎廢。筆硯尙可親。竚待寰宇清。圜丘祀天神。選舉再開闢。仲祥當超倫。一旦騰達時。獻策宜說訖。

和李世榮韻

聖主題華旦。熊熊百萬強。兵行從記律。敵潰自奔忙。百谷朝滄海。羣陰畏太陽。黎民歡仰德。萬國喜觀光。堯舜規模遠。蕭曹籌策長。巍然周禮樂。盛矣漢文章。神武威兼德。徽猷柔濟剛。自甘頭戴白。誤受詔批黃。我道將興啓。吾儕有激昂。厚顏懸相印。否德忝朝綱。佐主難及聖。爲臣每願良。翠華來北闕。黃鉞討南疆。明德傳雙葉。寬仁洽萬方。九服無不軌。四海願來王。兵革雖開創。詩書何可忘。洪恩浮曉露。嚴令肅秋霜。符應千齡運。功垂萬世昌。縣縣延國祚。燁燁受天祥。多士咸登用。羣生無敗戕。此行將告老。松菊未全荒。

云辭不修飾其胸次要自洞達

和李世榮見寄

雲橫北海西。駟騎來天際。梅軒真可人。新詩遠相惠。其聲若良金。其臭如芳蕙。文豔理無華。詞雄言不侈。筆力似黃山。驚浪雲奔勢。犀象牙角新。蠶蜂銜尾細。遙想醉銜杯。梅塢清陰翳。閒散玉麒麟。可得羈而係。吾子臥東山。誰治今之世。好陳十漸書。毋用六奇計。萬里入龍庭。何須歎迢遞。時方涉大川。舟楫須君濟。

和李世榮韻

多謝梅軒不惜春。聲詩來寄格清新。詞源莫測波千頃。筆力能扛鼎萬鈞。憂國心情常悄悄。閑居容止自申申。誰知板蕩中原後。瀟洒河東有若人。

再用其韻

梅軒相別又三春。別後文章與日新。不忿散材寄造化。好將幽隱入陶鈞。我遊北海年垂老。君臥南陽志

未申遙想冰魂政無恙。一枝迴施隴頭人。

又索六經

我愛平陽李世榮。一番書史再鐫銘。欲令吾子窮三傳。故向君家乞六經。簡策燦然新制度。文章宛爾舊儀刑。莫教幼穉空相憶。日月求書到鯉庭。

和移刺繼先韻三首

案元史國語解改耶律文正之姓爲移刺。

澤民我愧無術略。且著詩鴻慰離索。詩書滿載卅金山。案東金山今興安嶺在墨爾根布特哈呼倫貝爾祖成吉思汗四征專指四金山。絃歌不輟踰松漠。世上原無真是非。安知今是而非昨。連城美玉涅不緇。百鍊真金光愈燦。已悟真如匪去來。自然胸次絕憂樂。斷夢還同世事空。浮雲恰似人情薄。尙記吾山舊隱居。松風蕭瑟松花落。枕流漱石輕軒車。吟煙嘯月甘藜藿。春山寂寂春溪深。蕭條庭戶堪羅雀。而今不得安疏懶。自笑條籠困雕鷲。勉力龍庭上萬言。男兒志不忘溝壑。

其二

當年不肯讀三略。獨抱遺經伴閒索。流行坎止不尤人。自甘萬里涉窮漠。富貴榮華幾幾時。生死都來如夢昨。千年興廢漚浮沈。百歲光陰電飛掣。常笑梁鴻歎五噫。竊學榮啓彈三樂。未能仁義戢干戈。勉將敦厚懲澆薄。近有人從故隱來。黃花無恙開籬落。問渠林肉與邱糟。奚如飯麥而羹藿。人間麋鹿滿姑蘇。阿瞞不復遊銅雀。塗中曳尾希莊龜。江夏沈舟悲禰鶻。吾山佳處歸休乎。鹿遊乎林魚縱壑。

其三

祖道門庭元簡略。兒孫草裏添芒索。擬心鷓子過新羅。起念白雲橫大漠。迴殊四句有無中。元非三際來。今昨大海纖塵一點飛。洪爐片雪寒光爍。寧論業障本來空。半偈徒誇寂滅樂。細切清風非異事。更將明月剗來薄。玲瓏四面亦無門。充塞十方絕壁落。羅列珍羞渠不食。癡人猶是貪藜藿。祇圖龍領摘明珠。誰知虎口存活雀。坐晚猶迷一色邊。崎嶇鳥道一作去路橫秋鶻。可笑人閒荆棘林。死者填溝空塞壑。

和薛伯通韻

滴滴秋光溢遠山。穹廬寥落酒瓶乾。一作一天空雁擊乾。詩章平澹思居易。禪裏縱橫憶道安。案彌天釋道安。道安鳩摩羅什之弟。

鹿尾

案朱竹垞直南書房賜鹿尾述恩詩云。東丹王子畫移刺。楚材詩正用此。

不忿西風霜葉脫。難經秋雨菊花殘。閭山舊隱天涯遠。夢裏思歸夢亦難。案醫无閭山似公有別業。

鑾輿秋獵獵南岡。鹿尾分甘賜尚方。濃色殷殷紅玉髓。微香馥馥紫瓊漿。韭花酷辣同蔥薤。芥屑差辛類桂薑。何似甞根蘸濃液。邀將詩客大家嘗。一作流匙滑飯。大家嘗。

過金山用人韻

雪壓山峯八月寒。羊腸樵路曲盤盤。千巖競秀清人思。萬壑爭流壯我觀。山腹雲開嵐色潤。松巔風起雨聲乾。光風滿貯詩囊去。一度思山一度看。

過雲中贈別李尙書

誰識雲中李。謫仙詩如文錦酒如川。十畝良園君有趣。一廛薄土我無緣。舊恨常來春夢裏。新吟不到客愁邊。明朝分手天涯去。他日相逢又幾年。

和裴子法韻

頃觀子法跋白蓮社圖。斥淵明攻乎異端。吾子不惑所學。主張名教。真韓孟之儔亞也。昔巢由避天下而遠遁。堯舜受天下而不辭。以致澤施於萬世。名垂於無窮。是知潔己治天下。各有所安耳。夫清虛玄默。樂天真而自適者也。焦勞憂勤。濟蒼生爲己任者也。二道相反。甚於冰炭。使堯舜巢由。易地則皆然。後世亂臣賊子。窺伺神器。狐媚孤兒寡婦。扼其喉以取天下者。聞巢由之風。亦少知愧矣。然則巢由之功。豈可少哉。棄享天下之大樂。而且希物外之虛名者。豈人情也耶。文中子有言。虛玄起而晉室亡。斯豈莊老之罪歟。蓋用之不得其宜也。以虛玄之道治天下。其猶祁寒御單葛。大夏服重裘。自底死亡。豈裘葛之罪哉。昔晉武一統之始。不爲後世之遠謀。何曾已識之。旣而禍亂繼作。骨肉相殘。屠戮忠良。進用讒佞。雖元凱復生。亦不能善其後矣。大廈將頹。非一木所能支。獨淵明何能救其弊哉。適丁天地不交。萬物不興。君子道消。小人道長之時。淵明見幾而作。挂印綬而歸。結社同志。安林泉之樂。較之躁進苟容於小人之側者。何啻九牛毛耶。以淵明之才德。假使生於堯舜湯武之世。又安知不與皋夔伊周並驅爭先哉。宣尼有云。用之則行。舍之則藏。又云。進退存亡不失其正者。其惟聖人乎。斯亦名教之內。昭昭可

考者也。何責淵明之深也。余嘗謂否則卷而懷之。以簡易之道治一心。遠則擴而充之。以仁義之道治四海。實古今之通誼也。因用子法遊姑射元韻以見意云。

達磨一派未西來。無限勞生眼未開。六朝繁盛已矣耳。兩晉風流安在哉。自笑詩中老僕射。引韻借用此字。事佛竊做王安石。公案翻騰舊葛藤。林泉準備閑蹤跡。用之勤業垂千秋。發揚孔孟誰爲儔。舍之獨善樂真覺。賦詩舒笑臨清流。豈止淵明慕松菊。晉室高賢十八九。君子道消小人用。貞夫遠棄利名酒。蘇黃冠世能文詞。裴張二相名當時。祖道禪林恣遊戲。舞風舜德甘嘯吹。達人不爲造物役。打破東西與南北。毛吞巨海也尋常。出沒縱橫透空色。真如頗與騫鳥同。不動離乎無吉凶。湛然信筆書竊語。臨風遠寄綠野翁。贈君一句直截處。祇要教君能養素。但能死生榮辱哀樂不能羈。存亡進退盡是無生路。云汝今徹也。真當此心。融釋脫落足以了否耶。

和許昌張彥升見寄

真人休運應千載。生知神武威中邦。杜絕奇技賤異物。連城玉斗曾親撞。兵出潼關渡天塹。翠華雖映騶虞幢。生民鼓舞歎僊后。壺漿簞食轅門降。偏師一鼓汴梁下。邏騎飲馬揚子江。良臣自有魏鄭輩。死諫安用干與逢。少微昨夜照平水。清河國士真無雙。壯歲遊學力稽古。孜孜繼晷焚蘭缸。新詩寄我有深意。再三舒卷臨幽窗。安得先生贊王室。委倚奚憂庶政厓。堪笑紛紛匹夫勇。徒誇巨鼎千鈞扛。何日安車蒲輪詔。公入北關。葡萄酒佳醞。爛飲玻璃缸。四人葡萄酒。皆貯以玻璃瓶。

和南質張學士敏之見贈七首

桃源劉鳳樓蕭鑄冰斲玉哦通宵。珠璣錯落照蘭室。龍蛇偃蹇蟠霜綃。和我新詩使予起。卻得瓊瑰酬木李。邊城十載絕知音。瑟斷七絃鶴亦死。而今得識若姿容。胸中鬱結渙然空。詩壇君可據上位。筆力我甘居下風。筆陣文鋒寬且綽。馳聘看君能鬢鑠。學海波瀾千頃陂。饜飫經書爛該博。幾時把手瀟湘邊。生涯自有壺中天。鳴榔一笑舟浮蓮。滄波萬里凝蒼煙。

其二

漏沈沈竹蕭蕭。蒲團禪定坐絳宵。古廟香爐無氣息。一條白練如瓊綃。性海澄澄波不起。宛似冰壺沈玉李。庸人泥教不知歸。七竅鑿開混沌死。云玩公此語似喜宗門而不取教門雖云至道絕音容。不離幻有成真空。百尺竿頭更移步。普天匝地生清風。大用全提自寬綽。禪將交鋒何鬢鑠。醒時呼起夢中人。徧濟含生其利博。本無內外與中邊。踏破威音劫外天。汗泥深處植青蓮。昇平世界沈烽煙。

其三

雨蕭蕭風蕭蕭。對牀談道徹清宵。欲畫太虛無面目。慎無落筆汗冰綃。人間平地風波起。反笑於陵噉糟李。富貴榮華都幾時。迷者孰能死前死。須彌芥子云相容。神通妙用不空空。劫火洞然渠不壞。紙鷲能禦毘藍風。龍象騰驤何綽綽。迴視鴛鴦胎空鑿鑿。悟時一語透塵沙。安用才學恃宏博。維摩方丈傍無邊。箇中無礙散花天。迴塗穩穩步雙蓮。得玄鳥道橫晴煙。

其四

院深深。籟蕭蕭。伽陀舒卷度蘭宵。若解荷心繫珠露。便能天外裁雲綃。大覺空生一瀉起。悟斯獨有屏山。
屏山居士李之純常作楞嚴別解爲禪客所重。今按李屏山勅時裁。李四十元遠山以詩用之云世法拘人益處稱誰知龍跳九天門云云。穿透楞嚴第一機。方信菴中人。
不死箇裏家風針不容。夢迴六趣大千空。道人受用本無盡。明月薄刺細切風。香象朋從威綽綽。獨跳狂。
獐空矍鑠。悲心起處了無私。濟度塵沙恩廣博。不涉中流離兩邊。下無大地上無天。無人無佛臺無蓮。萎
萎碧草生芳煙。

其五

雲飄飄。水蕭蕭。一燈香火過閑宵。神清半夜不成夢。書帷風細揚微綃。運應昌期王者起。自愧文章輸杜。
李。竊思居易了無生。誰羨葛洪學不死。云似不喜抱朴黃庭之學。又云當與邱處機之徒不合。一幅蒲團膝足容。翛然丈室塞虛空。
翻騰密藏明佛日。淘汰機緣振祖風。丹鳳冲霄何綽綽。天曉馱郎徒矍鑠。人閒取舍本千差。世路窮通如。
六博。幽人嘯咏水雲邊。劫外光風自一天。閒來石上栽紅蓮。水無波浪火無煙。

其六

風蕭蕭。雨蕭蕭。蕭蕭風雨悲涼宵。籬菊殘英積黃玉。林風脫葉飄紅綃。幽人輾轉凌晨起。邂逅門前逢短。
李。殷衰聞道有三仁。欲說九疇君不死。穹廬相結爲從容。懸河雄辨能談空。風神蕭散野鶴立。照人玉樹。
臨秋風。落筆新詩一揮綽。不似武人誇矍鑠。銀鈎筆力掩二王。照夜連城肯輕博。他年相約秋山邊。秋江。

一派連秋天。閒聽菱女歌采蓮。輕舟一醉眠秋煙。

其七

衣龍鐘。鬢飄蕭。穹廡停獨坐寒宵。翰林遣使贈佳句。蠶芒鳥跡書生綃。既倒狂瀾再扶起。昔有謫仙原姓李。今日龍庭忽見君。誰道當年太白死。文章氣象難形容。騰龍翥鳳遊秋空。筆力萬鈞神鬼泣。雷轟電掣驅疾風。餘裕喜君能綽綽。鼓舞爲君子饗饌。解讀奇字笑揚雄。識厭張華能物博。與君握手天山邊。舉觴相屬望青天。他年雅社結白蓮。林泉杖履衝雲煙。

和張敏之鳴鳳曲韻

寫蛟螭。咳珠璣。英姿元揀一作碧梧棲。彬彬文彩自光輝。有材希晉用。失志欲劉依。薦君誰肯惜吹噓。洪才大筆識君稀。鯤遊翻海震鵬舉。翥天飛。問渠蟾窟攀仙桂。何似冥山破鐵圍。人間強認假生死。世上本無真是非。濃歡帶春夢。晚景歎殘暉。夢斷日沈真可笑。輸卻禪人向上機。遮眼開經卷。蒙頭壞衲衣。息念融凡聖。無心應順違。震風威。橫擔柳栗萬山歸。案王荆公詩道人手持柳栗杖。又范成大詩病憐柳栗隨身懷。

和孟駕之韻

平陽聞有鄒人孫。封書上我僅萬言。討論墳典造極致。商推古今窮深源。文章高出蠶黃輩。英雄不效秦儀志。志圖仁義濟元元。異比無雙瑚璉器。淪落塵埃德不孤。梅軒結友天一隅。我惜鹽車困騏驥。騰驥未得踏亨塗。甕牖繩樞甘儉薄。飢腸霉轉充糟粕。他日佳聲聞九天。富貴之來不得卻。丁年黃卷樂平生。鄉

閩一諾千金輕。滄浪清處閑濯纓。才名高價如連城。筆下有神詩有眼。五車書史窮編簡。一舉高登甲乙科。會對闔閩持手版。天兵一鼓下睢陽。旌旗整整陣堂堂。玉石俱焚君子隱。北渡來依日月光。徒步黃塵千里遠。猶抱遺經究微婉。天產昂藏一丈夫。三十未遇非爲晚。聞望早冠儒林叢。燦然星宿羅心胸。馳驟大方誰並駕。絕塵奔逸其猶龍。若是昆吾玉可切。鋸錯不是尋常鐵。利穎神鋒人未知。寶匣空閑三尺雪。何如搜出蟄龍鞭。一聲霹靂轟青天。歲早須君作霖雨。拔茅進用其茹連。天子明道求國棟。鵬飛全藉天風送。鳳池波暖百花新。詠游不作江湖夢。

和陳秀玉縣黎詩韻

石門九月西風高。黎出於石門之北運化縣。縣黎萬樹金垂梢。清溪號也。秀玉道千里攜贈我。藤筐初發香盈包。謫仙風度清溪亞。春風曾飲梨花下。不用紅妝唱採蓮。醉望青天歌二雅。我有斗酒清且醇。同君薦此鵝黃新。初見清香剖金卵。更看削玉飛霜鱗。縹葉繁條何足錄。夜光安可同魚目。文園塵渴政難禁。咀嚼冰雪刺香玉。

和冀先生韻

東垣士大夫。以興王聖德詩見寄。用酬雅意。

運出三爻兌。以太乙推之而得。龍飛九五乾。要荒歸化育。豪哲入陶甄。有幸恩涵海。無私德應天。偏師收百越。一鼓下三川。天子能身正。元戎不自賢。重光道同軌。累聖德相聯。策決九重內。功歸萬乘權。羣雄哀稭額。多士喜摩肩。輔弼規左右。承疑贊後前。開夷逾漢武。平叛跨周宣。冠蓋通窮域。車書過古堧。覽機雲母障。受

諫翠華。駟款塞。諸蠻洞。來朝百濟船。降王趨陞闕。強虜列氓編。淨掃妖氛變。潛消烽火煙。詞臣遊館閣。幽
隱起林泉。堯舜文明盛。商姬禮樂全。九成含古奏。二雅詠新篇。世卜千百世。年斯億萬年。宗親成蒂固。國
祚等瓜絲。聖政與人頌。天威萬古傳。勉旃封禪事。不可策安邊。

3
4
5
6

湛然居士文集卷二

和百拙禪師

十方世界是全身。氣宇如王絕比倫。與奪機中明主客。正偏位裏辨君臣。眠雲臥月辭三鳥。鼓腹謳歌預四民。了了時誰可曉。閑人原不是閑人。

題平陽李君實吟醉軒

古晉君實世所希。幽軒佳號兩相宜。長鯨海量嫌甜酒。彩筆天才笑小詩。案白詩嫌甜酒。笑小詩乃疊韻。七步賦成文案爛。千鍾不惜錦淋漓。一作千鍾。飲。何當杖履遊平水。得預君家吟醉時。

從聖安澄老借書

浩然竊語寄西堂。此個因緣果異常。陽老十門剛結案。欽公五派強分贓。劍逢劍客須拈出。詩遇詩人何必藏。居士病多諳藥性。聖安得效不傳方。云謂傳心法如大醫王應病予藥。

題西安所藏佛牙二首

殷勤敬禮辟支牙。緣在西菴居士家。午夜飛光驚曉月。六時騰焰燦朝霞。一番頂帶因初結。七轉生天果不差。庸士執方猶未信。防風安得骨專車。

其二

旃檀匣裏貯靈牙。來自中天尊者家。瑩色冷侵秋夜月。眞光明射晚晴霞。本同舍利原無別。疑是金剛事有差。案傳突事以金剛鑽碎爲佛牙乃羚羊角爲造也。猶憶廣長舌左右。咀嚼風雨震雷車。

和移刺繼先韻二首。案移刺卽耶律欽定金史元史逕改國語。

舊山盟約已愆期。一夢十年盡覺非。瀚海路難人去少。天山雪重雁飛稀。漸驚白髮寧辭老。未濟蒼生曷敢歸。去國遲遲情幾許。倚樓空望白雲飛。

又

不事王侯懶屬文。時危何處覓元勳。他年收拾琴書去。笑傲林泉我與君。

過陰山和人韻。案陰山卽西金山。過此則爲斜米。思干城。應詳文正所作西遊錄。

陰山千里橫東西。秋聲浩浩明秋溪。猿狖鴻鵠不能過。天兵百萬馳霜蹄。案太祖成吉思汗由此用兵同部及印度萬頃松風。

落松子。鬱鬱蒼蒼映流水。六丁何事誇神威。天台羅浮移到此。雲霞掩翳山重重。峯巒突兀何雄雄。古來天險阻西域。人煙不與中原通。細路縈紆斜復直。山角摩天不盈尺。溪風蕭蕭溪水寒。花落空山人影寂。四十八橋橫雁行。勝遊奇觀眞非常。臨高俯視千萬仞。令人凜凜生恐惶。百里鏡湖山頂上。旦暮雲煙浮氣象。山南山北多幽絕。幾派飛泉練千丈。大河西注波無窮。千溪萬壑皆會同。君成綺語壯奇誕。造物縮手神無功。山高四更纔吐月。八月山峯半埋雪。遙思山外屯邊兵。西衣冷徹征衣鐵。

又

羸馬隱山道。悠然遠思寥。青巒雲鶴鶴。黃葉雨蕭蕭。未可行周禮。誰能和舜韶。嗟吾浮海粟。何礙八風飄。
按西遊記輪臺韓詩夜宿陰山下陰山夜寂寥長空雲黯黯大樹葉蕭蕭萬里程途遠三冬氣候翻全身俱放下。一任斷蓬飄。

又

八月陰山雪滿沙。清光疑目眩生花。插天絕壁噴晴月。擎海層巒吸翠霞。松檜叢中疏吠畝。藤蘿深處有人家。橫空千里雄西域。江左名山不足誇。
按西遊記過沙陀詩高如雲氣白如沙遠望那知是眼花漸見萬家從古至今常不壞吟詩高向直南誇。

又

陰山奇勝詎能名。斷送新詩得得成。萬壘峯巒擎海立。千層松檜接雲平。三年沙塞吟魂遞。一夜氈穹客夢清。遙想長安舊知友。能無知我此時情。

再用前韻

河源之邊鳥鼠西。陰山千里號千溪。倚雲天險不易過。驢蹏蹏蹏追風蹏。簽記長安五陵子。馬似游龍車似水。天王赫怒山無神。一夜雄師飛過此。盤雲細路松成行。出天入井實異常。王尊疾驅九折坂。此來一顧應哀悼。崢嶸突出峯峭直。山頂連天纔咫尺。楓林霜葉聲蕭騷。一雁橫空秋色寂。西望月窟九譯重。嗟乎自古無英雄。出關未盈十萬里。荒陬不得車書通。天兵飲馬西河上。欲使西戎獻馴象。旌旗蔽空塵漲天。壯士如虹氣千丈。秦皇漢武稱兵窮。拍手一笑兒戲同。塹山陵海匪難事。剪斯羣醜何無功。騷人羞對

陰山月壯歲星星髮如雪。穹廬展轉清不眠。霜匣閑殺鋸鋸鐵。

復用前韻唱玄

天涯流落從征西。寒盟辜負梅花溪。昔年學道頗得趣。魚兔入手忘筌蹄。殘編斷簡披莊子。日日須當頌秋水。誰知海若無津涯。河伯源流止於此。人閒醬缶紙數重。太玄強草嗤揚雄。高臥蒿萊傲唐室。清風千古獨王通。按此誤文中子王仲淹卒年三十五在開皇大業間曲者自曲直者直。何必區區較繩尺。一筆劃斷閑是非。萬事都忘樂岑寂。功名半紙幾字行。競美成績書太常。只知牢筴饗鸞象。不思臨刃心悲惶。何如打坐蒲團上。參透昇平本無象。一餅一鉢更無餘。容膝禪齋僅方丈。從教人笑徹骨窮。生涯原與千聖同。烏道雖玄功尚在。不如行取無功功。歸來踏破澄潭月。大冶洪爐飛片雪。且聽石女鳴巴歌。萬里一團無孔鐵。

用前韻送王君玉西征二首

湛然送客河中西域名。乘輿何妨過虎溪。清茶佳果餞行路。遠勝濁酒烹馳蹏。結交須結真君子。君子之交淡如水。一從西域識君侯。傾蓋交歡忘彼此。當年君臥東山重。守雌默默原知雄。五車書史豈勞力。六韜三略無不通。詩詠珠璣無價直。青囊更有琴三尺。奉命西來典重兵。不得茅齋樂真寂。魚麗大陣兵成行。行師布置非尋常。先生應詔入西域。一軍駭異皆驚惶。武皇習戰昆明上。欲討昆明致犀象。吾皇兵過海西邊。氣壓炎劉千萬丈。先生一展才略窮。百蠻冠帶文軌同。威德洋洋震天下。大功不宰方爲功。隱居自有東山月。風拂松花落香雪。退身參到未生前。方信秤錘原是鐵。

其二

先生應詔將征西。湛然送客涉深溪。徘徊一舍未忍去。兵車暫駐天駒蹏。猶憶今春送君子。桃李無言映流水。寒暑推遷奈老何。秋風革律重來此。關山險僻重復重。西門雪恥蒙豪雄。定遠奇功正今日。車書混一華夷通。先生純德如矢直。詎爲直諍而枉尺。功成莫戀聲利場。便好回頭樂玄寂。故山舊憶松千行。奇峯怪石原異常。前日盟言猶在耳。猿鶴思怨空悲惶。我擲直釣魚不上。須信遊鱗畏龍象。冥鴻一舉騰秋空。誰羨文章光萬丈。道兮人作非天窮。區區何必較異同。語默行藏在乎我。退身奚論無成功。安東幸有閻山月。萬頃松風萬山雪。收拾琴書歸去來。脩心須要金成鐵。

用前韻感事二首

稱斤甘齋賣京西。誰信無人採五溪。按高力士詩。西京作斤。竄五溪無人採。鵬異衆禽全六翮。鱗殊凡獸具五蹄。昔年學道宗夫子。盈科後進如流水。蟄龍猶未試風雷。萍泛蓬飄而至此。緼袍甘分百結重。不學亂世好人雄。忘憂樂道志不二。守窮待變變則通。歲寒松柏蒼蒼直。摩雲直待高千尺。桃李無言蹊自成。此君冷淡人何寂。生平恥與噲伍行。杜門養拙安天常。澤民致主本予志。素願未酬予恐惶。否塞未能交下上。何日亨通變爻象。不圖廊廟爲三公。安得林泉參百丈。按百丈乃馬祖弟。曹溪之四傳也。居士身窮道不窮。庸人非異是所同。筆頭解作萬言策。人皆笑我勞無功。流落遐荒淹歲月。贏得飄蕭雙鬢雪。謀生太拙若勿嗤。不如嗣宗學鍛鐵。按叔夜事。誤爲阮公。蓋公守嶺北行中書省。塞外無書。信手拈來。不復檢本。故用事多誤。亦不足爲病也。

其二

金烏日日東飛西。滔滔綠水流長溪。流波一去不復返。逐日恨無八駿蹄。窮理達生惟孔子。歎夫逝者如斯水。歲不我與其奈何。兩鬢星星尚如此。曩時鑿破藩垣重。澤民濟世學英雄。風雲未會我何往。天地大否途難通。霜匣神劍蒼龍直。切玉如泥長數尺。利器深藏人未知。豐城埋沒神光寂。讀書一目下數行。金石其心學正常。學術忠義兩無用。道之將喪予憂惶。有意攀龍不得上。徒勞牙角拔犀象。唯思仁義濟蒼生。豈爲珍羞列方丈。簞瓢陋巷甘孤窮。鴻鵠安與燕雀同。天與之才不與地。反令豎子成其功。安得方明依日月。功名未立頭如雪。問君此錯若爲多。使盡二十四州鐵。

過濟源和香山居士韻

覃懷勝遊地。濟瀆垂名久。忽見樂天吟。笑我輸先手。麗詞金玉振。老筆風雷走。乘興試續貂。啓我談天口。平湖湧泉注。清涼瑩無垢。憑檻瞰漣漪。風髯塵抖搜。龍孫千萬竿。蒼鬢濃陰厚。沁水濟源東。天壇王屋右。秀色已可餐。何須杜康酒。步步總堪詩。佳篇如素有。廣酬淡相對。獨有龍岡叟。亭上幾徘徊。斜陽西入酉。晚年歸意切。對此空沈首。何日遂初心。營居碧林後。一作翠林。

和裴子法見寄

人生都幾何。半被功名役。一旦燕山破。西行過千驛。顛沛不違仁。先難而後獲。鷓鴣捐腐鼠。烏鳶其勿嚇。扈從出天山。從容遊大石。按大石。謂西遼耶。律大石。建牙之所。琴書淡相對。尙未忘丘索。前歲入關中。戈甲充商號。明詔典

蘭省自愧承深責。秦隴劫成灰。京索空陳迹。長河尙濁流。南山自濃碧。把酒酬青天。興亡弔今昔。長安非衣君。壯年學問積。按裴晉公事天上玉麒麟。英才可珍惜。詩魂素月高。飲量滄海窄。清談咳珠玉。便腹筭經籍。服君百韻詩。謝子萬言策。易道已變屯。世爰當應革。淮陰正虛襟。左車宜籌畫。須要蓮峯手。乾坤再開闢。昂藏綠野翁。真我龍門客。

用李德恆韻寄景賢

牢落十年扈御營。瑤琴空盡水仙聲。酷思詩酒閑中樂。見說干戈夢裏驚。林下因緣千古重。人間富貴一錢輕。此身未退心先退。獨有龍岡識我情。

過天德和王輔之四首

天縱吾君大聖人。天兵所指弭煙塵。三齊電掃何須鄙。六國雷驅不用秦。誅佞未聞曾請劍。劾姦誰肯試埋輪。伴餐黃閣空無輔。自笑龍鍾一老臣。

其二

六師嚴駕渡長河。師不留行誰敢何。按何與詞同千里旌旗翻錦浪。一聲金鼓振寒波。殷亡誰道三仁在。康滅空傳五子歌。唾手要荒歸一統。漢唐鴻業未能過。

其三

積年叨祿領台司。位重才微甚不宜。地上流錢慚妄算。樽前決勝愧良帷。過情聲聞傳人口。似直愚忠結

主知三徑荒涼松菊在。他時舍此復何之。

其四

勸老先生本素臣。洪才大筆力千鈞。沽名不築傳巖版。買世誰垂渭水綸。舟泛五湖希范蠡。腰懸六印笑蘇秦。韋編三絕耽義易。蕭散風神真隱人。

槐安席上和張梅韻

甘薺五溪人不採。兩京高價買秤斤。君方淪落羞看我。我亦飄零懶問君。人遠空殘眉上黛。愁深不整鬢邊雲。誰憐古戍寒窗下。新樣梭成織錦文。

思親有感二首

遊子栖遲久不歸。積年溫清闕慈幃。囊中昆仲親書貼。篋內萱堂手製衣。黃犬不來愁耿耿。白雲空望思依依。欲憑鱗羽傳安信。綠水西流雁北飛。

其二

伶仃萬里度西陲。壯歲星星兩鬢絲。白雁來時思北闕。黃花開日憶東籬。可憐遊子投營晚。正是媼親倚戶時。異域風光恰如故。一消魂處一篇詩。

思友人

落日蕭蕭萬馬聲。東南回首暮雲橫。金朋蘭友音書絕。玉軫朱絃塵土生。十里春風別野店。五年秋色到

邊城。雲山不礙歸飛夢。夜夜隨風到玉京。

贈李郡王筆

管城從我自燕都。流落遐荒萬里餘。半札秋毫裁翡翠。一枝雪竹翦瓊瑤。鋒端但可題塵景。筆下安能劃太虛。聊復贈君爲土物。中書休笑不中書。

寄雲中臥佛寺照老

像教中微祖意沈。盧能嫡子起予深。看經不怕牛皮透。公見闕藏故云著眼常聽露柱吟。行道權居臥佛寺。活機特異死禪心。憑君摘取空華實。好種人間無影林。

寄平陽淨明院潤老

昔年平水便相尋。握手臨風話素心。刻燭賦成無字句。按徽彈徹沒絃琴。風來遠渡晚潮急。雨過寒塘秋水深。此樂莫教兒輩覺。又成公案滿叢林。

贈雲川張道人

雲川道士有詩聲。刻篆雕蟲醉未醒。素扇自甘贖碧筇。因西人奪筇。渠以扇贖之故云玄鶴不肯換黃庭。春秋榮悴悲椿木。晦朔生凋笑瑞莫。何似擴開真日月。區區爍火任熒熒。

贊李俊英所藏觀音像

白衣大士足威神。運智興悲詎可陳。金色界中垂萬臂。碧蓮花上坐全身。鎮州鑄就金難似。天竺鑄來玉

未真不識觀音真面目。鶯吟燕語過殘春。

題西菴歸一堂

搏霄元帥築西菴於廳事之隅。以舍沙門。建歸一堂。置三聖廟貌。屏山居士有云。卷波瀾於聖學之域。徹藩籬於大方之家。其搏霄之謂乎。偶得亂道韻詩。錄呈諸士大夫。幸希光。和。仍請西菴上人書之。楹棟閒。爲他時林下清話。張本云。

三聖真元本自同。隨時應物立宗風。道儒表裏明墳典。佛祖權宜透色空。曲士寡聞能異議。達人。大觀解相融。長沙賴有蓮峯掌。一撥江河盡入東。

和景賢還書韻二首

居士今年又出關。琴書真味伴予閒。簡成草略初無意。語闕治擇誤犯顏。漆水自慚貽口實。龍岡卻得破詩慳。衰翁幸乞贖前過。一炷清香論八還。

其二

淵明幽隱掩柴關。琴已忘絃人亦閒。靜倚書窗獨寄傲。笑觀庭樹自怡顏。五音格外聲何限。百草頭邊法不慳。盡譜斷絃無用處。因風得得寄書還。景賢索絃譜。故有是句。

外道李浩求歸再用韻示景賢

自從一箭透重關。觸處忘緣觸處閒。莫問羔裘橫毳衲。從教華髮映蒼顏。水聲說法起予甚。山色呈機不

我慳寄客天涯樂如許。問渠何必更南還。

外道李浩和景賢霏字韻予再和呈景賢

塵緣劃斷已忘機。布鼓徒敲和者稀。中隱強陪人事過。禪心不與世情違。昔年勳業真堪笑。舊日家山懶欲歸。我愛北山真境界。乾坤一色雪花霏。

和楊居敬韻二首

自媿才術草芥微。偶然千載遇明時。惟希一統皇家義。何暇重思晁氏危。仁義且圖扶孔孟。縱橫安肯効秦儀。行看堯舜澤天下。萬國咸寧庶績熙。

其二

詔下龍庭萬國歡。野花啼鳥總欣然。熙朝龜卜符千億。聖主龍飛第一年。至道變通皆有數。浮生富貴本由天。誰人得似楊公子。傲世高吟數百篇。

過天寧寺用彥老韻

十年不得舞衣斑。行盡天涯萬里山。黃閣伴餐空皓首。蒼生未濟漫胡顏。新朝兵革征方急。舊隱煙霞尙未還。袞袞簿書塵滿眼。衰翁奚暇謁松關。

又

今日從征亦偶然。天寧遙憶思懸懸。貪榮不得還山去。須信衰翁未古賢。

過天山周敬之席上和人韻二首

淪落天涯數十秋。區區班筆早年投。採薇山下慵拈草。洗耳溪邊懶飲牛。振武揚威難射虎。忘機絕慮不驚鷗。當年射策承明殿。未必輕輕輸呂籌。

其二

鷄馬居延酒半醺。寂寥寒館變春溫。未能鵬翼騰溟海。不得鴻書過雁門。千里雲煙青塚暗。一天風雪黑山昏。天涯幸遇知音士。仔細論文共一樽。

和人韻

四海皇皇無所歸。夢魂常繞故園飛。海山不羨學居易。華表留言笑令威。毛落難尋蘇子節。囊空猶有老萊衣。靜思二十年閒事。擾擾紛紛盡覺非。

丁亥過沙井和移刺子春韻二首

科登甲乙戰文圍。吾子才名子獨知。巢許身名君易樂。蕭曹勳業我難爲。有恆得見真無憾。知己相逢未忍離。攜手河梁重話舊。胡然羞和子卿詩。

其二

行藏俯仰且隨時。縑袍懷珠人未知。燕雀既羣難立志。鳳凰不至擬胡爲。可嗟世態頻更變。何奈人生多別離。莫忘天山風雪裏。湛然駝背和君詩。予昨至沙井乘牛車過前路跨駝方達行在偶得隔句一聯云牛車馳傳頗異相如駟馬車駝背吟詩不似竹林七賢畫成有

句是

再過晉陽獨五臺開化二老不遠迎


高岡登陟馬玄黃。落日西風過晉陽。道士歡迎捧林菓。儒冠遠迓挈壺漿。五臺強健頭如雪。開化輕安鬢未霜。誰會二師深密意。趙州元不下禪牀。

過清源謝汾水禪師見訪

汾水禪師個裏人。杖藜尋我過清源。半盃紅菓情何厚。一盞清燈話細論。山水景中君得意。兵戈堆裏我消魂。他年相約雲深處。松竹蕭蕭靜掩門。

王屋道中

勝克河中號令齊。神兵入自太行西。昏昏煙鎖天壇暗。漠漠雲埋王屋低。風輒卻教冰泛水。一作冰解水。寒輕還使雪成泥。行吟想像覃懷景。多少梅花坼玉溪。



湛然居士文集卷三

和解天秀韻

猛士彎弓挽六鈞。長驅入汴政施仁。前朝運謝山河古。聖世時亨雨露新。未遇自甘焚綠綺。知奇不必惜陽春。朝廷將下搜賢詔。莫戀煙霞老此身。

用萬松老人韻作十詩寄鄭景賢

其二
甞廬同抵足。談道月西沈。議論馨香發。文章蘊藉深。正便邊氏腹。不止謫仙襟。自得逍遙意。何須泊鄧林。

其三
豐城三尺劍。神氣尙埋沈。確論穿楊的。生機劈筈深。天真貯便腹。浩氣塞征襟。佇看澤天下。清風冠士林。

其四
破船無滲漏。流水不能沈。霧鎖青山秀。花藏古徑深。白雲陪野興。晴月洗煩襟。絕後重甦息。飛花枯木林。

其五
隱隱三星出。依依片月沈。鶴飛遼海闊。猿嘯楚山深。柳色雲沾袖。蘆花雪滿襟。普天秋意露。一葉墜梧林。

玄珠羅帳密。寒鼎篆煙沈。翡翠疏簾隔。琉璃古殿深。本來無垢體。何必拂塵襟。斫卻蟾中桂。方成假若林。

案假若疑
般若之誤

其六

驚餌不須針。聊將玉線沈。須彌猶未大。渤海豈爲深。悟後牛穿鼻。迷時馬有襟。案韓詩馬牛而襟羸。弋人何所慕。幽鳥在嵩林。

其七

簡事不容針。迷途自陸沈。西天三步遠。東海一盃深。涼月盛玄鉢。輕雲翦素襟。曹溪無一滴。波浪沸禪林。

其八

流波無放蕩。死水暮平沈。機盡方鈎隱。綸空正釣深。赤心休惜口。青眼好開襟。誤捉溪中月。人人似翰林。

其九

夢覺方知錯。生平自屈沈。滌塵千溯外。遺照亂松深。柳帶縫穿屣。荷衣綴破襟。寂寥選佛味。何似宴瓊林。

其十

漁家何足好。乘興一鈎沈。路僻蒼苔滑。舟橫古渡深。小晴掀籜笠。微雨整蓑襟。夢斷知何處。寒潮沒晚林。
案東坡句不覺
青杯沒晚潮

萬松老人眞贊

昔無盡居士題恆岳廟云。聰明厭血食。悔不值元珪。茲因恆州四衆敦請萬松老師。師不行。且以

頂相付之。門弟湛然居士再拜而贊之曰。

每恨恆山不逢珪老。四衆同緣。萬松親到。

贈萬松老人琴譜詩一首

萬松素琴并譜。余以承華殿春雷。及種玉翁悲風譜贈。

良夜沈沈人未眠。桐君橫膝叩朱絃。千山皓月和煙靜。一曲悲風對譜傳。故紙且教遮具眼。聲塵何礙污幽禪。元來底許真消息。不在絃邊與指邊。

寄曲陽戒壇會首大師

四衆飛書請萬松。不消彈指已成功。燈籠證據真談辨。露柱承當不耳聾。梵行細推無據所。戒壇須信塞虛空。無爲濟物誰能悉。惟有東垣月拂風。

和王巨川韻

文田案四遊記稱宣使王巨川樞。黑黠事。略作王機蓋太祖時官宣撫御史大夫也。

聖駕徂征率百工。貔貅億萬人關中。周秦氣焰如雲變。唐漢繁華掃地空。灞水尙存官柳綠。驪山惟有驛塵紅。天兵一鼓長安克。千里威聲震陝東。

釋奠

王巨川能於灰燼之餘。草創宣聖廟。以己丑二月八日丁酉。率諸士大夫釋而奠之。禮也。諸儒相賀曰。可謂吾道有光矣。是日四衆奉迎釋迦遺像行城。歡聲沸沸。僕皆預其禮。作是詩以見意云。

多士雲奔奠上下。案上下疑釋迦遺像亦行城旌幢錯落休迷色鐘磬鏗鏘豈在聲宣父素心施有政能仁深意契無生儒流釋子無相諷禮樂因緣盡假名。

和移刺子春見寄五首

四海皇皇足俊賢。浪陪扶日上青天。且圖約法三章定。寧羨浮榮六印懸。潤色吾術惟恐後。扶持天下敢爲先。過情聲聞予深恥。可笑虛名到處傳。

其二

生遇干戈我不辰。十年甘分作俘臣。施仁發政非無據。論道經邦自有入。聖世規模能法古。汙俗習染得維新。英雄已入吾王彀。從此無人更問津。

其三

且喜朝廷先正名。林泉隱逸總公卿。羣雄一遇風雲會。萬國咸觀日月明。丹鳳固應潛亂世。白麟自合出昇平。疇看一作快遇北關垂溫詔。夜半前席進賈生。一作顯觀

其四

舉世寥寥識我誰。未學弓矢愧由基。衰年有幸彈三樂。盛世無由出六奇。棄物且存光海量。散材獲用荷天私。微臣自忖將何報。信筆裁成頌德詩。

其五

邂逅沙城識子初。天山風雪醉吟餘。文章光焰君堪羨。節操儀型我不如。麴蘖鄉中前進士。渠有詩云。老
春故有風波堆裏老中書。他年歸去無相棄。同到閩山舊隱居。是句

寄移刺國寶

昔年萍迹旅京華。曾到風流國寶家。居士爲予常吃素。先生愛客必烹茶。明窗揮麈談禪髓。淨几焚香頂
佛牙。回首五年如一夢。夢中不覺過流沙。公所藏佛

寄景賢一十首

龍岡能覓談中歡。心與孤雲自在閑。琴院生涯事松菊。詩書活計老丘山。叩絃聲自無中出。得句思從天
外還。踏破化工無盡藏。閑人受用亦非慳。

其二

龍岡漆水兩交歡。縱意琴書做老閑。未得一言安海內。已輸三箭定天山。肯容詩思妨心慧。豈使聲塵礙
耳還。信手拈來無不是。清風明月有何慳。

其三

人間聚散妄悲歡。何似林泉遯世閑。十載殘軀遊瀚海。積年歸夢透閩山。先人舊空巖猿鶴招予往。滿架
琴書伴我還。多謝龍岡憐老隱。新詩酬酢路無慳。

其四

絃索詞章且助歡。羨渠臨老得安閑。琴歌愛子彈秋水。佳句服君仰泰山。聲古調淒真可聽。辭雄韻險實難還。先難後易今方省。名士襟懷本不慳。

其五

宦情觸處不成歡。未得浮生半日閒。薦鶡有書慚北海。澤民無術愧東山。琴書氣習終難忘。巖麓荒園怎得還。卜隱龍岡成老伴。肯教詩思筆頭慳。

其六

廣文憐我失清歡。每著琴書伴我閒。痛憶金聲并玉振。酷思流水與高山。詩壇吝嗇猶深閉。琴債遲延未肯還。一狀如今都領過。龍岡須破兩重慳。

其七

琴書我子盡幽歡。隨分消磨日月閒。佳句典型傳四海。水仙聲韻徹三山。每慚木李投君去。卻得瓊瑤報我還。從此龍岡開廩藏。徽邊筆下便無慳。

其八

世閒何事最爲歡。爭似能偷忙裏閒。得遇夜晴須對月。每逢春盛強登山。無錢沽酒和衣典。一作和琴典 圖利吟詩倍本還。綺語千章琴百曲。莫教風月笑人慳。

其九

我與先生久已歎。而今皆願老來閑。同舟載棹醉觀月。並轡騎驢飽看山。綺句綴成連譜換。純音彈了著詩還。琴詩此際慵拈出。可怨龍岡爲紙慳。

其十

閑人閑裏竟閑歡。未得回光未是閑。叩道一螺斟巨海。參玄千里望恆山。但能透鏃穿三句。何必拖泥辨八還。个事人人皆富有。含珠休怨釋迦慳。

和景賢韻三首

龍岡使腹盡詩書。落筆雲煙我不如。一紙安書思塞雁。十年歸興憶鱸魚。託身醫隱君謀妙。委跡儒冠吾計疏。何日相將歸故里。翠微深處卜幽居。

又

龍岡走筆和清篇。出示珠璣寄湛然。字古意新看不足。挑燈寒雨夜無眠。

又

摩撫瘡痍正是醫。微君孰肯拯時危。萬金良策悟明主。厚德深仁四海施。

和李世榮韻

異同誰足據。俯仰且隨緣。居士難聯句。梅軒卻解禪。無雲皆皓月。何處不青天。話到忘言處。迢迢夜不眠。

□云。盡是傳燈偈頌。

和景賢十首

龍岡居士得賢君。聞道賢君增所聞。節操鶴鷄捐鼠餌。風神野鶴立鷄羣。只知輔嗣能談易。誰識相如善屬文。擬欲贊君言不盡。區區微意見詩云。

其二

天下奇才鄭使君。清名不使世人聞。五車書笥獨窮理。三峽詞源迴出羣。未得開懷重話舊。常思抵足共論文。自從一識龍岡老。餘子紛紛不足云。

其三

一聖龍飛敢擇君。嗟予潦倒尙無聞。蒼生未識鴻鵠志。皓首甘遊麋鹿羣。黃雀已歸奚望報。彩禽飛去不能文。龍岡獨慰孤窮悶。時有新詩報我云。

其四

試和新詩寄鄭君。無言談道不聞聞。治心更索捐中道。養性渾如鞭後羣。玄語諄諄非是說。真書歷歷不關文。儒生束教嫌虛誕。得意忘言孔子云。云三句謂絕學捐書乃能見道。四句譬之牧羊。斥其後者而鞭之。

其五

文章自愧不如君。敢以玄言瀆所聞。有道居塵何弃俗。無心入獸不驚羣。案此蒙莊語。重玄消息無多子。半紙功名值幾文。回首死生猶是幻。自餘何足更云云。

其六韻換

十年不遇一相知。恰識龍岡恨見遲。常愛箕山能洗耳。何堪鄰舍傲嬰眉。榮枯貴賤難逃數。用舍行藏自有時。案機緣之契。否自有其時。心事紛紛無處說。援毫閑賀景賢詩。

其七感事

萬里西來過月氏。案大月氏今愛烏罕。入北印度必由之。初離故國思遲遲。人情慚媿三鬢面。人世梳妝半額眉。田上野夫空歎鳳。澤邊漁父不傷時。龍岡本具英雄眼。幾倩東風寄我詩。

其八讀唐史有感

林甫滔天聖不知。三郎深恨識卿遲。塵中妃子春羅襪。錢上開元指甲眉。七夕殿中祈巧夜。三秋原上摘瓜時。長天忽見飛來雁。垂淚空吟李嶠詩。

其九

李楊相繼領台司。兵起漁陽禍已遲。向時正惜花解語。而今空憶柳如眉。心傷桃李初開夜。腸斷梧桐半落時。試問宮中誰第一。三郎猶記謫仙詩。

其十

往來寒暑暗推移。下手修行猶太遲。迷後徒勞常捏目。悟來何必更揚眉。宗門淘汰宜窮理。道眼因緣貴識時。祇爲龍岡心猛利。湛然剛寫不言詩。

又一首

龍岡醫隱本知機。薰瘴同盤辨者稀。廊廟虛名無意戀。林泉夙願與心違。羨君綽綽有餘裕。笑我皇皇無所歸。尚憶當年垂釣處。一江煙雨靜霏霏。

和王君玉韻

王孫蒙饋飯。靈輒未扶輪。自笑孤窮客。誰憐衰病身。黃沙萬餘里。白髮一孀親。腸斷山城月。徘徊照遠人。

過東勝用先君文獻公韻二首

荒城蕭灑枕長河。古字碑文半滅磨。書寫路遙人去少。黑山寒重雁來多。正愁曉雪冰生硯。不忿西風葉墜柯。偶憶先君舊遊處。潸然不奈此情何。

其二

依然千里舊山河。事改時移隨變磨。巢許家風烏可少。蕭曹勳業未爲多。可傷陵變須耕海。不待碁終已爛柯。翻手榮枯成底事。不如歸去入無何。

過夏國新安縣

時丁亥九月也

昔年今日渡松關。西城陰山有松關。車馬崎嶇行路難。瀚海潮噴千浪白。一作千里雪。天山風吼萬林丹。氣當霜降十分爽。月比中秋一倍寒。回首三秋如一夢。夢中不覺到新安。

過青塚用先君文獻公韻

漢室空成一土丘。至今仍未雪前羞。一作可惜冰姿壓古丘。佳人猶自夢中羞。不禁出塞陟沙磧。最恨臨軒辭冕旒。幽怨半和青塚月。閑雲常鎖黑河秋。滔滔天塹東流水。不盡明妃萬古愁。

過青塚次賈搏霄韻二首

當年遺恨歎昭君。玉貌冰膚染塞塵。邊塞未安嬪侮虜。朝廷何事拜功臣。朝雲雁唳天山外。殘日猿悲黑水濱。十里東風青塚道。落花猶似漢宮春。

其二

延壽丹青本誑君。和親猶未斂胡塵。穹廡自恨嬪戎主。泉壤相逢愧漢臣。玉骨已消青塚底。香魂猶遶黑河濱。愁雲暗鎖天山路。野草閑花也怨春。

再用韻以美搏霄之德

去歲雲川始見君。澄澄胸次淨無塵。山南第一珪璋士。冀北無雙柱石臣。公領師職。故云。萬里雲松斜谷外。千竿水竹渭河濱。他年歸隱重相訪。無影林閒別有春。

再用韻自歎行藏

箕裘家世忝先君。慚愧飄蕭兩鬢塵。自古山河歸聖主。從今廊廟棄愚臣。常思臥隱雲鄉外。肯放行吟澤國濱。驛使不來人已老。江南誰寄一枝春。

再用韻感古

宜尼名教本尊君。賊子干常犯罪屢。鹿失羸秦無令主。鼎分炎漢有能臣。宋朝南渡尤天水。遼室東傾罪海濱。回首興亡都莫問。不如沈醉瓮頭春。

再用韻唱玄

重玄不惜說知君。又恐重添眼裏塵。臨濟喝中分主客。洞山言下辨君臣。持鈴普天搖空裏。垂釣華亭沒水濱。勘破遮般閑伎倆。鐵林花發劫前春。

過雲川和劉正叔韻

西域風塵汗漫遊。十年辜負舊漁舟。曾觀八陣雲奔速。親見三川席卷收。煙鎖居延蘇子恨。雲埋青塚漢家羞。深思籬下西風醉。誰羨班超萬里侯。

過雲中和張伯堅韻

一掃氏羌破吐渾。羣雄悉入北朝吞。自憐西域十年客。誰識東丹八葉孫。射虎將軍皆建節。飛龍天子未更元。我慚才略非良器。封禪書成不敢言。

過雲中和張仲先韻

致澤君民本不難。言輕無用媿偷安。千年潦倒功何在。三徑荒涼盟已寒。巖下藏名思傳說。林間談道謁豐干。案天台三大士。其一豐干也。挂冠神武當歸去。自有夔龍輔可汗。

過雲中和王正夫韻

白雪陽春和寡音。誰人解聽沒絃琴。詩書事業真堪笑。刀尺功名未可欽。不信西天三步遠。焉知東海一杯深。元來佛法無多子。何必嵩山謁少林。

過白登和李正之韻

十年淪落困邊城。今日龍鍾返帝京。運拙不須求富貴。時危何處取功名。騰驥誰識孫陽驥。俊逸深思支遁鷹。客裏逢君贈佳句。知音相見眼偏明。

過天城和靳澤民韻

西征扈從過龍庭。悞得東州浪播名。琴阮因緣真有味。詩書事業拙謀生。咄嗟興廢悲三歎。倏忽榮枯夢一驚。何日解官歸舊隱。滿園松菊小菴清。

過武川贈僕散令人

班姬流落到而今。聞道翻身入道林。歌扇舞裙忘舊業。藥爐經卷半新吟。閑眠白晝三杯醉。靜對青松一曲琴。更看他年棲隱處。蓬山樓閣五雲深。

過燕京和陳秀玉韻五首

回首親朋半土丘。嗟予十稔浪西遊。半生兵革備開眼。一紙功名暗點頭。下士笑予謀計拙。至人知我謂心憂。再行不憚風沙惡。鶴跡雲踪任去留。

其二

君恩猶未報山丘。自笑遐方汗漫遊。客過玉關驚白髮。要遊金谷覓蒼頭。冷官待罪予爲歎。陋巷居貧君不憂。猶望道行澤四海。敢辭沙漠久淹留。

其三

狐死曾聞尚首丘。悲予去國十年遊。崑崙碧磬日落處。渤海西傾天盡頭。君子云亡真我恨。斯文將喪是吾憂。尙期晚節回天意。隱忍龍庭且強留。

其四

餘生不得樂林丘。猶憶丁年選勝遊。幾帙殘編聊暎眼。一張衲被且蒙頭。貔貅已報西門役。柱石猶懷東顧憂。自料荒疏成棄物。菟裘歸計乞封留。

其五

空驚滄海變陵丘。白晝分明夢裏遊。除妄楔邊重出楔。求真頭上更安頭。亨通富貴剛生喜。苦惱悲愁強作憂。斫斷葛藤閑伎倆。繫驢橛子不須留。

還燕京題披雲樓和諸士大夫韻


閣上披雲第一重。離離禾黍漢家宮。窗開青鎖招晴色。簾捲銀鈎揖晚風。好夢安排詩句裏。閑愁分付酒杯中。靜思二十年閒事。聚散悲歡一夢同。

和威寧珍上人韻

十載西遊志已灰。南征又自大梁迴。扶持佛日慚無力。翊贊皇風愧不才。舊約未能林下去。新詩常寄日邊來。何時杖履煙霞裏。一笑伸眉得共陪。

和李德脩韻

明明聖主萬邦君。神武彫弓挽六鈞。時有逸人遊闕下。更無騷客弔江濱。衣冠師古乘殷輅。歷日隨時建夏寅。厚德深仁施萬世。巍然一代典謨新。



湛然居士文集卷四

和呂飛卿韻

舊說飛卿詞翰全風神。渾似晉名賢。吟詩校子三千里。押韻輸君一著先。筆跡查牙森似戟。詞源浩瀚注如川。好詩好字獨余得。准備攜將帝里傳。

再用韻贈國華

學道宗儒難兩全。湛然深許國華賢。儒門已悟如心想。道藏能窮象帝先。似海詞源涵萬水。如鯨飲量吹長川。而今一識君侯面。始信清名不浪傳。

謝飛卿飯一首

一鞭羸馬渡天山。偶到雲川暫解鞍。獨守空房方丈穩。兀無薄酒一盃殘。詩書半蠹絕來客。釜甑生塵笑冷官。賴有覺非道號。憐野拙。長鬚爲我饋盤餐。

再用韻記西遊事

河中西域尋思千城。西遼目爲河中府。花木蔽春山。爛賞東風。縱寶鞍。留得晚瓜。過臘半。藏來秋菓。到春殘。親嘗芭瓖。寧論價。自釀蒲萄。不納官。常歎不才。還有幸。滯留遐域。得佳餐。

再用韻贈搏霄以搏霄成肉罷鷹犬。故以是詩美之。

凜凜風神白玉山。罷遊鷹犬逞金鞍。瑤琴高挂么絃絕。義易頻翻斷簡殘。息念如僧還有髮。忘形見客似無官。伽陀誦罷爐薰冷。一鉢蔬羹當曉餐。

再用韻謝非熊召飯

行盡遐陬萬里山。十年飄泊困征鞍。春風燕語歸心切。夜月猿啼客夢殘。聖世因時行夏正。愚臣嗜數愧春官。誰知賢帥開青眼。掃灑西菴召我餐。

再用韻唱玄

藤條擊破鏡園山。倒跨白牛不鞵鞍。講疏僧歸經卷亂。坐禪人起佛燈殘。爲學未必知爲道。選佛從教勝選官。百事茫然都不念。祇知渴飲與飢餐。

再用韻

雲山疊疊復雲山。瘦馬蘆鞭矮面鞍。瀚海去程千驛遠。揚川歸夢五更殘。塵緣淡處應忘世。逸興濃時好解官。二頃良田何必覓。春山筍蕨亦供餐。

和博霄韻代水陸疏文因其韻爲詩十首

資生無畏濟人深。便見能仁六度心。塵世捐財於苦厄。寒林灑飯拔幽沈。旣臨巨海鈎神物。試叩洪鍾伺好音。今日湛然攀舊例。珠纓休惜挂祇林。

其二

新朝威德感人深。渴望雲霓四海心。東夏再降烽火滅。西門一戰塞煙沈。顯觀頒朔施仁政。佇待更元布德音。好放湛然雲水去。廟堂英俊正如林。

其三

論道西菴愛慕深。推誠片片露丹心。瑤琴莫撫相如引。寶鼎休焚韓壽沈。花氣渾如三角串。松風全似五絃音。清談終日忘歸思。不覺昏鴉噪曉林。

其四

五派分流道愈深。塵中誰識本來心。穿心土碗元無漏。沒底膠船卻不沈。山色水光呈妙相。鳥啼猿嘯露圓音。雲霞活計無求飽。何事狂童一作獨夫作肉林。

其五

前生未了妄緣深。薄宦相縈負夙心。只見淵明能印棗。誰知居士解舟沈。窮通榮辱皆真夢。毀譽稱譏盡假音。中隱冷官閑況味。歸心無日不山林。

其六

居士才微學未深。靜思寧不愧中心。難忘北海千鍾酒。虛負西菴一炷沈。綺語傲矍廣險韻。瑤琴學步鼓純音。此番公案休拈出。祇恐相傳入笑林。

其七

新詩效玉起余深。獨有搏霄我許心。真跡居塵聊俯仰。高名與世任浮沈。同成雅會清茶話。共賞枯桐白雪音。他日歸休約何處。燕山參謁萬松林。云歸依本師。

其八

賢帥文章蘊藉深。雲川傾蓋使同心。掀髯談道檠燈地。抵足論文塞月沈。有眼句中君得意。無絃琴上我知音。乘舟誤捉波中月。莫學當年李翰林。

其九

浪跡西遊歲月深。臨風誰識湛然心。斯文將喪儒風歇。眞智難明佛日沈。佳茗暫嘗轟雪浪。正聲聊作鼓雷音。年來逸興十分切。准備求真入道林。

其十

漁磯舊隱荻花深。塵世寧忘昔日心。兩岸清風單舸穩。滿江明月一鈞沈。飢來煮稻無兼味。醉後鳴榔笑五音。閑臥煙蓑春夢斷。不知潮起沒青林。

寄賈搏霄乞馬乳

天馬西來釀玉漿。革囊傾處酒微香。長沙莫吝西江水。文學休空北海觴。淺白痛思瓊液冷。微甘酷愛蔗漿涼。茂陵要灑塵心渴。願得朝朝賜我嘗。

謝馬乳復用韻二首

生涯簞食與囊漿。空憶朝回衣惹香。筆去餘才猶可賦。酒來多病不能觴。松窗雨細琴書潤。槐館風微枕簟涼。正與文君謀此渴。長沙美漣送子嘗。

其二

肉食從容飲酪漿。差酸滑膩更甘香。革囊旋造逡巡酒。樺器頻傾潑灑觴。頓解老飢能飽滿。偏消煩渴變清涼。長沙嚴令君知否。只許詩人合得嘗。

贈搏霄筆

一札霜毫綴玉枝。管城家世出東涯。遼東鋒端有口能談景。紙上無聲解寫詩。免向江淹求彩管。莫學班氏棄毛錐。贈君聊助文房用。賦就離騷寄我知。

再用韻寄搏霄二首

玉立堂堂紫桂枝。雲川中隱寓天涯。風神蕭散能談道。格調清新解作詩。鄙論我甘蒙醬瓿。予作辨邪論搏霄嘗讀之雄材君已露囊錐。澄澄胸次人誰識。祇有清風明月知。

其二

斫倒松筠節外枝。誰言法界有邊涯。筌蹄意盡閑周易。脂粉情忘束帖詩。去歲生涯猶說劍。今年活計更捐錐。威音那畔真消息。試問瞿曇也不知。

再用韻別非熊

靈木垂芳桂兩枝。非熊佳譽動天涯。倦聽琴阮嫌狂客。飽看經書厭小詩。成德羨君垂竹帛。虛名嗟我類刀錐。會難別易堪惆悵。何日重來誰得知。

愛子金柱索詩

文獻陰功絕比倫。昆蟲草木盡承恩。我爲北闕十年客。汝是東丹九世孫。致主澤民宜務本。讀書學道好窮源。他時輔翊英雄主。珥筆承明策萬言。案文正子耶律鑄有雙溪醉隱集

贈買非熊搏霄一首

二陸尊賢擅美聲。月評難弟亦難兄。西菴揮麈談三界。北觀攜琴論五行。休道酒仙無太白。須知詩伯有飛卿。奇人輻輳君門下。占斷西州好士名。

和李振之二首

半紙功名未可呈。無心何處不安生。十年滄海塵空起。百歲黃梁夢乍驚。舊徑旣荒松菊在。丹誠不變鬢髯更。年來漸有昇平望。每恨栖雞半夜鳴。

其二

酷憶遙山寸碧呈。歸耕何日樂餘生。蠅營得失都無念。狗苟榮枯總若驚。客夢覺來家萬里。詩聲吟罷月三更。溟鴻本有冲天志。直待三年再一鳴。

非熊兄弟餞予之燕再用振之韻

藝逢知己敢相呈。幾夜論文喜氣生。筆陣我甘三舍退。詩壇君使四筵驚。公初傾蓋冬將半。予擬乘軺歲欲更。特與幽人助行色。一聲寒角隔煙鳴。

和連國華三首

歲月如流走兔烏。求真可惜費工夫。深源到底忘根柢。至道元來貴拙愚。真理不空宜具眼。太虛無面莫添鬚。直須穩坐長安好。切忌途中認畫圖。

其二

安得長繩繫日烏。天涯老卻舊耕夫。林泉放曠輸君樂。沙漠滄留笑我愚。虎戰每驚涉虎尾。龍飛不得採龍鬚。文章畢竟成何事。富貴原知不可圖。

其三

月上南枝啼夜烏。悲歌彈缺歎征夫。愁邊逐日看周易。夢裏隨風謁太愚。縱有征塵遮兩眼。卻無慚色上三鬚。真人已應千年運。佇待河清再出圖。

連國華餞予出天山因用韻

十年不得舞衣斑。一憶江南膽欲寒。黃犬候來秋自老。白雲望斷信何難。軍中得句常橫槊。客裏傷心每據鞍。遊子未歸情幾許。天山風雪正漫漫。

還燕和美德明一首

紛紛世態眩榮華。靜裏乾坤本不譁。琴阮生涯聊自適。詩書事業更何加。但期聖德澤天下。敢惜餘生寄海涯。可笑燕然舊遊客。倚樓悲我客程賒。

又和橙子梅韻

可笑人心自短長。誰知箇事不囊藏。化成橙子舌耽味。幻作梅英鼻覺香。金卵似真隨變滅。冰魂元假卻芬芳。唯心識破同根旨。何必臨風再舉揚。

和竹林一禪師韻

富貴無心羨五侯。隨時俯仰浪西遊。斷無事業留千古。靜看英雄橫九州。白雁縱傳遐域信。黃華卻負故園秋。蒼生未濟歸何益。一見吾山一度羞。

西菴上人住夏禁足以詩戲之

觸處無非選佛堂。西風何處避春光。郡人無足充千界。大地絕塵塞四方。舉步踢翻滄海月。轉身踏破白雲鄉。快須擊碎閑家具。說向西菴笑一場。首句一作都盧。只是一禪牀。

送韓浩然用馬朝卿韻

開懷樽俎笑談傾。未暇論文君已行。富貴塗亨渠易致。詩篇韻險我難賡。已成傾蓋金蘭友。安用沾襟兒女情。准擬秋深逐歸騎。一樽濁酒遠相迎。

戊子喜雨用馬朝卿韻二首

酷暑炎炎正不禁。一聲雷震讓輕陰。救回南畝十分旱。變作西郊三日霖。遍野桑疇青幄密。連天菱壠綠雲深。王孫喜雨登樓宴。貰酒黃壚解帶金。

其二

生死輪迴苦莫禁。不如學道惜分陰。舡乘沒底聊相渡。雲出無心強作霖。不死鄉中靈草異。長生劫外紫雲深。茅山道士真堪笑。虛費工夫煉五金。云似譏勞山道邱真人處機。

戊子餞熊仍以呂望磻溪圖爲贈

昨夜白麻降日邊。文章領袖遠朝天。遙思御座分香賜。更想龍庭命席前。白面書生酬夙志。黑頭邊帥領新權。非熊應笑非熊老。八十猶然釣渭川。

和宋子玉

勇將謀臣滿玉京。吾儕袖手待昇平。荆榛至道常嗟我。狂石中原豈捨卿。日下有人叨玉食。雲中高士振詩鳴。思君興味如梅渴。海印那能知此情。海印道號也。

和李邦瑞韻二首

隴右奇才冠士林。萬言良策起予深。澤民致主傾丹懇。邀利沽名非素心。我伴簿書無好思。君陪風月有閒吟。他年共納林泉下。茅屋松窗品正音。

其二

謝君千里遠相尋。傾蓋交歡氣義深。筆硯生涯一作書劍因緣無異志。金蘭氣味本同心。揮毫解賦登高句。緩軫能彈對竹琴。此去鱗鴻知有使。臨風無吝寄芳音。

和邦瑞韻送奉使之江表

駟騎翩翩出玉京。金符一插照人明。莫忘北闕龍飛志。要識南陔鳩舌情。布袖來朝無騎乘。錦衣歸去不徒行。昇仙橋畔增春色。郡守傳呼接長卿。

和王正之韻

洪才碩德兩相宜。雅操真堪據鳳池。富貴未終隨夢變。功名何在值時危。奇詞解吐萬言策。敏思能吟七步詩。但倩東風輕着力。摩天鵬翼若雲垂。

其二

自慙不解告嘉謀。十載韜藏僻一隅。巨海洪深容棄物。新朝寬厚用愚夫。亨時嘉會千年少。聖主雄才萬代無。文物規模皆法古。佇看明詔起真儒。

其三

皇天輔德本無親。樂道奚憂甑滿塵。道泰小人常屏斥。時屯君子自經綸。浮雲富貴原千變。昨夢繁華得幾春。遇不遇兮皆是命。吾儕休羨錦衣新。楞嚴經生死涅槃都如昨夢

祝忘憂居士壽

酷似燕山寶十郎。靈椿初老桂枝芳。兩朝厚遇垂千稔。一日清明滿四方。玉佩丁東照蘭省。斑衣搖曳悅萱堂。他年參到平常處。便是長生不老鄉。

蠟梅二首

越嶺仙姿迥異常。洞庭春染六銖裳。枝橫碧玉天然瘦。蕾破黃金分外香。反笑素英渾淡抹。卻嫌紅豔太濃妝。臨風浥此薔薇露。醉墨淋漓寄渺茫。

其二

冰姿夢裏慕姚黃。滴蠟凝酥別樣妝。生妬白紅來濃淡。懶施朱粉自芬芳。寒英深染薔薇露。冷豔微燼篤耨香。受用清絕恣吟遠。惜花一念未全忘。

謝禪師口公寄閭山紫玉

方外閑人天一隅。因風寄我紫雲腴。起予妙理欺歡伯。滌我枯腸壓酪奴。琥珀精神渾彷彿。葡萄滋味較錙銖。禪師遠棄桃源路。日日尋山摘此無。

和鄭壽之韻

聖主龍飛日月新。微才忝預股肱臣。民財已阜錢如水。駟騎長閑塞不塵。威鎮西陲輸定遠。宴開東閣暮平津。何如收拾琴書去。林下衣冠作舜民。

寄沙井劉子春

寄語沙城老故人。別來贏得鬢邊塵。街蹄踏破關中月。新句吟空河表春。名利相縈予有歎。琴書自樂子非貧。何時策杖君家去。再試淵明漉酒巾。

和琴士苗蘭韻

徒步南來愛陸機。公餘邂逅似相期。高山韻吼千巖木。流水聲號半夜陂。聖德宛如歌治化。南風猶似撫瘡痍。曲終聲散無人會。撩我高吟一首詩。

和人韻二首

西域諸番古未知。來生遠過禹封畿。名山准擬金泥檢。古塞無勞羽檄飛。世樂詎能敵靜樂。蓑衣到底勝朝衣。年來痛憶閭山景。月照茆亭水一圍。

其二

干戈未斂我傷神。自恨虛名悞此身。否德詎能師百辟。微才安可步三辰。箕裘謾歎青毡舊。勳業空驚白髮新。安得夔龍立廊廟。扶持堯舜濟斯民。

和武川嚴亞之見寄

當年西域未知名。四海無人識晉卿。扈從纓輿三萬里。謨謀鳳闕九重城。衣冠異域真余志。禮樂中原乃可榮。何日功成歸舊隱。五湖煙浪樂餘生。

其二

亞之平水久馳名。亞之本絳陽人。今寓居武川。訓童爲生。壯歲題橋慕長卿。厭世德風如偃草。驚人詩價比連城。功名未立不爲嫌。仁義能行亦足榮。此理齒微人不識。莫言儒道拙謀生。

其三

今年又得亞之詩。每歎風雲會遇遲。拙運且淹童子役。雄才宜作帝王師。羨君筆下揮千字。知子胸中蘊六奇。靜對西風和新句。淒然南望動深思。

其四

誤忝綸恩斗印懸。乏才羞到玉墀前。劾奸封事夢猶諍。許國忠誠老益堅。仁政發從天北畔。捷音來自海西邊。從今率土霑王化。禮樂車書共一天。

其五

寥落龍沙寄此生。情鍾我輩豈無情。參商管鮑賢朋友。南北機雲好弟兄。蓮葉飄香思晚浦。梅花飛雪夢春城。故園日夜歸心切。未濟斯民不敢行。

己丑過雞鳴山

三年四度過雞鳴。我僕徘徊馬倦登。寂寞柴門空有舍。蕭條山寺靜無僧。殘花濺淚千程別。啼鳥傷心百感生。今古興亡都莫問。穹廬高臥醉騰騰。

寄天山周敬之

當年傾蓋識君初。爛飲天山駐使車。秋去安仁空有賦。雁來公瑾又無書。林巒紅葉知人老。籬落黃花亦我疏。爲向天涯道岑寂。強吟新句附雙魚。

邦瑞乞訪親因用其韻

干戈擾擾戰交侵。一紙安書值萬金。凡子生還愁未解。豈堂仙去恨尤深。涕零倚木西風怨。腸斷聞鈴夜雨淋。養老送終真有憾。號天如割望雲心。

和李邦瑞韻

趙老名言本兩忘。案趙老趙州和尙庭前空有柏蒼蒼。案蘇前柏子是西來意西江吸盡慵開口。北載添來亦括囊。明月清風何所礙。落花流水不相妨。須知居士元無病。底用千年舊藥方。

過清源贈法華禪師

汾水禪師箇裏人。杖藜尋我過清源。半盂紅菓情何厚。一盞青燈話細論。山水景中君適意。兵戈堆裏我消魂。他年相約雲深處。松竹蕭蕭靜掩門。

贈五雲長老

高岡登陟馬玄黃。落日西風過晉閭。道士忻迎捧林菓。儒冠遠迓挈壺漿。五臺強壯頭如雪。開化輕鞍鬢未霜。誰會二師深密意。趙州元不下禪牀。

湛然居士文集卷五

贈蒲察元帥七首

閑騎白馬思無窮。來訪西城綠髮翁。元老規模妙天下。錦城風景壓河中。花開杷欖芙渠淡。酒泛葡萄琥珀濃。痛飲且圖容易醉。欲憑春夢到盧龍。

其二

積年飄泊困邊塵。閑過西隅謁故人。忙喚賢姬尋器皿。便呼遼客奏箏箏。葡萄架底葡萄酒。杷欖花前杷欖仁。酒釀花繁正如許。莫教辜負錦城春。

其三

主人知我怯金觴。特爲先生一改堂。細切黃橙調蜜煎。重羅白餅糝糖霜。几盤綠橘分金饌。一碗清茶點玉香。明日辭君向東去。這些風味幾時忘。

其四

使君排飮宴南溪。不枉從君鳥鼠西。春苑旋澆濃鹿尾。臘糟微浸軟駝蹄。絲絲魚膾明如玉。屑屑雞生爛似泥。秦泰西庖丁亦善作雞泥。白面書生知此味。從今更不嗜黃齏。

其五

筵前且盡主人心。明燭厭厭飲夜深。素袖佳人學漢舞。碧髻官妓撥胡琴。案蒙古人呼爲扣肯兒輕分茶浪飛香雪。旋擘橙盃破輦金。五夜歡心猶未已。從教斜月下疎林。

其六

主人開宴醉華胥。一派絲篁沸九衢。踏紫葡萄垂馬乳。輕黃杷攬燦牛酥。金波泛蟻斟歡伯。雪浪浮花點酪奴。忙裏偷閑誰若此。西行萬里亦良圖。

其七

閑乘羸馬過蒲華。又到西陽太守家。瑪瑙瓶中簪亂錦。琉璃鍾裏泛流霞。品嘗春色批金橘。受用秋香割木瓜。此日幽歡非易得。何妨終老住流沙。

庚辰西域清明

清明時節過邊城。遠客臨風幾許情。野鳥閒關難解語。山花爛漫不知名。葡萄酒熟愁腸亂。瑪瑙盃寒醉眼明。遙想故園今好在。梨花深院鷓鴣聲。

用鹽政姚德寬韻

乃祖開元柱石臣。雲孫髣髴玉麒麟。從來德美與人口。此日恩沾聖世春。欲草雁書學北海。未開東閣愧平津。而今且信調羹手。好看沙隄繼舊塵。

用昭禪師韻

銀鈞全似趙周臣。詩比黃華格調新。道眼點開言外句。禪心說破劫前春。山中跛擊無爲客。林下逍遙自在人。不犯清波垂釣處。臥龍隨手出龍津。

其二

聖德洋洋雨露零。蟲魚草木總歡榮。妖氛斂禡堯風扇。外道消聲佛日明。

和薛正之見寄

賢臣聖主正時遭。建策龍庭莫憚勞。大壑波深翻巨鯉。高空風順遇鴻毛。一番制度新才術。百代文章舊雅騷。勉力自強宜不息。功名何啻泰山高。

乞扇

屈指圓裁白玉盤。秦風幽四城布幽人自翦素琅玕。全勝織女絞綃帕。高出湘妃玳瑁斑。座上清風香細細。懷中明月淨團團。願祈數柄分居士。顛倒陰陽九夏寒。

壬午西域河中遊春十首

幽人呼我出東城。信馬尋芳莫問程。春色未如華藏富。湖光不似道心明。土牀設饌談玄旨。石鼎烹茶唱道情。世路崎嶇太尖險。隨高逐下坦然平。云。竟是寒山子擊壤老人矣。

其二

三年春色過邊城。萍跡東歸未有程。細細和風紅杏落。涓涓流水碧湖明。花林啜茗添幽興。綠畝觀耕稱

野情何日要荒同入貢。普天鐘鼓樂清平。

其三

春雁樓邊三四聲。東天迴首望歸程。山青水碧傷心切。李白桃紅照眼明。幾樹綠楊搖客恨。一川芳草惹羈情。天兵幾日歸東關。萬國歡聲賀太平。

其四

河中二月好踏青。案正建牙河中府時。折入俄國爲斜米斯干會。且莫臨風嘆客程。溪畔數枝紅杏淺。牆頭半點小桃明。誰知西域逢佳景。始信東君不世情。圓沼方池三百所。澄澄春水一時平。

其五

二月河中草木青。芳菲次第有期程。花藏徑畔春泉碧。雲散林梢晚照明。含笑山桃還似識。相親水鳥自忘情。遐方且喜豐年兆。萬頃青青麥浪平。

其六

異域春郊草又青。故園東望遠千程。臨池嫩柳千絲碧。倚檻天桃幾點明。丹杏笑風真有意。白雲送雨太無情。歸來不識河中道。春水潺潺滿路平。

其七

四海從來皆弟兄。西行誰復歎行程。既蒙傾蓋心相許。得遇知音眼便明。金玉滿堂遠素志。雲霞千頃適

高情廟堂自有夔龍在。安用微生措治平。案五句老子語。

其八

寓跡塵埃且樂生。垂天六翮放鵬程。無緣未得風雲會。有幸能瞻日月明。出處隨時全道用。窮通逐勢歎人情。憑誰未發豐城劍。一掃妖氛四海平。

其九

不如歸去樂餘齡。百歲光陰有幾程。文史三冬輸曼倩。田園二頃憶淵明。賓朋冷落絕交分。親戚團圓樂話情。植杖耘耔聊自適。笑觀南畝綠雲平。

其十

衰翁老矣倦功名。繁簡行軍笑李程。案李廣程不識。牛糞火熟石炕暖。蠟連紙破瓦窗明。水中漉月消三毒。火裏生蓮屏六情。野老不知天子力。謳歌鼓腹慶昇平。

遊河中西園和王君玉韻四首

萬里東皇不失期。園林春老我來遲。漫天柳絮將飛日。遍地梨花半謝時。異域風光特秀麗。幽人佳句自清奇。臨風暢飲題玄語。方信無爲無不爲。

其二

清明出郭赴幽期。千里江山麗日遲。花葉不飛風定後。香塵微斂雨餘時。彫鑿冰玉詩尤健。揮掃龍蛇字

愈奇好字好詩獨我得。不來廣和擬胡爲。

其三

異域逢君本不期。湛然深恨識君遲。清詩厭世光千古。逸筆驚人自一時。字老本來遵雅淡。吟成元不尚新奇。出倫詩筆服君妙。笑我區區亦強爲。

其四

風雲佳遇未能期。自是魚龍上釣遲。巖穴潛藏難避世。案邵子詩天下有名難避世塵鷲俯仰且隨時。百年富貴真堪歎。半紙功名未足奇。伴我琴書聊自適。生涯此外更何爲。

河中遊西園四首

河中春晚我邀賓。詩滿雲牋酒滿巡。對景怕看紅日暮。臨池羞照白頭新。柳添翠色侵凌草。花落餘香著莫人。且著新詩與芳酒。西園佳處送殘春。

其二

河中風物出平倫。閑命金蘭玉笋巡。半笑梨花瓊臉嫩。輕顰楊柳翠眉新。銜泥紫燕先迎客。偷蕊黃蜂遠趁人。日日西園尋勝槩。莫教辜負客城春。

其三

幾年萍梗困邊城。閑步西園試一巡。圓沼印空明鏡瑩。芳沙藉地翠茵新。幽禽有意如留客。野卉多情解

笑人屈指知音今有幾。與誰同享瓮頭春。

其四

金鼓鑾輿出隴秦。驅馳八駿又西巡。千年際會風雲異。一代規模宇宙新。西域兵來擒僞主。東山詔下起幽人。股肱元首明良世。高拱垂衣壽萬春。

河中春遊五首案和邱長春道士

西胡尋斯干有西域棧構室未全終。又見頽垣遶故墟。綠苑連延花萬樹。碧堤回曲水千重。不圖舌鼓談非馬。甘分躬耕學臥龍。糲食粗衣聊自足。登高舒嘯樂吾慵。文田案西遊記云師住算灘氏新宮暇日出壩塔高不見十三級山厚已過千萬重秋日在郊猶放象夏雲無雨不從龍嘉蔬麥飯葡萄酒飽食安眠養素慵此五首皆和邱處機元韻也寒簞灘乃痕都中印度君號。

其二

異域河中春欲終。園林深密鎖頽墉。東山雨過空青疊。西苑花殘亂翠重。杷攬碧枝初着子。葡萄綠架已纏龍。等閒春晚芳菲歇。葉底翩翩困蝶慵。

其三

坎止流行以待終。幽人射隼上高墉。窮通世路元無事。艱險機關有幾重。百尺蒼枝藏病鶴。三冬蟄窟閉潛龍。琴書便結忘言友。沼圃耘蔬自養慵。

其四

西域渠魁運已終。天兵所指破金墉。崇朝驛騎馳千里。一夜捷書奏九重。鞭策不須施犬馬。廟堂良算足夔龍。北窗高臥薰風裏。儘任他人笑我慵。

其五

重玄叩擊赦年終。天道難窺萬仞墉。舊信不來青鳥遠。故山猶憶白雲重。自知勳業輸騶鳳。且學心神似老龍。案老子猶龍如此用太割截。忙裏偷閑誰似我。兵戈橫蕩得疎慵。

過閭居河四首案亦和邱長春

河冰春盡水無聲。靠岸釣魚羨擊冰。乍遠南州如夢蝶。暫遊北海若飛鵬。隋堤柳絮風何處。越嶺梅花信莫憑。試暫停鞭望西北。迎風羸馬不堪乘。案四遊記出沙陀至魚兒深詩北陸那寒自古稱沙陀三月尚陵南望去無愁我今返學盧彭志六合窮觀最上乘。

其二

北方寒凜古來稱。親見陰山凍鼠冰。戰鬪簷楹翻鐵馬。窮通碁勢變金鵬。五車經史都無用。一鶚書章誰可憑。安得衝天揚子志。雲輿六取信風乘。

其三

一聖龍飛德足稱。其亡凜凜涉春冰。千山風烈來從虎。萬里雲垂看舉鵬。堯舜微猷無闕失。良平妙算足依憑。華夷混一非多日。浮海長桴未可乘。

其四

自媿聲名無可稱。賢愚混世炭和冰。竊鹽倉鼠初成蝠。噴浪溟鯤未化鷗。賣劍學耕食粗造。買山歸老價難憑。秋江月滿西風輒。何日扁舟獨自乘。

感事四首 案亦和長春道人

富貴榮華若聚瀉。浮生渾似水東流。仁人短命嗟顏氏。君子懷疾歎伯牛。未得鳴珂遊帝闕。何能騎鶴上揚州。幾時擺脫閑韁鎖。笑傲煙霞永自由。案西遊記。抵陸局河南岸。行十有六日。又行十日。夏至。漸見大風。煙不斷。水長流。如何造物開天地。到此令人放馬牛。飲血茹毛。同上古。義冠結髮異中州。聖賢不得垂文教。歷代縱橫只自由。此四首並用此韻。

其二

當年元擬得封侯。一誤儒冠入士流。赫赫鳳鸞捐腐鼠。區區蠻觸戰蝸牛。未能離欲超三界。必用麾旌混九州。致主澤民元素志。陳書自薦我無由。

其三

得不欣欣失不憂。依然不改舊風流。深藏鳳壁無投鼠。好蓄龍泉候買牛。山寺幽居思少室。梅花歸夢遶揚州。萱堂溫清十年闕。負米供親媿仲由。

其四

人不知予我不尤。濯纓何必揀清流。良材未試聊耽酒。利器深藏俟割牛。舊政欲傳新令尹。新朝不識舊

荊州眉山云邁歸商路。痛恪新詩寄子由。

壬午元日二首

西域風光換。東方音問疎。屠蘇聊復飲。鬱墨不須書。舊歲昨宵盡。新年此日初。客中今十載。孀母信何如。

又

萬里西征出玉關。詩無佳思酒瓶乾。蕭條異域年初換。坎軻窮途臘已殘。身通碧雲遊極樂。手遮東日望長安。年光迅速如流水。不管詩人兩鬢斑。

過沁園有感

昔年曾賞沁園春。今日重來迹已陳。水外無心修竹古。雪中含恨瘦梅新。垣頽月榭經兵火。草沒詩碑覆劫塵。羞對覃懷昔時月。多情依舊照行人。

用劉正叔韻

參叩松軒積有年。光塵融洩一愚賢。視民每羨如芻狗。治國常思烹小鮮。只道牛邊休執杖。誰知琴上亦忘絃。浩然稍異香山老。不學空門不學仙。

西域家人輩釀酒戲書屋壁

西來萬里尙騎驢。旋借葡萄釀綠醕。司馬撩衣親滌器。文君挽袖自當爐。元知沽酒業緣重。可奈調羹手段無。古昔英雄初未遇。生涯或亦隱屠沽。

西域從王君玉乞茶因其韻七首

積年不啜建溪茶。心竅黃塵塞五車。碧玉甌中思雪浪。黃金碾畔憶雷芽。盧仝七碗詩難得。諗老三甌夢亦賒。敢乞君侯分數餅。暫教清興遶煙霞。

其二

厚意江洪絕品茶。先生分出滿輪車。雪花灑灑浮金葉。玉屑紛紛碎白芽。破夢一杯非易得。搜腸三椀不能賒。瓊甌啜罷酬平昔。飽看西山插翠霞。

其三

高人惠我嶺南茶。爛賞飛花雪沒車。是日作茶會值雪玉屑三甌烹嫩蕊。青旗一葉碾新芽。頓令衰叟詩魂爽。便覺紅塵客夢賒。兩腋清風生坐榻。幽歡遠勝泛流霞。

其四

酒仙飄逸不如茶。可笑流涎見麴車。玉杵和雲舂素月。金刀帶雨翦黃芽。試將綺語求茶飲。特勝春衫把酒賒。啜罷精神清淡無寐。塵囂身世便雲霞。

其五

長笑劉伶不識茶。胡爲買鋪謾隨車。蕭蕭暮雨雲千頃。礧礧春雷玉一芽。建郡深甌吳地遠。金山佳水楚江賒。紅爐石鼎烹團月。一椀和香吸碧霞。

其六

枯腸搜盡數盃茶。千卷胸中到幾車。湯响松風三昧手。雪香雷震一槍芽。滿囊垂賜情何厚。萬里攜來路更賒。清興無涯騰八表。騎驃踏破赤城霞。

其七

啜罷江南一碗茶。枯腸歷歷走雷車。黃金小碾飛霞屑。碧玉深甌點雪芽。筆陣陳兵詩思勇。睡魔捲甲夢魂賒。精神爽逸無餘事。臥看殘陽補斷霞。

和冲霄韻五首

垂亡聖道賴君明。坎軻休嗟道不行。須信詩魔降筆陣。好將酒戰破愁城。滔滔秋水如人志。薄薄閑雲似世情。一舉冲霄知有日。垂天萬里看鵬程。

其二

古今興廢不堪聽。寵辱都如夢一驚。韜略欣然推後進。琴書足以了餘生。既知物物頭頭是。誰問朝朝暮暮情。散盡迷雲何所有一輪秋月普天明。

其三

天涯索寞正窮秋。衰草寒煙無盡頭。葉底哀蛩空促織。雲間征雁祇供愁。酪漿滿引澆羊胛。糲食隨緣薦鹿脩。試暫迴光樂真覺。人閒萬法一時收。祇供愁一作謾書愁。

其四

星星華髮鏡中驚。好賦歸興接浙行。重位寧貪高一品。故園無憚遠千程。晴天花絡春山色。落日松和秋水聲。無恙閩峯三百寺。遊遊吟嘯老餘生。

其五

古木殘陽映矮崗。雁行天際寫秋光。霜蓑帶雨添愁色。晚菊和風送冷香。濁酒三年渾未試。黃糧九月得初嘗。龍沙且喜身強健。南望幽人天一方。

又一首

不見高陽舊酒徒。臨風惆悵幾踟躕。無窮真味思焦尾。有限浮生歎白駒。德望服人輸一陸。案平吳利在陸指陸文章重世媿三蘇。散材潦倒渾無用。空作昂藏一丈夫。

和冲霄十月桃花韻二首

桃源仙子憶劉郎。不憚嚴冬雨雪涼。紅雨已先初夏落。妖魂重對小春芳。冷侵綠萼剛舒臉。寒徹朱衣強噴香。誰向花園慰蕭索。數枝無語映斜陽。

其二

春生秋殺乃天常。來往推遷炎與涼。晚節正當陰氣塞。窮冬忽見小桃芳。豈知木棗能成實。僭與江梅敢並香。自媿備員調鼎鼎。不知何事謬陰陽。

用薛正之韻

無德慙爲天下先。湖山歸計好加鞭。霜深尙有籬邊菊。風勁全無葉底蟬。三弄瑤琴歌素月。一樽濁酒醉蒼煙。鳳池分付夔龍去。萬頃瀟湘屬湛然。

湛然居士文集卷六

和景賢見寄

龍岡參透後。三三髻髯前。人何所慚。妙筆照人驚老字。新詩入手想清談。塵中名利予難出。夢裏榮華君不耽。准擬歸時便歸去。閩山珍重舊禪庵。珍重一作好在。

用劉潤之乞冠韻

隱逸養幽慵。飄蕭兩鬢蓬。角巾折暮雨。醉帽落秋風。避暑挂石上。啣盃漉酒中。忘機任真率。露頂向王公。

西域河中十詠

寂寞河中府。連蔓及萬家。葡萄親釀酒。杷攬看開花。飽啖雞舌肉。分餐馬首瓜。土產瓜大如馬首。人生唯口腹。何礙過流沙。

其二

寂寞河中府。臨流結艸廬。開樽傾美酒。擲網得新魚。有客同聯句。無人獨看書。天涯獲此樂。終老又何如。

其三

寂寞河中府。遐荒僻一隅。葡萄垂馬乳。杷攬燦牛酥。釀酒無輸課。耕田不納租。西行萬餘里。誰謂乃良圖。

其四

寂寞河中府。生民屢有災。避兵開邃穴。防水築高臺。六月常無雨。三冬卻有雷。偶思禪伯語。不覺笑顏開。

其五

寂寞河中府。頽垣繞故城。園林無盡處。花木不知名。南岸獨垂釣。西疇自省耕。爲人但知足。何處不安生。

其六

寂寞河中府。西流綠水傾。衝風磨舊麥。西人作磨。風動機軸以磨麥。懸碓杵新粳。西人皆懸杵以舂。春月花渾謝。冬天草再生。

優游聊卒歲。更不望歸程。

其七

寂寞河中府。清歡且自尋。麻牋聊寫字。葦筆亦供吟。傘柄學鑽笛。宮門自斲琴。臨風時適意。不負昔年心。

得故宮門。堅木三尺。許斲爲琴。有清聲。

其八

寂寞河中府。西來亦偶然。每春忘舊閏。隨月出新年。強策渾心竹。難穿無眼錢。異同無定據。俯仰且隨緣。

西人不計閏。以十二月爲歲。有渾心竹。其金銅芽錢。無孔郭。

其九

寂寞河中府。聲名昔日聞。城隍連吠畝。市井半邱墳。食飯秤斤賣。金銀用麥分。生民怨來後。簞食謁吾君。

其十

寂寞河中府。遺民自足糧。黃橙調蜜煎。白餅糝糖霜。漱旱河爲雨。無衣墉種羊。一從西到此。更不憶吾鄉。

西域和王君玉詩二十首

年來深欲買湖山。貧病難酬絹五千。歸去不從陶令請。知音未遇孟嘗賢。排愁器具思歡伯。送老生涯乏貨泉。雅有詩魂常伴我。閒吟陶寫箇中玄。

其二

一髮燕然曉日邊。寒雲疊疊亂山千。萬重沙漠猶逢友。十室荒村亦自賢。留客芳樽思北海。驚人奇語憶南泉。思量萬事多渾錯。勉力輪鎚好扣玄。

其三

君侯乘興寫佳篇。我得瓊琚價倍千。妙筆一揮能草聖。新詩獨惠過稱賢。半瓶濁酒斟瓊甃。七椀清茶泛玉泉。萬里西行真我幸。逢君時復一談玄。

其四

健羨金鞍美少年。盈門劍客列三千。須知執德元非德。況是無賢敢自賢。不解彎弓射石虎。誰能擊劍躍龍泉。黑頭勳業今何在。壯歲功成愧謝玄。

其五

雲龍相感本乎天。會合君臣歲一千。西伯已亡誰老老。卜商何在肯賢賢。鷓鴣未必輕餐鼠。蚯蚓猶如下

飲泉巧拙是非無定據。到頭誰解辨黃玄。

其六

奔走紅塵積有年。深思雪澗竹竿千。誰能世上全三樂。案榮啓期三樂好向林閒伴七賢。筆下風生詩似錦。瓮頭春漲酒如泉。詩成酒罷寂無事。淨几明窗誦太玄。

其七

竹徑風來自破禪。修篁青劍葉垂千。爛吟風月元無礙。高臥煙霞未是賢。迷處無由逃絆鎖。悟來何處不林泉。縱橫觸目皆真理。坐臥經行鳥路玄。案永壽云見道忘山人閒亦寂

其八

無滅無生不論年。誰誇桃熟歲三千。休將真宰陪司命。星名莫使明星動進賢。星名有道不妨居鬧市。無心奚礙酌貪泉。何能遠遯塵囂去。且向人閒養素玄。

其九

從他豪俊領時權。指顧貔貅數百千。碌碌餘生甘養拙。明明聖代豈遺賢。且圖混世啜醜酒。勿謂濯纓棄濁泉。莫道無爲云便了。有爲何處不逢玄。

其十

浮生瞬息度流年。唐漢興亡不半千。清潔採薇輸二子。英雄濟世有三賢。未能海上尋芝草。且向塵中泛

醴泉醉與陶陶略相似。無何鄉裏亦通玄。

其十一

成敗興亡事可憐。勞生擾擾幾千千。調心莫若先離欲。治世無如不尚賢。案老子不尚賢使民不爭。小褚豈能懷大器。
短繩那得汲深泉。案莊子引管仲云。豬小不可以懷大。繩短不可以汲深。直須箭透威音外。不用無爲不用玄。案六祖壇經或音王外道。

其十二

得得清歡樂自然。不辭去國客程千。翻騰舊案因君玉。唱和新詩有景賢。每遇開樽邀素月。常因盥手掬寒泉。衰翁自揣何多幸。未死中間樂此玄。

其十三

幾回午枕不成眠。幽鳥關關近數千。安世不知安世計。隱居常慕隱居賢。幾行石榻圍松徑。一簇茅齋繞澗泉。挂起西軒風似水。閒將羲易索幽玄。

其十四

農隱生涯樂自天。麩畦香壟僅盈千。蠅營累世真堪笑。狗苟勞生未若賢。帶月扶犁耕暮野。衝雲荷鋤撥春泉。耘籽餘暇蓬窗底。獨抱遺經考至玄。

其十五

閑閑箇事本明圓。一念纔興路八千。生死既知皆是幻。功名猶戀豈能賢。興來暢飲斟晴月。醉後高歌枕碧泉。觸處逢渠何所礙。不玄玄處亦玄玄。

其十六

物物頭頭總是禪。觀音應現化身千。杜門宴坐無傷道。遯世幽居也是賢。祇爲看山開翠竹。偶因煎茗汲清泉。靈雲檢點真堪笑。不見桃花不悟玄。

其十七

蓑衣狂脫暮江邊。案錢杲朴詩狂脫酒家春醉後咏蓑衣也。一醉寧論價十千。老矣馮唐何所往。歸與陶令最爲賢。靈苗細細初盈圃。春水涓涓漸滿泉。酒醒夢迴無箇事。澄心忘慮體三玄。

其十八

九重闔闔列羣官。曳珮鳴珂及萬千。雲水儉將屬野叟。功名迴施與時賢。好憑定慧超三界。不戀輪迴沒九泉。迅速光陰莫虛度。回光返照靜參玄。

其十九

不學經書不說禪。云自謂不說禪。吾不信也。誰論芥子納三千。忘形詩句追先覺。適意琴書慕昔賢。白雪陽春吟雅調。高山流水奏鳴泉。平生受用元無盡。參透真空未是玄。

其二十

飯生詩。僻慕詩仙。謂君玉也。亂綴狂吟數百千。淺陋妄言唾俊哲。清新綺語愧先賢。摧殘吟鬢星星髮。傾倒詞源渾渾泉。韻險言窮無可說。祇憑此句露深玄。

和楊彥廣韻

三臺須要趁琵琶。知己相逢兩會家。雌斲勿傷石內玉。縱橫須放火中花。探玄潭是三盃酒。清興何消七椀茶。誰識湛然端的處。差徭隨分納些些。

題平陽李君實此君軒

環榻森森蔭好涼。此君風味詎能忘。虛心悄悄生來勁。直節亭亭老更剛。雖與蓬蒿均雨露。本同松菊傲風霜。主人雅志元堪尙。物以羣分類以方。

西域有感

落日城頭鴉亂啼。秋風原上馬頻嘶。雁行南去瀟湘北。萍跡東來烏鼠西。百尺棟梁誰着價。三春桃李自成蹊。功名到底成何事。爛飲玻璃醉似泥。

早行

馬駝殘夢過寒塘。低轉銀河夜已央。雁跡印開沙岸月。馬蹄踏破板橋霜。湯寒卯酒兩三盞。引睡新詩四五章。古道遲遲四十里。千山清曉日蒼涼。

自敘

信流乘坎過西天。鉢裏吞針亦偶然。案吞針姚秦法師鳩摩羅什事。只道一花剛點額。不知二子暗登肩。既來此世難逃數。且應前生未了緣。俗眼見時難放過。并賊陳首萬松軒。云。首上書自首過於萬松老人也。又云。胸中時時有本師在。

西域元日

凌晨隨分辦樽罍。辟疫屠蘇飲一杯。迂叟不令書鬱壘。癡兒剛要畫鍾馗。新愁又逐東風至。舊信難隨春日來。又向邊城添一歲。天涯飄泊幾時回。

西域寄中州禪老士大夫一十五首

恨離師太早。淘汰未精。起乳慕之念。作是詩以寄之。

吾師道化震清都。奔走絕塵我不如。近日虛傳三島信。幾年不得萬松書。宗門淘汰猶嫌少。習氣薰蒸尙未除。惆悵天涯淪落客。臨風不是憶鱸魚。

蒲華城夢萬松老人

辛巳閏月。蒲華城夢萬松老人。法語諄諄。覺而猶見其髣髴。作詩以寄。

華亭髣髴舊時舟。又見吾師釣直鉤。只道夢中重作夢。不知愁底更添愁。曾參活句垂青眼。未得生侯已白頭。撇下塵囂歸去好。誰能騎鶴上揚州。

寄巨川宣撫

案巨川王繼也。元史有傳。

巨川宣撫文武兼資。詞翰俱妙。陰陽歷數無所不通。嘗舉法界觀序。比宗門之捷徑也。今觀瑞應

鶴詩。巨川首唱焉。歎其多能。作是詩以美之。

歷數興亡掌上。看提兵一職。領清官馬前。草詔珠璣潤。紙上揮毫風雨寒。昔日談禪明法界。而今崇道倡香壇。諸行百務君都占。倒飯生何處安。

寄南塘老人張子真

張侯風味詎能忘。黃米曾令我一嘗。昔予馳驛流陽道。過南塘子真召余一設黃飯。抵死解官遠北關。達生遯世釣南塘。知來何假靈龜兆。昔論運氣頗知未來事。作賦能乘瑞鶴祥。豈是西邊無土物。不如詩句寄東陽。

觀瑞鶴詩卷獨子進治書無詩

丁年蘭省識君初。緩步鳴珂遂帝都。象簡常陪天仗立。玉驄曾使禁臣趨。只貪殢酒長安市。不肯題詩瑞應圖。我念李侯端的意。大都好事不如無。

寄德明

德明萬燕作詩欲自絕。且云且得爲一飽。死鬼足矣。士大夫憐之。其詩末句有云。功名拍手笑殺人。四十八年如一夢。子每愛此兩句。近觀彌勒下生賦。德明所作也。因作首以寄之。

英侯志節本凌雲。尙自飄零故國塵。有道且同麋鹿友。談玄能說虎狼仁。幸然不作飽死鬼。可惜空吟笑殺人。彌勒下生何太早。莫隨邪見說無因。

才卿外郎五年止惠一書

五年只得一書題。路遠山長夢亦迷。睡老黑甜酣順北。公詩中有云。耽睡老有燕南順北之句。冷官清淡泊遼西。遼西故都案林牙耶律大石率餘衆保河中府。自稱西遼。美人得志能如虎。笑我乏才粗效雞。佇看天兵旋北闕。從今不用玉關泥。

寄清溪居士秀玉

鶴鷄猶欠一枝棲。不得燕山半土犁。時復有琴歌碧玉。年來無夢繞清溪。數行文字聊遮眼。半紙功名苦噬臍。回首故人今健否。餘生甘老碧雲西。

戲秀玉

辱書聞秀玉油房蕭索。馬溺衛死田畝水災。不勝感歎。清溪達士。豈芥蒂胸中耶。因作詩以戲之。清溪掀倒打油房。五衛凋零三徑荒。未信塞翁嗟失馬。須知禦寇覓亡羊。東湖菡萏從君賞。西域蒲萄輸我嘗。各在天涯會何日。臨風休忘老髯郎。清溪常戲呼予爲髯郎。

寄張子聞

憶昔攜琴論太玄。渠通太玄經。湛然初識子聞賢。回頭蔥嶺仍千里。分手松軒已五年。常會萬松老人之室。東望盧龍傾玉表。西來青鳥闕金牋。幾時重會燕山道。一曲臨風奏水仙。予潭水仙。公常學之。

寄用之侍郎

用之侍郎遺書。誠以無忘孔子之教。予謂窮理盡性。莫尚佛法。濟世安民。無如孔教。用我則行。宣尼之常道。舍我則樂。釋氏之真如何爲不可也。因作詩以見意云。

蓬萊憐我寄芳牋。勸我無忘仁義先。幾句良言甜似蜜。數行溫語煖於縣。從來誰識龜毛拂。到底難調膠柱絃。用我必行周孔教。舍予不負萬松軒。

和劉正卿待制韻

布袖龍鍾兩眼塵。丹誠如舊白頭新。暮雲西畔猶懷漢。曉日東邊纔是秦。酒賤不妨連夜醉。花繁長發四時春。花繁酒賤無佳思。誰念天涯萬里人。

寄仲文尙書

知仲文尙書投老而歸。歎其清高。作詩以寄。

仲文曾作黑頭公。輔弼明時播美風。治粟貨泉流冀北。提刑姦跡屏膠東。笑觀桃李新恩遍。拜掃松楸老計終。西域故人增喜色。萬全良策不謀同。

雪軒老人邦傑久不惠書作詩怨之

當時傾蓋便忘年。別後春風五度遷。萬里西行愁似海。千山東望遠如天。不聞舊信傳梅嶺。試道新詩怨雪軒。更上危樓一回首。朝雲深處是燕然。

謝王清甫惠書

西征萬里扈鑾輿。高閣文章束石渠。只道昔年周夢蝶。卻疑今日我爲魚。一簪華髮垂垂老。兩眼黃塵事事疎。多謝貴人憐遠客。東風時有寄來書。

思親

老母琴書老自娛。吾山側近結遺廬。鬢邊尙結辟兵髮。昔予從征太夫人以髮少許賜予云俗傳父母之髮戴之可辟五兵今尙存焉篋內猶存教子書。幼稚已能學士梗。老兄猶未憶鱸魚。誰知萬里思歸夢。夜夜隨風到故居。

其二

昔年不肯臥茅廬。贏得飄蕭兩鬢疎。醉裏莫知身似蝶。夢中不覺我爲魚。故園屈指八千里。老母行年六十餘。何日挂冠辭富貴。少林佳處卜新居。

思親用舊韻二首

前年驛騎過西陲。聞道萱堂鬢已絲。琴斷五絃忘舊譜。菊荒三徑負疎籬。筵前戲笑知何日。膝下嬉遊看幾時。欲附一書無處寄。愁邊空詠滿囊詩。

其二

天涯惟仗夢魂歸。破夢春風透客幃。燈下幾時哦麗句。太夫人昔有詩云挑燈教子哦新句冷淡生涯樂有餘筵前何日舞斑衣。垂塞北行人老。得得江南遠信稀。回首故園千萬里。倚樓空望白雲飛。

思親有感

骨肉星分天一涯。萱堂何處憶孤兒。排愁正賴無聲樂。遣興學吟有眼詩。麗句日逐三上爾。香醪時復一中之。前年漢使來西域。笑我星星兩鬢絲。

再過西域山城驛

庚辰之冬馳驛西域過山城驛中辛巳暮冬再過因題其壁。

去年馳傳莫城東。夜宿蕭條古驛中。別後尙存柴戶棘。重來猶有瓦窗蓬。主人歡喜鋪毛毯。驛吏蒼忙洗瓦鐘。但得微軀且強健。天涯何處不相逢。

辛巳閏月西域山城值雨

冷雲攜雨到山城。未敢衝泥傍險行。夜聽窗聲初變雪。曉窺簷溜已垂冰。淚凝孤枕三停溼。花結殘燈一半明。又向茅亭留一宿。行雲行雨本無情。

十七日蚤行始憶昨日立春

客中爲客已浹旬。歲杪西邊訪故人。杷欖花前風弄麥。葡萄架底雨沾塵。山城腸斷得窮臘。村館銷魂偶忘春。今日喚回十載夢。一盤涼餅翠蒿新。

是日驛中作窮春盤是日早行始憶昨日立春

昨朝春日偶然忘。試作春盤我一嘗。木案初開銀線亂。砂瓶煮熟藕絲長。勻和醬豆揉蔥西人煮餅必投以豌豆。細剪萋蒿點韭黃。也與何曾同是飽。區區何必待膏粱。案東坡句秋來霜穗滿東園藍蕪生兒芥有孫我與何曾同一飽不知何苦食雞純

西域蒲華城贈蒲察元帥

騷人歲杪到君家。土物蕭疎一餅茶。相國傳呼扶下馬。將軍忙指買來車。琉璃鎮裏葡萄酒。琥珀瓶中杷

欖花萬里遐方獲此樂。不妨終老在天涯。將軍乃元帥子也。

乞車

君家輪扁不多能。碧軾朱轅照眼明。居士此回無馬坐。郎官不可輒徒行。陳遵投轄情何重。將行又流連數日。靈輒扶輪報敢輕。別更不須尋土物。載將春色去東城。

戲作二首

蒼頭太守領西陽。招引詩人入醉鄉。屈胸輕衫裁鴨綠。葡萄新酒汎鵝黃。歌姝窈窕髯遮口。舞妓輕盈眼放光。野客乍來同見慣。春風不足斷人腸。一種白葡萄酒。色如金波。

其二

太守多才民富強。風光特不讓蘇杭。葡萄酒熟紅珠滴。杷欖花開紫雪香。異域絲簧無律呂。胡姬聲調自宮商。人生行樂無如此。何必咨嗟憶故鄉。

過太原南陽鎮題紫微觀壁三首

廷臣侍從蔑前驅。道侶忻奔迓使車。縣吏喜聞新號令。村民爭認舊中書。纍纍山菓盈磁鉢。薄薄邨醪半瓦壺。隱逸競詢新事迹。幾時遷洛卜新都。

其二

吾皇巡狩用三驅。萬騎千官奉帝車。北闕春頌勸農詔。南陬夜報捷音書。士民安堵耕盈野。老幼迎郊漿

滿壺佇看要荒歸一統。天兵不日破東都。

其三

三教根本自同。愚人迷執強西東。南陽笑倒知音士。反改蓮宮作道宮。紫微觀。舊佛寺也。邨人改佛像爲道像。故有此句。

和松月野衲海上人見寄二詩

遊子癡愚莫識家。牛車遠棄愛羊車。汪洋渤海龍宮藏。涓滴波瀾坎井蛙。迷後萬言猶是少。悟來千里不爲賒。叢林衲子空行腳。遠遍天涯與海涯。

其二

小隱居山何太錯。居塵大隱絕憂樂。山林朝市笑呵呵。爲報禪人莫動着。

夢中偶得

庚辰正月。夢旃檀利澄公。託萬松老人乞算壽於予。予以九十一莖贈之。仍作頌一絕。覺而猶憶。遂錄之。爲他日一笑云。

昔年鉤隱索幽奇。只向縱橫枝上覓。而今拍手笑呵呵。九九元來九十一。仍囑付從者云。若澄公道何不一拂袖便出。覺而自著語云。幾日昏沈。夢中挫五。

賈非熊餞余用其韻

鑾轡和鳴車指南。廷臣自愧侍龍驂。平生慷慨貞夫一。萬里別來益友三。老子此行無酒債。故人歸計有

禪菴白雲野衲皆宗匠。道服因緣好細參。

用李德恆韻

吾子棲遲尙布衣。挑燈鼓鉢壯歌悲。阮生既已開青眼。馬氏元來有白眉。運拙巢由真可慕。時亨房杜不難爲。男兒用舍奚憂喜。三徑耕耘足自資。

松月老人寄詩因用元韻

談禪講教不知家。芳草漫漫去路差。杓下盧聲禾老鼓。蠶星錯認洞山麻。全無去就論空色。誰有心情說照遮。松月野僧須薦取。釣魚人是老玄沙。

和薛正之韻

天涯倚逼塞城樓。凝望冥鴻空自羞。禮義不張真我恨。干戈未戢是吾憂。每憐丹鳳能擇食。常笑黃龍誤上鉤。何日解榮償舊約。扁舟蓑笠五湖遊。

湛然居士文集卷七

用李邦瑞韻

沈沈北海雪波深。老眼增明寸碧琴。未得一江活物水。何酬四海望雲心。我生有遇千年會。自愧難爲三日霖。吾子佞然虛讚德。臨風羞繼謫仙吟。

寄平陽淨名潤老

驛騎新從平水回。知公無恙笑顏開。出門不翦閑庭草。退步從生古殿苔。玉鎖何須絳彩鳳。金鉤毋得釣黃鮐。夜深織就無紋錦。但有人來寄箇來。

和鄭景賢韻

我愛龍岡老。鳴琴自老成。未彈白雪曲。先愛水仙聲。但欲合純古。誰能媚世情。林泉聊自適。何必獻承明。

和李茂才寄景賢韻

醒時還醉醉還醒。尙憶輪臺飲興清。瀚海波濤君忍聽。天山風雪戒難行。好學慷慨英雄操。毋傲辛酸兒女情。但得胸中空灑灑。天涯何處不安生。

除戎堂

案易萃卦君子以除戎器戒不虞

王師西征賢帥賈公留後。於雲內築除戎堂於城之西阿。以練戎事。禦侮折衝。高出前古。予道過

青塚公召予宴於是堂。鴻筆大手題詩灑墨。錯落於楹棟閒。皆讚揚公之盛德。予因作二詩以陳其梗槩云。

除戎堂主震威名。一掃塵氛消未萌。不出戶庭成廟算。折衝樽俎有奇兵。何須公瑾長江險。安用蒙恬萬里城。坐鎮大河兵偃息。居延不復塞塵驚。

其二

除戎廳事築城阿。烽火平安師旅和。遠勝長城欺李勣。徒標銅柱笑伏波。服心不用七擒策。禦侮何勞三箭歌。高枕幽窗無一事。西人不敢牧長河。

寄武川摩訶院圓明老人

臨行不暇別圓明。禪客機關百變生。明月清風都不會。落花流水兩無情。只知長謁摩訶院。誰道曾離歸化城。賓主相忘非聚散。笑談松竹自清聲。

其二

新詩入手眼增明。老作機鋒太峻生。略敘寒溫閑禮數。過承褒賞假人情。羨君奮迅超真地。笑我徘徊戀化城。且喜武川歸海若。狂流萬派盡消聲。

其三

我愛圓明道眼明。簡書時復寄齋生。談真辨妄輸達士。背正歸邪笑世情。且隱驪珠光萬丈。奚貪尺璧價

連城穹廬高枕無餘事。靜聽潮轟北海聲。

其四

歸興不得效淵明。細碎功名誤此生。客裏正如閒氣味。病來猶有好心情。冰絃罷品昭君曲。醉墨閒題蘇武城。愛用觀音法無盡。悲笳風送兩三聲。

其五

一扇儒風佛日明。會生從此樂餘生。高人編簡尋常味。衲子林泉稱野情。見道穀帛充廩藏。喜聞流散集京城。自慚無德毗明主。千里虛名浪播聲。

和李漢臣韻四首

夢中身世鬢垂斑。方士從誇藥駐顏。性海一波涵萬象。威音雙箭透重關。圓融活水非生滅。浩渺虛舟任往還。便好灰心養愚拙。須知大智本閒閒。案莊子大知閑閑

其二

龍飛登九五。歷數與天膺。休運縣瓜瓞。功臣列土封。但期酬子志。奚慮枕吾肱。千載聖人出。休嗟見有恆。

其三

雲中棲隱養雄豪。我愛先生一著高。鼓腹詩鳴光聖世。雄文端可繼離騷。

其四

龍庭十載不知疲。自恨無才出六奇。欲著涓埃裨海嶽。虛名閒譽畏人知。

和北京張天佐見寄

寓跡龍庭積有年。功名已後祖生鞭。銷金衆口嫉居士。好事獨君慕浩然。許遠雲山分袂別。幾時風雨對牀眠。瓊華贈我將何報。聊寄江南古樣絃。

戊子繼武川劉博書韻

不得吾山臥翠霞。西行行遁海之涯。火風地水雖非我。南北東西總是家。驛騎親馳涉弱水。星軺躬駕過流沙。惟期聖德漸遐邇。不憚龍庭萬里賒。

憩解州邵薛邨洪福院

天兵南出武陽東。暫駐征鞍憩梵宮。玉像巍巍紅葉捧。金容奕奕碧紗籠。三秦繁盛如席卷。兩晉風流掃地空。惟有真如元不壞。青山依舊白雲中。

邵薛邨道士陳公求詩

玄言聖祖五千言。不說飛昇不說仙。燒藥煉丹全是妄。吞霞服氣足延年。須知三教皆同道。可信重玄也是禪。趨破異端何足慕。紛紛皆是野狐涎。

過金山和人韻三首

金山突兀翠霞高。清賞渾如享太牢。半夜穹廡伏枕臥。亂雲深處野猿號。

其二

金山前畔水西流。一片晴山萬里秋。蘿月團圓上東嶂。翠屏高挂水晶毳。
其三

金山萬壑鬪擊清。山色空濛弄晚晴。我愛長天漢家月。照人依舊一輪明。

謝王巨川惠臘梅因用其韻

雪裏冰姿破冷金。前村籬落暗香侵。令人多謝王公子。分惠幽芳寄好音。

和王巨川題武成王廟

商辛自底滅亡期。保障全空聚鬩絲。誰識華山歸馬日。易於渭水釣魚時。

又用韻

不遇知音鍾子期。逢人未敢理冰絲。年來忘盡悲風操。空憶傷麟歎鳳時。

又一首

今年扈從入西秦。山色猶如昔日新。詩思遠隨秦嶺雁。征衣全染灞橋塵。含元殿壞荆榛古。花萼樓空草木春。千古興亡同一夢。夢中多少未歸人。

和景賢七絕

一曲悲風爲子彈。穹廡聊復助清歡。自慚未盡桐君趣。老境方知道愈難。

其二

龍庭十載典南訛。再品朱絃韻未和。美漣千鍾聊當酒。純音三弄且充歌。

其三

今日邊城又見君。試彈流水藝梅魂。聲和塞色金徽潤。香散穹廬玉鼎溫。

其四

雅操真堪坐廟堂。積年仁義佐賢王。鳴琴談笑澤天下。始信斯文天不亡。

其五

桐孫元揀嶧陽林。萬里攜來表素心。聊爾贈君爲土物。也教人道有知音。

其六

年衰老口四旬餘。願與人間萬事疎。惟有琴魔降不得。鳴球戛玉徹清虛。一作算來心地未清虛

其七

知音重過已忘憂。況復邊山七月秋。聯句絃歌清夜樂。人生適意亦何憂。

又四絕

年來世事已參商。但有聲塵尙未忘。若向琴中定優劣。龍岡錯認老髯郎。

其二

撫弄桐君樂自然。寥寥古意詎容傳。伯牙點檢真堪笑。不遇知音便絕絃。

其三

幽人寥落思無窮。付與軒昂一曲終。欲罷不能行且止。泣麟嗟鳳鼓悲風。

其四

接得新詩想笑談。奇才獨步斗之南。縱橫風月輪君手。惟有枯禪不許參。

和景賢二絕

常許景賢黃華墨蹟。景賢寄詩督予。因和其韻以戲之。

醉時還許醒時無。諺有斯言正謂予。未得素鷺白似雪。等閒難與右軍書。

其二

龍岡才德古來無。敏捷新詩正起予。詞翰雙全妙天下。銀鉤深似魯公書。

和高冲霄二首

十里東風渭水春。臨風酬月弔英魂。直須立事書麟閣。何必題詩寄雁門。

其二

翠華南渡濟蒼生。垂老將觀德化成。昨夜行宮傳好語。秦川草木也欣榮。

過天山和上人韻二絕

從征萬里走風沙。南北東西總是家。落得胸中空索索。凝然心是白蓮花。

其二

一入空門心暢哉。浮雲名利也忘懷。無心對鏡誰能識。優鉢羅花火裏開。

過覃懷二絕

十年寥落隱穹廬。驛使空來好信無。再過覃懷覓陳跡。冰魂無恙影扶疎。

其二

信斷江南望駟塵。十年辜負嶺頭春。而今重到覃懷地。卻與梅花作主人。

王屋道中

雪嶺風林度古關。畫圖曾見晉名賢。而今好倩丹青手。添我龍鍾一泫然。

過天德用遷上人韻

行盡江南二百州。黃能往往不吞鈎。而今再出天山道。收拾綸竿北海遊。

贈遼西李郡王

我本東丹八葉花。先生賢祖相林牙。秦林牙翰林也西遼主大石誓爲之此卽指西遼主而今四海歸王化。明月青天卻一家。

題道人扇二首

誰裁雲扇綴春櫻。招引微涼枉費工。何似踏開眞境界。普天匝地起清風。

其二

真空境界本如如。病眼生花認畫圖。至道絕形剛着面。太虛無面更添鬚。
題古并覃公雅秀園

流水潛穿屋下籬。青山屋上數峯奇。佳園已有溫公句。何必裘公更寫詩。

題昭上人松菊堂

晴煙蒼節出牆青。斜日黃華隔檻明。松菊尙存歸未得。湛然真箇太憨生。

題平陽劉子寧玄珠堂

玄珠失卻已多時。縱使離婁枉用眉。誰失這些關捩子。再三撈攬始應知。

題誌公圖

昔傳難貌誌公真。我道斯言尙未親。剝剝塵塵無處避。丹青也是本來人。

題黃山墨竹便面

黃山落筆露全機。底箇團圓太崛奇。點破本來真面目。何妨節外更生枝。

請治東堂

雲中豪傑構東堂。便請禪師蚤發裝。自有東山鐵餽餉。不妨拈出大家嘗。

請倪公

倪公本是戎同參。道價嶢嶢冠斗南。千里雲山舊遊地。何妨杖錫住西菴。
請照老住華塔

華塔當年隱。蟄龍轟雷掣電滿雲中。而今卻請還山去。折脚鐺邊煖曉風。

華塔照上人請爲功德主

晉陽名利近千區。華塔叢林冠一隅。今日請子來領略。他年乞我一禪廬。

請嵩公禪師詣天德作水陸大會

禪師久住賀蘭山。心與白雲自在閒。便好因風到人世。化爲甘露滿人閒。

和賈搏霄韻二絕

舉世昏昏似醉眠。悲哉不肯救頭然。祖師點破新關捩。且指人心教外傳。

其二

西來談道頓忘眠。今日相逢亦偶然。欲問瞿曇端的處。燈籠露處卻能傳。

和高麗使三首

神武有威元不殺。寬仁常愧數興戎。仁綏神震誠無敵。重譯來王四海同。

其二

揚兵青海西涼滅。渡馬黃河南汴空。百濟稱藩新內附。馳軺來自海門東。

其三

壯年吟嘯巢由月。晚節吹噓堯舜風。兩兩蒼蒼塵滿眼。東人猶未識髯公。

夢中偶得

我愛湖山好。茆齋遶湖泉。道人閒受用。不使半文錢。

和武善夫韻

佐主焦勞力已殫。微才安可濟時難。開樽北海希文舉。攜仗東山笑謝安。雨露新恩君責重。桑榆老境我年殘。何時致政閭山去。三徑依然松菊寒。

其二

秋霖初霽覺新涼。午夜東山月吐光。翠竹無心甘晚節。黃花有意助年芳。忠誠自許一心赤。老境誰憐兩鬢霜。遙憶吾山歸未得。故人書簡怨東陽。

題塞江接舫圖

一派瀟湘萬里山。閒騎凍驢照江天。風帆雪棹知多少。認取筆亭沒底船。

題黃梅出山圖

佛祖不識山中主。良材可惜遭斤斧。肩擔明月過前峯。一時忘卻曹溪語。

夢中贈聖安澄老

一束三人作一團。了無前後亦無偏。幾乎笑殺龐居士。案龐居士名蘊擬問如何便着拳。

跋定僧窟

玉崑三尺碧玲瓏。入定僧迷一色功。打入無明山鬼窟。不知何日透真空。

詠探春花用高冲霄韻

風拂新芳映短牆。典型依約類丁香。梅花欲謝渠先坼。消得東君爲汝忙。

寄休林老人

一禪客論洞山公案。渠謂洞山果有喫棒分。因作頌以記之。

世上原無真是非。叢林禪客自多疑。此詩寄向并州去。笑倒休林老古錐。

過濟源登裴公亭用閑閑老人韻

案趙公乘文元裕之之座主也。

一抱青山插碧空。平湖春水碧溶溶。裴公亭下千竿竹。撩我詩情得得濃。

其二

珍玉參差照座寒。閑閑佳句繼香山。有樂天詩碑在焉湛然不口真堪笑。也敢題詩列壁閒。

其三

繞垣喬木碧天參。松菊蕭蕭翳境潭。他日攜琴來隱此。林間乞我一禪菴。

其四

碧湖風定水痕平。雪竹幽禽自好聲。我羨青源高隱士。干戈人世不知兵。

再用前韻

山接晴霄水浸空。山光澗澗水溶溶。風迴一鏡揉藍淺。雨過千峯潑黛濃。

其二

掀髯坐語閑臨水。仰面徐行飽看山。竹裏忽聞春雪落。天教著我畫圖閒。

其三

侍中菴底春山色。裴老亭邊秋水聲。修竹茂林真隱地。但期天下早休兵。

其四

劫外玄機好細參。他年卜築繞澄潭。琴書活計無多子。祇與龍岡共一菴。

復用前韻

水影連天天渺渺。山光和水水溶溶。一枝修竹搖雲碧。百畝涼陰蔽日濃。

其二

門外回環皆碧水。庭中坐臥得青山。凭欄盡日搜新句。思入煙霞縹緲閒。

其三

幾時投老謁同參。擬向君王乞鏡潭。釣了遨遊容膝處。裴公亭與侍中菴。

一作闌篔裴公亭時
竹歸來容膝侍中菴

其四

四海干戈尙未平，不如歸隱聽歌聲。
情知文武都無用，罷讀詩書不學兵。

再和西菴上人韻

不在尋求不在參，誰分西北與東南。
雲川試入西菴去，三聖元來共一菴。

請真老住華塔

華塔叢林久席虛，真公子請肯來無。
湛然拙偈呈君去，便好攜瓶倒上驢。
一作笑倒當年十萬夫。

請玉公住太原開化

大愚不了戾兒孫，開化重興正賴君。
便請踏開關捩子，何妨地炙與天薰。

和薛伯通韻四絕

黃花紅葉滿秋山，月浸銀河夜未闌。
寂寞梧桐深院落，有人何處倚闌干。

其二

碧天妝點塞天秋，老盡黃花蝶也愁。
拚醉東籬顛倒舞，人閒富貴一何樓。

其三

衰年且喜志微伸，鏡裏驚看白髮新。
何日得遊雲水去，秋江鷗鷺淡相親。

其四

虛名羈我未能歸。羞見冥冥一雁飛。拜掃松楸定何日。不堪雙淚對君揮。

和松菊堂主人照老見寄三詩

松菊堂中老故人。芝眉重謁我無因。林松老節應依舊。籬菊寒英又一新。

其二

晉陽相遇亦前因。分手歸來跡已陳。松菊幽堂應冷淡。與君同話更何人。

其三

俊老茶毗四十年。前身是吾誤相傳。香山聲價喧天下。爭似衰翁不會禪。來詩謂予是香山俊老之後身。故以此解嘲云。

洞山五位頌案袁州洞山位亦曹溪別出法孫也。

正中偏

十月澄江徹底冰。梅花江路破瑤英。寒齋冷坐人無寐。雪映書窗一夜明。

偏中正

區區遊子困風塵。就路還家觸處真。芳草滿川桃李亂。風光全似故園春。

正中來

石女翩翻鳥道飛。淵明琴上撫冰絲。緩歌劫外陽春曲。慢看盤中白雪詞。

兼中至

涇渭同流無閒斷。華夷一統太平秋。而今水陸舟車混。何礙冰人跨火牛。

兼中到

水窮山盡懸涯外。海角天涯雲更遮。撒手轉身人不識。迴途隨分納些些。

大陽十六題

識自宗

拈花老子徒饒舌。面壁胡僧太賺人。更着洞山行過水。吾宗從此永沈淪。

死中活

百尺竿頭須進步。無明鬼窟好抽身。寒灰定爆無奇味。枯木花開別是春。

活中死

韶老須彌論過失。廬陵米價認商量。可憐一粒靈丹藥。嚙下咽喉命已亡。

不落死活

白雲深處處滄波。半醉微醒哭更歌。孤艇往來無繫絆。陰晴天氣曝漁蓑。

背捨

人亡家破更何依。退步懸崖撒手時。去歲生涯無寸土。今年活計更忘錘。

不肯捨

通方大隱好居鄴。手段能如火裏蓮。九陌香塵烏帽底。一篙春水白鷗前。案山谷時九陌黃臺烏帽底五湖春水白鷗前

活分

垂衣端拱愧佳兵。文化優遊致太平。昨夜濛濛春雨足。松筠花草一時榮。

殺人劍

雪刃森森倚碧雲。佛魔凡聖總亡魂。水乾滄海魚龍死。火烈崑岡玉石焚。

平常

寒來向火被添絳。夏月臨風便扇扇。渴飲飢食隨分過。閑中打坐困時眠。

利道拔生

箇箇既知迦葉富。人人休怨釋迦慳。破鑿煮得空華實。甌裏盛來鐵漢飡。

言無過失

元知舌上無橫骨。須信喉中有轉關。喚鼈爲龜人不肯。直教迦葉也眉攢。

透脫

瀟湘一片蘆花秋。雪浪銀濤無盡頭。何須漁鼓發清響。鷺鷥飛出白汀洲。

透脫不透脫

重陽九日菊花新。妙契忘言不犯春。收得安南憂伐北。不知何日得通津。

稱揚

從來箇事不癡藏。剎剎塵塵爲舉揚。近日令嚴誰敢犯。不教奪市與攙行。

降句

鷲嶺默然全是影。毘耶杜口本非真。燈籠露柱呵呵笑。誤殺浮生多少人。

案毘耶淨名居士

其二

疎山住住莫匆匆。龍牙且無祖師意。須信撲牛另有方。不犯鋒鋦震天地。

方又圓

破船折棹殘蓑笠。石女直鉤波上月。方士徒誇鐵作金。道人祇要金成鐵。

西域嘗新瓜

西征軍旅未還家。六月攻城汗滴沙。自愧不才還有幸。午風涼處剖新瓜。

天德海上人寄詩用元韻

知子無心謁五侯。浮雲富貴豈能留。華亭夜靜西風輒。萬頃滄波浸月鉤。

寄白雲上人用舊韻

上人別來未能參。一首新詩自北南。蕭寺深沈香火冷。白雲閒鎖舊禪菴。

武川摩訶院請爲功德主


昔日南遊又五春。馬蹄踏遍武川塵。而今卻到經行處。且與摩訶作主人。
和房長老二絕

只識瓶盤不識金。瓶盤釵釧本真金。一從打破疑團後。物物頭頭總是心。
其二

生死與涅槃。都如昨夢耳。覺後笑呵呵。無彼亦無此。

過平陽高庭英索詩強爲一絕


一川秋色滿東籬。雁字行行自寫悲。試問省菴何所省。黃花紅葉總堪詩。



附李若農侍郎湛然居士文集卷七跋

湛然集卷七過金山和人韻三首第一高牢號次流秋毬三清晴明案邱處機西遊記金山詩三絕第一
清晴明次流秋毬三高牢號然則和人者卽和邱處機也西遊記絕不及耶律晉卿而此集亦絕不聲
長春一語殆以晉卿溺粹長春學道本不同類始雖相和後乃相惡而絕交歟觀晉卿歸依萬松老人而
頗毀老氏故知其異趣也偶拈出之光緒丁亥六月李文田

晉卿西遊錄序辨邪論序等篇皆專爲攻擊邱處機而作者也六月十日又識



湛然居士文集卷八

醉義歌

遠朝寺公大師者。一時豪俊也。賢而能文。尤長於歌詩。其旨趣高遠。不類世間語。可與蘇黃並驅。爭先耳。有醉義歌。乃寺公之絕唱也。昔先人文獻公嘗譯之。先人早逝。予恨不得一見。及大朝之西征也。遇西遼前郡王李世昌於西域。予學遼字於李公。期歲頗習。不揆狂斐。乃譯是歌。庶幾形容其萬一云。

曉來雨霽日蒼涼。枕幃搖曳西風香。困眠未足正展轉。兒童來報今重陽。吟兒蒼蒼渾塞色。容懷袞袞皆吾鄉。飲衾嘿坐思往事。天涯三載空悲傷。正是幽人歎幽獨。東鄰攜酒來茅屋。憐予病竄伶仃愁。自言新釀秋泉麴。凌晨未盥三兩卮。旋酌連斟折蘭菊。我本清醴酒戶低。羈懷開拓何其速。愁腸解結千萬重。高談幾笑吟秋風。遙望無何風色好。飄飄漸遠塵寰中。淵明笑問斥逐事。謫仙遙指華胥宮。華胥咫尺尙未及。人間萬事紛紛空。一器纔空開一器。宿醒未解人先醉。攜樽挈榼近花前。折花顧影聊相戲。生平豈無同道徒。海角天涯我遐棄。我愛南村農丈人。山溪幽隱潛修真。老病猶耽黑甜味。古風清遠途猶迤。喧囂避遞巖麓僻。幽閑放曠雲泉濱。旋春新黍麴香飴。一罇濁酒呼予頻。欣然命駕慮恩去。漠漠霜天行古路。穿村迤邐入中門。老幼倉忙不寧處。丈人迎立瓦盃寒。老母自供山菓醋。扶攜齊唱雅聲清。酬酢溫語如

甘澍謂子綠鬢猶可需。謝渠黃髮勤相諭。隨分窮秋搖酒卮。席邊籬畔花無數。巨觥深學新詞催。閑詩古語玄關開。開懷囑酒謝子意。村家不棄來相陪。適遇今年東鄙阜。黍稷馨香棲畝畝。相邀斗酒不浹句。愛君蕭散真良友。我酬一語白丈人。解釋羈愁感黃耆。請君舉盞無言他。與君卻唱醉義歌。風雲不與世榮別。石火又異人生何。榮利倘來豈苟得。窮通夙定徒奔波。梁冀跋扈德何在。仲尼削迹命終多。古來此事原如是。畢竟思量何怪此。爭如終日且開罇。駕酒乘盃醉鄉裏。醉中佳趣欲告君。至樂無形難說似。泰山載斲爲深盃。長河釀酒斟酌之。迷人愁客世無數。呼來搯耳充罰之。一杯愁思初消鑠。兩盞迷魂成勿藥。爾後連澆三五卮。千愁萬恨風蓬落。胸中漸得春氣和。腮邊不覺衰顏卻。四時爲馭馳太虛。二曜爲輪輾空廓。須臾從轡入無何。自然汝我融真樂。陶陶一任玉山頽。藉地爲茵天作幕。丈人我語真非真。真兮此外何足云。丈人我語君聽否。聽則名利何足有。問君何事徒劬勞。此何卑。彼豈高。蜃樓日出尋變滅。雲峯風起難堅牢。芥納須彌亦閑事。誰知大海吞鴻毛。夢裏蝴蝶勿云假。莊周覺亦非真者。以指喻指指成虛。馬喻馬兮馬非馬。天地猶一馬。萬物一指同。胡爲一指分彼此。胡爲一馬奔西東。人之富貴我富貴。我之貧困非子窮。三界惟心更無物。世中物我成融通。君不見。千年之松化仙客。節婦登山身變石。木魂石質。旣我同。有情於我何瑕隙。自料我身非我身。電光與廢重相隔。農丈人。千頭萬緒幾時休。舉觴酩酊忘形迹。

題恆岳飛來石

無情居士題恆岳之飛來石有偈云石落黃河北山銜白日西聰明厭血食悔不值元珪天下稱頌之爲人磨毀字文漫駁不復識矣有仁上人自恆山來請予復書是頌欲刊諸舊文之側予應之曰無盡之妙言昭如日月與天地而齊終豈風蠶之能掩哉然不能拒上人之請勉爲之書己丑清明日湛然居士漆水移刺楚材晉卿題

爲慶壽寺作萬僧疏

竊以棲身物外已知四大之空寓跡塵中且賴十方之供矧五常尤尊於博施而六度首重於檀那不求郡國之英豪誰養林泉之跛挈芒鞋藜杖弗辭千里之勤糲食蔬羹好助萬僧之化謹疏

太原開化寺革律爲禪仍命予爲功德主因作疏

竊惟昔年開化今日爲禪已蒙智老拈香又請湛然作主尋行數墨一獨教化家門運水搬柴便有叢林氣息謹疏

爲石壁寺請信公菴主開堂疏

竊以達摩昔年莽鹵截鶴續鳧天寧今日顛預證龜作鼈可憐弄巧成拙不免出醜放乖我信公菴主受洞下之宗風佩卻波天南老人道號也之心印參窮行說不到處踏開偏正未分前既已降尊就卑何愧壓良爲賤逢場作戲請來鬧裏刺頭借水獻花使好穩處下腳謹疏

王山圓明禪院請予爲功德主因作疏

王山乃靈巖之古刹。湛然實萬松之門人。既是當家。本非生客。春風秋月。長聯萬葉之芳。晨香夕燈。永祝一人之壽。

萬卦山天寧萬壽禪寺命予爲功德主因作疏

惟萬卦之古刹。實萬松之舊遊。有虛己彦公道號飛書。請湛然作主。勉爲提領。良慰慙懃。山色水聲。永作道人活計。漁歌樵唱。備傳衲子家風。謹疏。

請某公菴主住竹林疏

狐死首邱。是難忘於熟處。心空及第。何猶迷於故園。我某公菴主。三頓打不回頭。一喝全無入耳。喫竹林飯。屙竹林矢。嗣竹林法。傳竹林禪。打甌哄盆。莫忘竹林之盛德。披毛帶角。好種竹林之道場。

請湛公禪師住紅螺山寺疏

祖禰不了。慚惶碧眼之老胡。兒孫受殃。架構紅螺之大利。既是將錯就錯。不免拈空拄空。我湛公禪師。韶陽遠孫。摩訶嫡子。參透三句語。擊碎十法門。便好住持。更休推讓。滔天嶺上。只圖同看有毛龜。絕頂山頭。且要共栽無影樹。謹疏。

請容公和尚住竹林疏

慶壽慈悲。拽擺犁而耕種。竹林瀟灑。歎槽廠之空閑。已讓位而逃。宜見機而作。我容公禪師。一條生鐵脊。兩片點鋼唇。參透濟下沒把鼻禪。說得格外無滋味。話呵佛罵祖。且存半面人情。揭海掀湖。便有一般闖。

揆。試問孤峯頂上。何如十字街頭。若是本色瞎驢。好趁大隊。既號通方水牯。何必芒繩。謹疏。

請智公尼禪開堂疏

用管仲則安。用豎刁則危。賢愚政事。參萬松則謗。參延洪則讚。冷煖人情。行窮萬里山川。只是一天風月。惟智公禪師。本有丈夫志。不學老婆禪。拈卻花冠。弗裝珍御。可駭特牛生。悖便好出頭。勿謂牝雞司晨。不敢下鶩。謹疏。

代劉帥請智公尼禪住報先寺

劉公鄰居報先

洗垢無緣。乏遠井之救渴。卜鄰有德。故近寺而敬僧。我智公禪師。先禮報恩。後參奉福。遠如舊總。近似新深。澁鎖打開。便請升堂。啓戶。明燈剔起。願希鑿壁。偷光。謹疏。

請某菴主開堂疏

和尚拽碇子。不離寺內。老鼠拖葫蘆。只在倉中。某菴主。先謁報恩。再參奉福。升回斗轉。團倒廩傾。十分利不圖半文。一石禪獨攬八斗。莫學淘沙去米。打破羅盆。且來量土。唱籌。熱謾敵將。謹疏。

爲慶壽寺化萬僧疏

隱迹林泉。置死生於度外。隨身瓶鉢。寄口腹於人間。欲逢三寶之風。強遣萬僧之化。何須異味。唯求野菜。淡黃齏不用多般。只要山田脫粟。餘謹疏。

請亨公菴主開堂疏

亭公菴主久參萬松老人。因緣不契。再謁王山大愚和尚。不期月罷參。予過太原王山寺。僧請予作疏。

萬松三頓不回頭。王山一釣便吞鉤。大愚不似大愚老。脅下三拳即便休。

三學寺改名圓明仍請予爲功德主因作疏

本無男女等相。着甚名模。強分禪教者流。且圖施設。粵三學之巨刹。冠四海之名藍。今改僧而舍尼。遂從禪而革律。邀印公爲粥鉢頭。請湛然爲功德主。根深蒂固。長聯萬葉之芳。地久天長。永祝一人之慶。謹疏。

平陽淨名院革律爲禪請潤公禪師住持疏

竊以不居這那院。好箇主人。本無南北心。悉爲佛子。謹請懷仁潤老。來住平陽淨名。翡翠簾前。請看木人之舞。琉璃殿上。願聞布鼓之音。謹疏。

太原五臺寺請予爲功德主因作疏

鎮三晉之雄藩。有五臺之古刹。獻花酌水。改律爲禪。具疏懇勸。請予領略。謹命休林常祝壽。結个好因緣。爲報文殊莫放光。不打遮鼓笛。謹疏。

請定公菴主出世疏

少林九年打坐。祇得半提。曹溪五派分開。全沒一滴。雖是將無作有。也要算假像真。我定公菴主。洞下玄孫。案遺山集亦有蕭夫人參洞下禪之語。此是金源僧。五臺嫡子。解造無米粥。能撫沒絃琴。既已炙地薰天。須要掀海翻山。正逢開

化。枉開有力叢林。便好出頭。莫戀無明鬼窟。謹疏。

大龍山永寧石壁禪寺請忘憂居士爲功德主代爲之疏

惟明月清風。取之無禁者。況龍巖石壁。命予爲主人。煩我一心護。謝他兩手分。付千巖好景。半文不費買。山錢持數紙。閑言一狀。便充商稅契。謹疏。

代忘憂居士請琳公禪師住持壽寧禪寺疏

臨汾水之故邑。有壽寧之巨藍。歷代皈依。百年煥顯。乞忘憂爲功德主。請琳公爲粥鉢人。獨掌不浪鳴。單手豈成拍。千年罕遇。最難時節。因緣一疏。連來。便是衲僧把鼻。謹疏。

爲大覺開堂疏三道

竊以門裏安身。早已荆棘漫地。巖中宴坐。更知過犯彌天。請來借坐升堂。便好情人問話。引得轆轤轉也。問甚千遭萬遭。快迭爐熬熱時。盛搭一箇兩箇。

竊以雲門胡餅。切忌咬嚼。盧陵米價。怎敢商量。不甘公案淆訛。正要作家批判。伏惟奧公和尙。佩聖安之正印。透韶陽之上關。莫守命鬼窟中。三彈不動。快橫身虎口裏。一勘便招。

竊以逢人不出。出則便爲人。傍觀者哂。逢人便出。出則不爲人。當局者迷。直須一箭透重關。不得三心或兩意。自甘入室。渾如豹膽熊心。不肯陞堂。卻是蟲頭鼠尾。

司天判官張居中六壬祛惑鈴序

予故人張正之。世掌義和之職。通經史百家之學。尤長於三式。與予參商。且二十年矣。癸巳之春。既克汴梁。渠入覲於朝。形容變盡。惟語音存耳。乘閒因出書一編。曰六壬祛惑鈴。予再四釋之。引式明例。皆有所據。或有隱奧。人所未通者。釋以新說。蓋採諸經之所長。無所矛盾者。取其折衷。爲一家之書。近代未之有也。求傳寫者既衆。其同列請刊行以廣其傳。余忻然爲引。以題其端。癸巳中秋日集。澗然居士漆水移刺楚材晉卿序。

苗彥實琴譜序

古唐棲巖老人苗公。秀實其名。彥實其字。博通古今。尤長於易。應進士舉。兩入御闈而不捷。乃拂袖去之。公善於琴事。爲當今第一。嘗遊於京師士大夫間。皆服其高妙。泰和中。詔天下工於琴者。侍郎喬君舉之於朝。公待詔於祕書監。余幼年刻意於琴。初受指於待詔。引大用。每得新譜。必與棲巖商榷妙意。然後彈之。朝廷王公大人。邀請棲巖者無虛日。予不得與。渠對指傳聲。每以爲恨。壬辰之冬。王師濟長河。破潼關。涉京索。圍汴梁。予奏之朝廷。索棲巖於南京得之。達范陽而棄世。其子蘭絮遺譜而來。凡四十餘曲。予按之。果爲絕聲。大率署令衛宗儒之所傳也。予今錄之。以授後世。有知音博雅君子。必不以予爲徒說云。壬辰仲秋後二日。澗然居士漆水移刺楚材晉卿序。

答楊行省書

某再拜。復書於行省閣下。辱書諭及辭位事。請聞奏施行者。惟聖代之深仁。賞延於世。偉閭門之內助。貴

繫於夫。故行省李公。雖稽北覲之期。頗著南伐之績。時不適願。天弗假年。伏惟閣下。族出名家。世傳將種。無兒女子之態。有大丈夫之所爲。吏民服心。朝廷注意。遂授東臺之任。冀舒南顧之憂。今也抑意陳書。引年求退。還折鼎覆餗之患。避牝雞司晨之譏。雖曰謙尊而光。曷若隨時之義。分茅列土。無忘北闕之恩。秣馬厲兵。可報西門之役。今因人回。謹復書以聞。山川遼闊。書簡浮沈。比獲瞻依。更希調護。不宣。

進征西庚午元曆表

臣楚材言。堯分仲叔。春秋謹候於四方。舜在璣衡。旦暮肅齊於七政。所以欽承天象。敬授民時。典謨實六籍之大經。首書其事。堯舜爲五帝之盛主。先務厥猷。皎如日星。記之方冊。由此言之。有國家者。律曆之書。莫不先也。是以三代而下。若昔大猷。遵而奉之。星曆之官。代有其人。漢唐以來。其書大備。經元創法。無慮百家。其氣候之早晏。朔望之疾徐。二曜之盈衰。五星之伏見。疏密無定。先後不同。蓋建立國都而各殊。或涉歷歲年之寢遠。不得不差也。既差則必當遷。就使合天耳。唐曆八徙。宋曆九更者。良以此夫。金用大明。百年纔經一改。此去中原萬里。不啻千程。昔密今疏。東微西著。以地遙而歲久。故勢異而時殊。庚辰聖駕西征。駐蹕尋斯干城。是歲五月之望。以大明太陰當虧二分。食甚子正。時在宵中。是夜候之未盡。初更月已食矣。而又二月五月朔。微月見於西南。梭之於曆。悉爲先天。恭惟皇帝陛下。德符乾坤。明並日月。神武天錫。聖智夙資。邁唐虞之至仁。追羲軒之淳化。翼成仁而底義。敬奉天而謹時。重勅行臺。旁求儒者。臣魚蟲細物。草芥微人。粗習周孔之遺書。竊慕羲和之陳迹。俎豆之事。靡遑諸也。箕裘之業。敢忘於心。恨無命

世之大才。誤忝聖朝之明詔。欽承皇旨。待罪清臺。五載有奇。徒曠著龜之任。萬分之一。聊陳犬馬之勞。既校曆而覺差。竊效顰而改作。今演記窮元。得積年二千二十七萬五千二百七十歲。命庚辰。臣愚以爲中元歲在庚午。天啓宸衷。決志南伐。辛未之春。天兵南渡。不五年而天下略定。此天授也。非人力所能及也。故上元庚午歲。天正十一月壬戌朔。夜半冬至。時加子正。日月合璧。五星聯珠。同會虛宿五度。以應我皇帝陛下受命之符也。臣又損節氣之分。減周天之杪。去文終之率。治月轉之餘。課兩耀之後。先調五行之出沒。大明所失。於是一新。驗之於天。若合符契。又以西域中原。地里殊遠。創立里差。以增損之。雖東西數萬里。不復差矣。故題其名曰西征庚午元曆。以記我聖朝受命之符。及西域中原之異也。所有曆書。隨表上以聞。伏乞頒降方臺。以備行宮之用。臣誠惶誠恐。頓首頓首謹言。

西遊錄序

古君子南逾大嶺。西出陽關。壯夫志士。不無銷黯。予奉詔西行。數萬里。確乎不動心者。無他術焉。蓋汪洋法海。涵養之效也。故述辨邪論。以斥糠蟹。少答佛恩。戊子。乘傳來京。里人問異域事。慮煩應對。遂著西遊錄。以見予志。其間頗涉三聖人教。正邪之辨。有譏予之好辨者。予應之曰。魯語有云。必也正名乎。又曰。思無邪。是正邪之辨。不可廢也。夫楊朱。墨翟。田駢。許行之術。孔氏之邪也。西域九十六種。此方毗盧。糠瓢。白經。香會之徒。釋氏之邪也。全真大道。混元。太乙。三張左道之術。老氏之邪也。至於黃白金丹。導引服餌之屬。是皆方技之異端。本非伯陽之正道。疇昔禁斷。明著典常。第以國家創業。崇尚寬仁。是致僞妄滋彰。未

及辨正耳。古者嬴秦焚經坑儒。唐之韓氏排斥釋老。辨之邪也。孟子闢楊墨。子之黜糠邱。辨之正也。子將刊行之。雖三聖人復生。必不易此說矣。己丑元日。湛然居士漆水移剌楚材晉卿序。

辨邪論序

夫聖人設教立化。雖權實不同。會歸其極。莫不得中。凡流下士。惟務求奇好異。以眩耳目。噫。中庸之爲德也。民鮮久矣。者良以此夫。吾夫子云。中人以下。不可以語上也。老氏亦謂下士聞道大笑之。釋典云。無爲小乘人而說大乘法。三聖之說。不謀而合者。何哉。蓋道者易知易行。非掀天拆地。翻海移山之詭誕也。所以難信難行者。舉世好乎異。罔執厥中。舉世行乎難。弗行厥易。致使異端邪說。亂雅奪朱。而人莫能辨。悲夫。吾儒獨知楊墨爲儒者患。辨之不已。而不知糠蟹爲佛教之患。甚矣。不辨猶可。而況從而和之。或爲碑以記其事。或爲賦以護其惡。噫。天下之惡一也。何爲患於我。而獨能辨之。爲患於彼。而不辨反且羽翼之。使得遂其奸惡。豈我夫子忠恕之道哉。黨惡佑奸。壞風傷教。千載之下。罪有所歸。彼數君子。曾不捫心而靜思及此也。邪。予旅食西域。且十年矣。中原動靜。寂然無聞。邇有永安二三友。以北京講主所著糠蟹教民十無益論見寄。且囑予爲序。予再四釋之。辨而不恕。論而不縵。皆以聖教爲據。善則善矣。然予辭而不序焉。予以謂昔訪萬松老師。以問糠蟹邪正之道。萬松以予酷好屬文。因作糠蟹禪賦見示。予請廣其傳。萬松不可。予強爲序引以行之。至今庸民俗士。謗歸於萬松。予甚悔之。今更爲此序。則又將貽謗於講主者也。謹以萬松講主之餘意。借儒術以爲比。述辨邪論以行世。有謗者。予自當之。安可使流言飾謗。汙玷山

林之士哉。後世博雅君子有知我者，必不以予爲囁嚅云。乙酉日南至，湛然居士漆水移刺楚材晉卿，敍於西域瀚海軍之高昌城。

寄趙元帥書

楚材頓首。白君瑞元帥足下。未審邇來起居何如。昔承京城士大夫數書發揚清德。言足下有安天下之志。仍託僕爲先容。僕備員翰墨軍國之事。非所預議。然行道澤民。亦僕之素志也。敢不鞭策駑鈍。以羽翼先生之萬一乎。僕未達行在。而足下車從東旋。僕甚怏怏。夫端人取友必端矣。京城楚卿子進。秀玉輩。此數君子皆端人也。揚推足下。談不容口。故知足下亦端人已。然此僕於足下。少有疑焉。若夫吾夫子之道。治天下。老氏之道。養性。釋氏之道。修心。此古今之通議也。舍此以往。皆異端耳。君之尊儒重道。僕尙未見於行事。獨觀君所著頭陀賦序。知君輕釋教多矣。夫糠粃釋教之外道也。此曹毀像謗法。斥僧滅教。棄布施之方。杜懺悔之路。不救疾苦。敗壞孝風。實傷教化之甚者也。昔劉紙衣扇僞說以惑衆。迨今百年。未嘗聞奇人異士羽翼其說者。夫君子之擇術也。不可不慎。今君首倡序引。黨護左道。使後世陷邪歧。墮惡趣。皆君啓之矣。千古遺恥。僕爲君羞之。糠粃異端也。輒與佛教爲比。萬松辨賦。甘泉勸書。反以孟浪巨蠹之言處之。以此行己化人。僕不知其可也。僕謂足下輕釋教者。良以此也。夫於所厚者薄。無所不薄。君旣薄釋教。則儒道斷可知矣。君之於釋教。則重糠粃於儒道。則必歸楊墨矣。行路之人。皆云足下吝嗇。故奉此曹圖其省費故也。昔諸士大夫書來。咸謂足下以濟生靈爲心。且吾夫子之道。以博施濟衆爲治道之急。

誠如路人所說。則吾夫子之道。亦不可行矣。又將安濟生靈乎。又君序頭陀賦云。冀請宗師祈冥福。以利斯民。足下民之儀表也。崇重糠粃。毀斥宗師。將使一郡從風漸化。斷知斯民罪惡日增矣。又將安以利斯民乎。僕謹撰辨邪論。以寄幸披覽之。更請涉獵藏教。稽考儒書。反復參求。其邪正之歧。不足分矣。僕素知君爲邪教所惑。亦未敢勸諭。君不以僕不才。轉託諸士大夫。萬里相結爲友。故敢以區區忠告。易曰。方以類聚。物以羣分。經云。士有諍友。故身不離於令名。若知而不爭。安用友爲。若所尚不同。安可爲友。或萬一容納鄙論。便請杜絕此輩。毀頭陀賦板。以雪前非。如謂僕言未當。則請於茲絕交。夏暑比平安好。更宜以遠業自重。區區不宣。

萬松老人評唱天童覺和尚頌古從容菴錄序

昔予在京師時。禪伯甚多。惟聖安案大金聖安寺在廣寧門內偏西南澄公和尚。神氣嚴明。言詞磊落。予獨重之。故嘗訪以祖道。屢以古昔尊宿語錄中所得者扣之。澄公閒有許可者。予亦自以爲得。及遭憂患以來。功名之心。束之高閣。求祖道愈亟。遂再以前事訪諸聖安。聖安翻案不然所見。予甚感焉。聖安從容謂予曰。昔公位居要地。又儒者多不諱信佛書。惟搜摘語錄。以資談柄。故予不敢苦加鈎鏈耳。今揣君之心。果爲本分事。以問予。予豈得猶襲前愆。不爲苦口乎。予老矣。素不通儒。不能教子。有萬松老人者。儒釋兼備。宗說精通。辨才無礙。君可見之。予既謁萬松。杜絕人迹。屏斥家務。雖祁寒大暑。無日不參。焚膏繼晷。廢寢忘食者。幾年。誤被法恩。謬膺子印。以湛然居士從源目之。其參學之際。機鋒罔測。變化無窮。巍巍然若萬仞峯。莫可

攀仰滔滔然若萬頃波。莫能涯際。瞻之在前。忽焉在後。回視平昔所學。皆塊礫耳。噫。登東山而小魯。登太山而小天下者。豈虛語哉。其未入闔域者。聞是語。必謂予志本好異也。惟屏山閑閑其相照乎。爾後奉命赴行在。扈從西征。與師相隔。不知其幾千里也。師平昔法語偈頌。皆法隆公所收。今不復得其稿。吾宗有只童者。頌古百篇。號爲絕唱。予堅請萬松評唱。是頌開發後學。前後九書。間關七年。方蒙見寄。予西域伶仃數載。忽受是書。如醉而醒。如死而甦。踴躍歡呼。東望稽顙。再四披釋。撫卷而歎曰。萬松來西域矣。其片言隻字。咸有指歸。結款出眼。高冠古今。是爲萬世之模楷。非師範人天。權衡造化者。孰能與於此哉。予與行宮數友。旦夕游詠。於是書如登大寶山。入華藏海。巨珍奇物。廣大悉備。左逢而右遇。目富而心飫。豈可以世閒語言形容其萬一耶。予不敢獨擅其美。思與天下共之。京城惟法弟從祥者。與僕爲忘年交。謹致書請刊行於世。以貽來者。迺序之曰。佛祖諸師。埋根千丈。機緣百則。見世生苗。天童不合抽枝。萬松那堪引蔓。湛然向枝蔓上。更添芒索。穿過尋香逐氣者。鼻孔絆倒。行玄體妙底。腳根向去。若要腳根點地。鼻孔撩天。卻須向這葛藤穿過。始得。甲申中元日。漆水移刺楚材晉卿。敍於西域阿里馬城。

評唱天童拈古請益後錄序

雪竇拈頌。佛果評唱之擊節碧巖錄在焉。佛果頌古。圓通善國師評唱之覺海軒錄在焉。是臨濟雲門互相發揚矣。獨洞下宗風。未聞舉唱。豈曲高和寡耶。抑亦待其人耶。必有通方明眼。判斷尙未晚也。昔佛鑑拈八方珠玉集。止及其半。每至曹洞。夾嶺。石霜。王宗。機緣。留付佛果。今佛鑑佛果拈八方珠玉集。具在。愈

可疑焉。三大老後，果有天童覺和尚，拈頰洞下宗風，爲古今絕唱。迨今百年，尙無評唱者。予參承餘暇，固請萬松老師評唱之。欲成三宗鼎峙之勢，忍拈覆餗貞吝之譏。今評唱頌古，從容菴錄，已大播諸方。評唱拈古，請益後錄。時老師年已六十有五矣，循常首帶佛事，人情晷隙之間，侍僧請益，旋舉旋錄，皆不思而對，應筆成文。凡二十七日，百則詳備，神鋒穎利，於斯可見矣。若夫據令於臨濟棒喝以前，發機於雲門三句之外，豈更與佛果圓通殘餽爭長哉！俊快衲子，舉一明三，瞥見全鼎，則瀉仰法眼，雙鉉亦宛然矣。但恐口信不及，徒勞話歲寒也。吁！壬辰重陽日，湛然居士漆水移刺楚材晉卿，敘於天山。

燕京崇壽禪院故圓通大師朗公碑銘

師諱祖朗，姓李氏，薊州漁陽人。九歲出家，禮燕京大聖安寺圓通國師爲師。大定十三年，京西弘業寺受具。至二十一年，改弘業爲大萬安禪寺，有司承制，師充知事。厥後拂衣，註錫聖安，復爲舉充監寺。崇壽禪院者，實圓通國師退老之舊居也。以師爲宿舊之最，承安間，堅請師爲宗主住持。一歷十稔，又奉勅選香林禪寺開山提點。凡三載，勅賜總持大德，答其勤也。旣而崇壽復請住持，載閱五春，貞祐閒，奉勅改賜今號，度門徒凡十有一人。咸有肖父之風焉。師前後輔翼叢林，不憚艱苦，讓功責己，潛德密行，不可概舉。師以壬午之仲冬，十有四日，示寂於崇壽。僧臘五十三，俗壽七十四。師將順世，預召其屬徒，笑謂曰：生緣我將盡矣，屬徒退而相謂曰：師神色自若，若無他疾，安得遽有是事耶？后七日，師命侍僧執筆代書頌云：咄！遮皮袋，常爲患害，繼祖無能，念佛有賴，來亦無來，去亦無礙，四大各離，一時敗壞，且道還有不敗壞者麼？

良久云。浮雲散盡。月昇空。極樂光中常自在。語竟。乃閉目跏趺而寂。於是遐邇緇素。弔祭如雲。嘉聲遠震。愈光於生前矣。其弟子輩。瘞靈骨於師翁靈塔之左。去京城之南可二里許。丁亥之冬。予奉詔搜索經籍。馳傳來京。有菴主志奧者。師之受戒弟子也。晚得法於聖安澄公。圓照大禪師。以僕素與朗師善。屬予求碑銘。僕素愛師之純古灑落。與之遊者久矣。師嘗云。予晚節愈堅於持誦。日念彌陀聖號。數萬聲方止。譬如抱河梁而洛。又何害焉。今聞師之寂也。七日預知時至。雅符龍猛祖師之證。無乃持誦之驗與。噫。聖人豈欺我哉。豈欺我哉。萬松老人爲宗門之大匠。四海之所式範。素慎許可。嘗贊師之真曰。德譽燔沈。靈骨鏗金。訥於言而敏於行。璞其貌而玉其心。敕選提封於國寺。天資寶鍊於禪林。子徒知寒蟬將蛻。尙餘吟。吾以爲陞圓通之堂者。稽古依然。接武於方今云。萬松見許如是。人可知已。僕聞師侍從圓通國師最久。而又臨終之際。超然自在。疑必得法於國師。或因緣未合。或授國師密訓。不令出世。亦石霜素侍者之儔。侶與崇壽禪院法堂叢林制度。一如聖安師久據而不請。禪伯住持者。亦猶素侍者平欺老黃龍。下視兜率悅之意。與予恐後世人責備於賢者。累師之重德。故雪之於此。後之子孫。當幹父之蠱。無蹈前轍。以玷師之高名焉。浩然居士再拜而作銘曰。

偉哉朗公。誕跡漁陽。師侍圓通。達奧穿堂。肅依宸命。屢提國寺。

退己讓人。舉廢修墜。兒孫衆多。酷奉彌陀。心期極樂。迹厭娑婆。

撒手便行。預知時至。臘五十三。壽七十四。奔喪赴祭。緇素駢闐。

嘉聲遐播。愈盛生前。京南之原。茶毗靈骨。素笈陵空。朗師不歿。
伴癡放憨。素公同參。蔑視兜率。平欺匾南。不邀宗匠。冷閑方丈。
垂手無人。老殘龍象。予聞君子。責備乃賢。毋以微瑕。累乎大全。
云子云孫。幹父之蠱。載震師名。永揚萬古。庚寅年六月望日。

貧樂菴記

三休道人稅居於燕京之市。榜其菴曰貧樂。有湛然居士訪而問之曰。先生之樂。可得聞與。曰。布衣糲食。任天之真。或鼓琴以自娛。或觀書以自適。詠聖人之道。歸夫子之門。於是息交遊。絕賓客。萬慮泯絕。無毫髮點翳於胸中。其得失之倚伏。興亡之反覆。初不知也。吾之樂良以此耳。曰。先生亦有憂乎。曰。樂天知命。吾復何憂。居士進曰。予聞之。君子之處貧賤富貴也。憂樂相半。未嘗獨憂樂也。夫君子之學道也。非爲己也。吾君堯舜之君。吾民堯舜之民。此其志也。使一夫一婦不被堯舜之澤者。君子恥之。是故君子之得志也。位足以行道。財足以博施。不亦樂乎。持盈守謙。慎終如始。若朽索之馭六馬。不亦憂乎。其貧賤也。卷而懷之。獨潔一己。無多財之禍。絕高位之危。此其樂也。嗟流俗之未化。悲聖道之將頽。舉世寥寥。無知我者。此其憂也。先生之樂。知所謂矣。先生之憂。不其然乎。道人瞪目而不答。居士笑曰。我知之矣。夫子以爲處富貴也。嘗隱諸樂而形諸憂。處貧賤也。必隱於憂而形諸樂。何哉。第恐不知我者。以爲洋洋於富貴。而戚戚於貧賤也。道人曰。他人有心。予忖度之。吾子之謂矣。請以吾子之言。自以爲記。丙子日南至。湛然居士

漆水移刺楚材晉卿題。

自贊

別來十年五歲。依舊一樣一樣。鬚髯垂到腰間。眉毛儼然。眼上龜毛。錐子畫虛空。寫破湛然。閑伎倆。


其二

有髮禪僧。案涪翁自贊云。似僧有髮似俗無塵。無名居士。人道甚似。吾道便是。塵塵劫劫。露全身。紙上毫端。何處避。

燕京大覺禪寺創建經藏記

遼重熙清寧閒。築義井精舍於開陽門之郭。傍有古井。清涼甘滑。因以名焉。金朝天德三年。展築京城。仍開陽之名焉。其里大定中。寺僧善祖。有因緣力。道俗歸嚮者衆。朝廷嘉之。賜額大覺。貞祐初。天兵南伐。京城既降。兵火之餘。僧童絕迹。官吏不爲之恤。寺舍悉爲民居有之。戊子之春。宣差劉公從立。與其僚位高從遇輩。疏請與公和尙爲國焚修。因革律爲禪。與公罄常住之所有。贖換寮舍。悉隸本寺。稍成叢席。可容千指。瑞像殿之前。無垢淨光佛舍利塔在焉。殘缺幾仆。提控李德者。素黨於糠蟹。不信佛教。至是改轍。施則完葺其塔。繼有提控晉元者。施蔬圃一區於寺之南。以給衆用。糊口粗給。庚寅之冬。劉公以狀聞朝廷。招提院所貯餘經一藏。乞遷於本寺安置。許之。於是與公轉化檀越。創建壁藏斗帳龍龕一週。凡二十架。飾之以金。續之以彩。窮工極巧。煥然一新。計所費之直。白金百笏。能事告成。累書請滿然居士爲記。余慨然曰。昔者聖人之藏書也。貯之於金匱。寫之於琬琰。重道尊書。以示於將來也。浮屠之建寶藏者。亦猶是。

乎。吾夫子刪詩定書。明禮讀易。六經之下。流爲諸子。春秋以降。散爲史書。較其卷軸。不爲不多矣。兵革以
來。率散落於塵埃中。吾儒得志於時者。曾無一人爲之裒集。置之淨室。安之寶架。豈止今日也哉。承平之
世。間有儒冠。率集士民。修葺宣聖之廟貌者。曾未卒工。已爲有司糾劾矣。且以擅興之罪罪之。噫。吾道衰
而不振者。良以此夫。昔雪巖示寂於玉山。時萬松老人。方應詔住持仰嶠。計問既至。不俟駕而行。遇完顏
子玉諸塗。子玉歎曰。士人聞受業師之物故也。雖相去信宿之地。未聞躬與其祭者。豈有千里奔喪者耶。
佛祖之教。源遠流長者。有自來矣。子玉每以此事。語及士大夫。今與公禪師。非爲子孫計。無取功名心。汲
汲皇皇。丐乞於道路。惟以佛宮秘藏爲務。可謂不忘本矣。余已致書於諸道士大夫之居官守者。各使營
葺宣父之故宮。亦由與公激之也。癸巳中秋日記。



湛然居士文集卷九

和張敏之詩七十韻三首

敏之學士遠寄新詩七十韻。捧讀之餘。續貂以尾。聊資一笑。

壯年多轆軻。晚節歎行藏。故國顏綱穢。新朝明德香。雄材能預算。大略固難量。迭出神兵速。無敵我武揚。本圖服叛逆。何止剪讎張。西討窮于閩。東征過樂浪。慧侵天壘壁。光動太白鉞。整車徒盛鱗。旗鼓望天皇。深責重賢帥。廟謨滅江左。將擒楚河陽。已滅商英雄。皆入殼。強禦敢跳梁。採訪軒車鬧。司農官吏忙。輕徭常力足。薄賦不財傷。勳業起秦漢。規模邁帝王。流言無管蔡。奇計有平良。增葺新文物。耕耘古戰場。蛟龍方奮迅。鷗鷺得翱翔。偶遇風雲會。爭依日月光。永隴千古恥。一怒四夷攘。虎帳十年夢。龍庭幾度霜。迎降初請命。出郭遠相將。久敵真宜死。寬恩何敢當。赦書民有幸。歌詠壽無疆。扶杖聽黃詔。稱觴進白狼。散財竭庫藏。拔將出戎行。般絕仁猶在。周傾道不亡。來招燕郡內。入覲大食傍。戎服貂裘紫。星軺駁馬蒼。中春辭北望。初夏過西涼。瀚海涵而湧。陰山徃且徨。閑雲迷去路。疎雨潤行裝。出處空與歎。風光自斷腸。典型陳故事。利病上封章。天下援深溺。中州冀小康。風俗乘喪亂。籌策要優長。痼疾如神附。遊魂笑鬼佯。仁術能骨肉。靈藥起膏肓。避禍宜緘口。當言肯括囊。遭讒心欲剖。涉苦膽先嘗。北漠絕窮域。西隅抵大洋。詩書猶不廢。忠信未能忘。氈補連腮帳。緹穿朽脚牀。郊行長野興。人靜若禪房。回鶴交游熟。崑崙事蹟詳。

風煙多黯黯。雲水兩茫茫。災變垂乾象。妖氛翳太陽。髯龍三島去。玉葉一枝芳。明主初登極。愚臣敢進狂。
九疇從帝錫。五事合天常。大樂陳金石。朝服具冕裳。降升分上下。進退有低昂。拓境時方急。郊天且未遑。
應兵無血刃。降虜自壺漿。按堵無更肆。因敵不飽糧。宸心尊德義。聖政濟柔剛。恩澤涵諸夏。威稜震八荒。
勢連西域重。天助北方強。舉我陪三省。求賢守四方。錦衣捐毳褐。肉食棄精糠。隱逸求新仕。流亡集故鄉。
百官欣戴舜。萬國願歸唐。耕釣咸生遂。工商樂未央。會將封泰岳。行看建明堂。自歎才雕篆。長慚學面牆。
君恩予久負。賢路我深妨。覆餗恆憂懼。持盈實恐惶。故山松徑碧。舊隱菊花黃。太守方遺鳥。初平政牧羊。
厚顏居此位。若已納於隍。吟嘯須歸去。香山老侍郎。

再用張敏之韻

我愛張公子。丁年密退藏。施爲宜法則。議論自馨香。元氣卻不死。深陂豈可量。兒時供府薦。壯歲已名揚。
汲汲尊尼父。堂堂類子張。遷居擇鄰里。濯足揀滄浪。作傳編毛穎。談玄說劒鋒。奇才千古重。令聞萬民望。
氣壓四明客。調窮三耳臧。典謨師我舜。雅頌起予商。絲叢曾陳漢。仁術屢說梁。本非中酒困。長爲和詩忙。
道長占連拔。時衰心獨傷。篆文逾似李。隸字楷如王。青眼予能作。白眉君最良。萬言陳國利。一戰捷文場。
出海游龍舞。騰空翥鳳翔。十全君子行。一代士林光。句法吾師範。詩材我竊攘。忠心常向日。直節欲凌霜。
文沒歲去久。道亡天未將。狂瀾時旣倒。木鐸子宜當。德業能純粹。學術靡理疆。衝天憎燕雀。當路惡豺狼。
綺語吟千韻。宸筆掃千行。行藏關治亂。出處卜興亡。郡隸清河上。家居杜曲傍。登科年甫冠。修史髮初蒼。

仙觀嘗新欠宮園醉晚涼。朝天恭蹀躞。退食獨彷徨。得暇多休沐。游山小治裝。一卮持竹葉。左手把無腸。官酒澆三斗。宮詞唾百章。阮琴師校尉。琴訣受嵇康。似玉風神異。如蘭氣味長。坦懷無戚戚。明見笑佞佞。草檄堪醫疾。鍼詩可治盲。博聞敵武庫。高價重珠囊。憂患經多故。艱難已備嘗。悲歌聲歷歷。雅調韻洋洋。造次必於是。中心何日忘。生涯兩書篋。香火一禪牀。海上尋徐福。壺中覓長房。流傳雖若此。真僞甚難詳。水國波奔激。仙鄉路渺茫。孤身朝北闕。皓首歎東陽。險韻囁佳句。殘英嗅冷芳。仁人今尚在。箕子本佯狂。洪範明皇極。彝倫絃有常。百王遺禮樂。三代舊軒裳。會補南極缺。能令北斗昂。無媒言嘖嘖。失志思迴遑。秋老空悲扇。天涼反賣漿。卻來頻渭釣。又絕在陳糧。志道衰猶夢。依仁老更剛。故家三徑遠。薄土一廛荒。混混常無捨。乾乾體自強。卒躬能省己。行道不踰方。寧恥身衣褐。誰嗟日食糠。起歌明月夜。舒嘯白雲鄉。綺夏終辭漢。巢由固避唐。名極得三者。柴立杙中央。榮遇傳金馬。題名刻玉堂。未窺君所蘊。徒見子之牆。遣欲絕形累。無貪不行妨。一瓢渠樂逸。陋巷我憂惶。犧易韋編暗。麟經古卷黃。著述遵輔嗣。去取笑公羊。再辨麟絕筆。重箋城復隍。焦桐人不識。獨有蔡中郎。

讀唐詩有感。復繼張敏之韻。頗有脂粉氣息。遷就聲韻故也。呵呵。

唐室承平久。遺賢不遁藏。羅紉桑幄膩。餅餌麥疇香。馬牧初蕃息。民編莫校量。邊城閱虎略。衛士斂鷹揚。禁苑晨鐘動。梨園錦障張。披香風細細。太液水浪浪。河漢明方潤。長庚淡不銜。羽旄儀兩列。冠蓋道相望。諫士陳休戚。廷臣論否臧。金石歌大雅。琴瑟奏清商。青鳥迷鷺瓦。烏衣遶畫梁。供張官府備。殺饌大官忙。

共享清時樂。殊無謗議傷。含元朝百辟。花萼宴諸王。主上貞觀聖。案觀去聲。誤作平聲。官僚魏鄭良。歲時開武講。春首闢文場。異寶浮淮水。餘糧朽鳳翔。諸羌來入衛。百濟請觀光。關塞沈烽火。鄉閭息寇攘。三春常若雨。六月不飛霜。聖德躋朝夕。仁心本就將。俯知人意順。仰視帝心當。曠騎輕關內。精兵重北疆。朝廷潛巨蠶。方鎮養貪狼。粉面三千輩。金釵十二行。持盈當忌滿。居治不知亡。相罷曲江去。權移林甫傍。華清高岬岬。驪碧蒼蒼。金屋眠春曉。溫泉浴暮涼。掖庭花爛漫。問道路彷徨。官監金犀飾。妖姬珠玉裝。危弦驚醉耳。哀調斷柔腸。燈燭暉鵝鵲。絲簧沸建章。奢淫幾桀紂。純儉劣成康。擊柝宮城遠。傳籌禁漏長。謀權長汲汲。沈醉若偃偃。未悟薪及燕。誰知病已盲。人橫碧玉笛。腰佩絳香囊。嶺表千山遠。荔枝三日嘗。仙衣吹渺渺。蓮舸泛洋洋。力士權誠重。楊釧寵不忘。承恩趨寶座。奏事近牙牀。炎惑頻侵斗。秋陽弗集房。人心咸怨怒。天象不披詳。易水聲嗚咽。燕山水鬱茫。盜賊充上郡。鼙鼓起漁陽。殺氣凌金闕。繁霜殞玉芳。環兒剛賜死。天子懼如狂。戰士皆思變。奸臣亦易常。空聞塵羯鼓。誰舞舊霓裳。忠義心徒順。英雄志自昂。翠華搖曳曳。鸞馭去遑遑。禁樹庖供豕。村民路進漿。隘兵蜀道險。糊口益州糧。靈武兵聲振。汾陽意氣剛。復收京闕克。重治寢園荒。賊勢時深蹙。官軍力益張。羽檄傳劍閣。龍駕返南方。御府仍無酒。飢民尙噉糠。邛都求道士。蓬島覓仙鄉。符使將歸漢。真妃猶憶唐。金釵分一股。鈿合劈中央。揮涕春風殿。傷心秋月堂。梧桐籠院砌。桃李映宮牆。佳夢真難得。幽懽頗有妨。春宵成怨憶。秋夜愈悲惶。尙記脩眉綠。猶思半額黃。強舒鸞被翠。閑殺鞦韆羊。陵谷俄驚海。滄浪已變隍。臨風一卮酒。聊復酌三郎。

次韻黃華和同年九日詩十首

黃華和同年九日詩以採菊東籬下悠然見南山爲韻子愛而繼之前敘思歸之心後述參玄之志所謂倒食甘蔗者也

秋香真可人不爲無人改自慚寒昔盟東籬子空待我獨搖酒卮不得寒英採臨風望故園參商二十載

其二

西風殘日秋有客嗟幽獨偶爾得香醪姿然憶霜菊世態屢變遷生人多返復十年一夢中猶未黃梁熟

其三

無花復無蝶不似今秋窮黃花歲歲別九日年年同我居北海南子在西山東公余會何日一醉閑愁空

其四

當年別吾山曾與黃華期富貴非予志卜築臨東籬今也違初心知我者其誰挂冠猶未遂寄此相思詩

其五

無意戀三公有心辭駟馬洛陽失金谷閩山有別野芳酒瀉盈樽秋香折盈把沈醉臥西風不讓梨花下

其六

汨沒紅塵中辜負黃華秋林泉與朝市試問孰爲優胡然久沈者令我心悠悠醉思山水樂夢寐空神遊

其七

歲月不我與。彈指及衰年。平生諳萬事。抵死參重玄。因緣不可滯。慎無法自然。兩邊都不立。別有壺中天。

其八

無知豈真知。無見非真見。遮照玄縱橫。機關千萬變。虎口幾橫身。臨敵經百戰。三折爲良醫。一交學一便。

其九

五流分洞下。一派起湖南。春水無心碧。秋山著意嵐。臨濟真顛漢。曹山放酒酣。許多閑伎倆。仔細好生參。

其十

水外猶逢水。山前更有山。元知非內外。更不在中間。測海纔盈掬。窺天見一斑。樞機謾謁世。一筆請君刪。

寄雲中東堂和尚

雲中種出火蓮華。到底東堂是作家。伏手骨撾腰下劍。笑人家具手中蛇。三玄戈甲徒心亂。五位君臣莫眼花。只遮些子難理會。草鞋包裹破袈裟。

謝萬壽潤公和尚惠書

多謝堂頭遠賜書。驚人才筆我難如。承當禪髓心無媿。供奉佛牙力有餘。幼子可襲先父業。游人卻到舊時居。箇中消息誰能悉。玉女乘風誇鐵驢。

燕京大覺禪寺奧公乞經藏記既成以詩戲之

詞源老去苦無多。強著閑文讀釋迦。適健免毫生月窟。光明寶紙出新羅。茶爐幾辨龍涎燼。玉板十分鳳

墨磨。此起科差真可笑。湛然陪酒更陪歌。新獲紫玉板
硯於友人

寄龍溪老人乞西巖香

寄語龍溪老古錐。西巖風韻我長思。香錢緩發鳴琴後。瓦鼎濃薰入定時。比擬梅魂祇獨步。品量龍腦可同馳。湛然鼻孔撩天大。穿過多時不自知。

謝聖安澄公饋藥

一粒靈丹寄我嘗。湛然回簡謝西堂。殺活一草真難會。藥病相治未易量。仔細嚼時元不礙。渾淪吞下也無妨。聖安骨董知多少。賣弄千年舊藥方。

和王正夫韻

壯年自笑鬢先霜。喜色眉閒一點黃。退食紫宸居鳳閣。朝天丹闕列鸞行。功名必要光前古。富貴何須歸故鄉。濟世元知有仁政。活人不假返魂香。

繼孟雲卿韻

歸與奚待鬢雙皤。無恙聞山聳岌峩。萬壑松風思仰嶠。千巖煙雨憶平坡。仰山平坡皆燕然名刹也。案
山翠微開基氣概鯨吞海。遁世生涯鼠飲河。好買扁舟從此逝。醉眠江國一漁蓑。

次雲卿見贈

濟濟千官侍玉宸。尊賢容衆更親親。風雲際會千年少。天地恩私四海均。西狩一蘇張掖亂。南巡重變大

梁春車書南北無多日。萬里河山宇宙新。一作會同文軌

和王正夫憶琴

道人塵世厭羶塵。白雪陽春雅意深。萬頃松風皆有趣。一溪流本無心。忘機觸處成佳譜。信手拈來總妙音。陶老無絃猶是剩。何如居士更無琴。

繼宋德懋韻三首

聖人開運憶斯年。睿智文明稟自天。旁午衣冠遊北海。縱橫耕釣滿居延。月氏入貢稱屬國。日本觀光列戶編。威震西溟千萬里。漢唐鴻業亦虛傳。

其二

笑我區區亦強爲。故園荒矣欲何之。讀書測海持螺測。學道窺天以管窺。疲俗不許新疾苦。濫官難撫舊瘡痍。才微任重宜求退。自有當途國手醫。

其三

廣平流落寓平城。親老家貧強苟生。炎漢蕭曹賢政事。李唐房杜美聲名。進求高譽千金重。退隱閑身一葉輕。應繼開元舊勳業。華堂鐘鼓對長檠。

和平陽張彥升見寄

天兵出雲中。一戰平城破。居庸守將亡。京畿遊騎邏。有客赴澶淵。予嘗倅開州無人送臨賀。奸臣興弑逆。時君

遠遷播。聖主得中原。明詔求王佐。胡然北海遊。不得南陽臥。寵遇命前席。客星侵帝座。萬里金山行。三經玉門過。于闐歲貢脩。燉煌兵勢挫。國維張禮義。民生重食貨。黜陟九等分。幽明三載課。小人絕覬覦。賢才無輒軻。功名本忌盈。廟堂難久坐。老矣盍歸來。歸與可重和。俯仰不心慙。寬弘從面唾。清濁自沙汰。精粗任揚簸。賦性嗜疏閒。高眠樂慵惰。蒼雞粗庖充。黃犢足犁拖。幼子專耕鋤。老妻供碓磨。隨分養餘齡。雖飢而不餓。

跋白樂天慵屏圖

三盃兀兀元如道。一覺昏昏恰似真。不識香山慵睡意。知音自有箇中人。

和請住東堂疏韻

東堂不肯臥西堂。珍御鮮食別樣裝。枉費青帘三百尺。雲中公子不來嘗。

寄倪公首座

亭監逃海淹蠶瓮。隆老成龍過禹門。獨有倪公尙癡坐。幾時承繼萬松軒。

和呂飛卿

一試戎衣天定初。達賢不得退閒居。盟津旣渡諸侯喜。親見王舟躍白魚。

戲陳秀玉并

萬壽堂頭自汴梁來。遠寄萬師偈頌。舊本有和節度陳公一絕云。清溪居士陳秀玉。要結蓮宮香。

火緣。賺得梢翁搖艫棹。卻云到岸不須船。噫。三十年前已有此段公案。湛然目清溪爲昧心居士者。厥有旨哉。僕本參萬松時。秀玉盛稱老師之德業。爾後少得受用。皆清溪導引之力也。每欲報之。秀玉竟不一染指。故作是詩以戲之。

不見桃源路渺茫。騎驢覓驢清溪招引到仙鄉。未當好心湛然幸得齣齣飽。也須吐卻擘與些兒不肯嘗。恰似真个

湛然居士文集卷十

扈從冬狩

癸巳扈從冬狩。獨予誦書於穹廬中。因自譏云。

天皇冬狩如行兵。白雉一塵長圍成。長圍不知幾千里。蟄龍震慄山神驚。長圍布置如圓陣。萬里雲屯貫魚進。千羣野馬雜山羊。赤熊白鹿奔青驤。壯士彎弓殞奇獸。更驅虎豹逐貪狼。御閑有馴豹。縱之以搏野獸。獨有中書倦遊客。放下氍毹話周易。

用秀玉韻

甲午之秋。秀玉殿學。遠以新詩寄東坡杖。因用原韻謝之。

七尺烏虬乳節堅。清谿寄我我欣然。敢輕墨鐵三千兩。遠勝黃金百萬錢。好句君堪坡老敵。清詩予負定公先。他年攜此林泉去。靜倚松軒誦大全。

送西方子尙

西方子尙氣凌雲。一見忘年各任真。陰德傳家宜有慶。義方垂訓不違仁。雄文固可魁天下。確論曾無詭聖人。天降英才須有意。好將吾道濟斯民。

用樗軒散人韻謝秀玉先生見惠東坡杖

圓方頂足法高卑。五九蒼蒼老節奇。一日湛然獲二寶。東坡鐵杖寂通詩。

和邦瑞韻送行

幸有和林酒一樽。尙醜出於和林城故有是句地爐煨火爲君溫。昔年相見興三歎。此日臨行贈一言。士行莫忘直報

怨。人情須信害生恩。而今躍入驚人浪。珍重風濤過禹門。

謝西方器之贈阮杖并序

了然居士素蓄東坡鐵杖。洎地字號阮。真絕世之寶也。天兵旣克汴梁。先生攜二君來燕。欲藏之。恐不能終寶。欲贈湛然。南北相去。不知其幾千里。慮中道浮沈。是以獻諸秀玉殿學。田公奉御。欲轉致於予也。甲午之秋。陳田入覲。果饋之於我。亂道數語。用酬厚意。

睢陽三絕從來傳。坡仙鐵杖爲之先。宋朝四美豈易得。地君神器稱乎賢。了然居士隱洛瀍。讀書好古有積年。擒龍捉日獲二寶。寶之鑿棟屋壁穿。龍庭萬里疊山川。欲來饋我嗟無緣。將奪固與此理玄。慙慙攜贈陳與田。陳田今歲來朝天。惠然出賜穹廡前。烏虬入手蒼壁懸。恍然遺世如登仙。長蛟倚壁光娟娟。鱗介欲生如蜿蜒。澄澄秋月瑩朝鏡。須臾洗盡予腥羶。足方法地頂法乾。四十五節松柏堅。七尺烏金三十兩。微篋瑟瑟鳴哀蟬。雲頂纖纖空腹圓。十三玉柱鴻翩翩。耽耽雲坐踞猛虎。巖巖山口雙雙絃。鐵君伴我遊林泉。足疾頓減衝雲煙。臨風三弄碎瓊玉。清商秋水聲涓涓。安仁得此如臨淵。子聃求杖不惜錢。湛然坐受匪勞力。不勝其服心胡然。西方諷我求終焉。故令二友相招延。抱桐扶杖閭山巔。舉觴笑詠秋風邊。

了然居士作鐵君傳云。長七尺。重三十兩。頂圓方足。中有數竇。凡四十五節。世傳稱生造。又云。昔顯宗東宮時。常讀東坡鐵杖詩。因召侍臣。子瞻問杖之存亡。子瞻以在睢陽爲對。因以數千緡購於張文定公之孫。其孫藏於棟子。瞻竟不得一見。云。地字。阮亡宋之故物。天地玄黃。此阮爲絕寶也。泰和間。祕於禁中。待詔孫安仁之姪。以琴阮得入侍。上以此阮賜之。安仁屢求之。其姪以阮見寄。舊制宮掖中。侍人不許與親戚通耗。安仁冒法得之。其好事有如此者。故予引用其語云。

繼希安古詩韻

垂盡絲綸不上鉤。冥鴻高舉弋無由。不圖垂譽流千古。安肯低眉謁五侯。

和非熊韻

蠻觸功名未足誇。欣然一笑付南華。他年擊破疑團後。始覺從來盡眼花。

和非熊韻

藹藹英聲鎮北州。非熊人物本風流。時逢佳客開青眼。久領元戎尙黑頭。已發豐城神劍出。休嗟暗室夜光投。驅兵經略關中了。題遍長安舊酒樓。

過深州慈氏院

今年扈從次饒溝。暫解征鞍慈氏遊。世變劫灰何所有。人隨兵火鮮館留。堂堂聖像孰曾識。燁燁眞詮詎可求。醉墨淋漓灑塵壁。使人知我過深州。

用李若實韻

多病逢秋苦未宜。天涯屈指故人稀。塵飛滄海悲人世。夢斷黃梁笑錦衣。靜樂浮榮難兩得。宦情歸興本

相遠高山流水無窮思。撫弄絲桐爲發揮。

繼崔子文韻

崔子龍鐘亦可憐。臨風相送我胡然。君來玉塞三千里。余隱龍沙二十年。美玉詎容藏韞櫝。精金到底入鈞甄。他時定下搜賢詔。先到河東汾水邊。

繼武善夫韻

老子年來酷愛閑。不堪白髮映蒼顏。十年與廢悲歌裏。半世干戈寤寐間。北闕欲辭新鳳閣。東州元有舊閭山。熊經鳥引聊終老。崑下疎松正好攀。

鼓琴

宴息穹廬中。飽食無用心。讀書費目力。苦思嫌哦吟。樗博近博徒。圍棋殺機深。洞簫耗余氣。纂筑惡鄭音。呼童炷梅魂。索我春雷琴。何止銷我憂。還能禁邪淫。正席設棊几。危坐獨整襟。尋徽促玉軫。調弦思沈沈。清聲鳴鶴鸞。古意鏘石金。秋水洗塵耳。秋風振高林。清興騰八表。成速何必尋。絃指忽兩忘。世事如商參。泥塗視富貴。晝夜等古今。湛然有幽居。祇在閭山陰。茅亭遶流泉。松竹幽森森。攜琴當老此。歸去投吾簪。

扈從羽獵

湛然扈從狼山東。御閑天馬如遊龍。驚狐突出過飛鳥。霜蹄霹靂飛塵中。馬上將軍弓挽月。脩尾蒙茸臥殘雪。玉翎猶帶血模糊。驟駢嘶鳴汗微血。長圍四合匝數重。東西馳射奔追風。鳴鞘一震翠華去。滿川枕

藉皆豺熊。自笑中書老居士。擁鼻微吟弓矢廢。向人忍恥乞其餘。瘦兔癩獐紫駝背。吾儒六藝聞吾書。男兒可廢射御乎。明年准備秋山底。試一如臯學射雉。

狼山宥獵

扈從車駕出獵狼山。圍既合。奉詔悉宥之。因作是詩。

君不見。武皇校獵長楊裏。子雲作賦誇奢靡。又不見。開元講武驪山傍。虜虜脩史譏禽荒。二君所爲不足法。徒令千載人雌黃。吾皇巡狩行周禮。長圍一合三千里。白羽飛空金鑪鳴。狡兔雄狐應弦死。翠華駐蹕傳絲綸。四開湯網無掩羣。天子恩波沐禽獸。狼山草木咸忻忻。

對雪鼓琴

君不見。党侯賞雪斟羊羔。蛾眉低唱白雲謠。慷慨樽前一絕倒。高談闊論誇雄豪。又不見。陶穀開軒收竹雪。旋燒活火烹團月。笑然吟鬚吟雪詩。冷淡生活太清絕。清歡濁樂爭相高。至人視此輕鴻毛。嗜音酣酒元麤俗。癖茶嚼句空劬勞。龍庭飛雪風淒冽。天地模糊同一色。數卮美酒溫如春。三弄悲風絃欲折。酪奴歡伯持降旌。詩聲歌韻不敢鳴。党武陶文都勘破。真識此心無一箇。

寄冰室散人

佳人元不是。摩登幻術因。循汙此生對雪鮮。吟飛絮句滅燈籠。審斷絃聲。鳳樓瀟灑閑瓊館。冰室深沈冷玉笙。好訪龍溪善知識。傳燈何啻愍持名。三學尼長老道號龍溪老人

寄平陽潤和尚

張彥升寄平陽潤和尚所著金盞兒十首因作詩寄潤公

十首新詞寄我時。淨名手段我獨知。解將沒孔鍊鎚子。打就無聲金盞兒。言外翻騰閑曲調。劫前拈弄古鈴鎚。清和露布殺公案。賺得衰翁一首詩。

紅梅

東坡謂認桃無綠葉辨杏有青枝太麤俗因潤飾其語成之

瘦損佳人冰雪枝。天教妝抹入時宜。小桃嫌鋪翠雲葉。疎杏驚看碧玉枝。李白詩成怒妃子。吳宮宴罷醉西施。而今辜負黃昏月。只少西湖處士詩。

其二

天仙皎皎素羅裳。淡抹濃塗總不妨。酒暈半潮妃子醉。胭脂初試壽陽妝。肯同桃杏迷逢蝶。本與松筠傲雪霜。顧影也應悲漢室。臨風猶似怨三郎。

吟醉軒

脩竹千竿五畝宮。幽居活計興無窮。清詞麗句梅詩老。白髮蒼顏歐醉翁。灑墨疾書千首敏。浮白痛飲百樽空。醉吟聞有香山老。倒用顛拈意暗同。

寄西菴上人用舊韻四首

別後無緣得再參。新詩重寄代和南。他年放我休官去。只向雲川結小庵。功名我已讓曹參。又見曹參定五南。布韞青鞋從此始。濟源有問侍中庵。

多幸松軒得罷參。玉泉山水勝江南。泉邊便作歸休計。何必香山覓舊庵。

憶昔吾師

萬松老也。

放晚參。揚兵西北擊東南。一聲霹靂龍飛去。尙有癡人宿草庵。

和漁陽趙光祖二詩

巖廊深責忝疑丞。位重材輕負寵榮。猾虜七擒輸葛亮。奇謀六出媿陳平。未行禮樂常如歎。欲挂衣冠似不情。何日對君言我志。夜闌秉燭笑談傾。

其二

生民垂欲陟春臺。南北妖氛絕點埃。典禮已隨前代廢。遺音猶怨後庭哀。十年歎我垂垂老。萬里憐君得得來。此語縱無多忌諱。絨題未可對人開。

自贊

美髯中書白衣居士。從他抹粉施朱。一任安名立字。手中玉麈震雷音。說盡人間無限事。

再過太原題覃公秀野園

君實洛陽園。花竹秀而野。先生取此意。開園臨古社。土階甃以石。茅亭略其瓦。佳木碧雲搖。清泉寒玉瀉。開軒扣琴筑。撫景飛觴舉。我來正秋晚。殘英折盈把。粲然啓一笑。琅然歌二雅。將歸且裴徊。幽尋未能捨。呼酒盡餘興。索筆爲模寫。緬懷溫國公。重名滿天下。寥寥二百年。童卒傳司馬。君侯築茲圃。如有所慕者。晞顏顏之徒。予亦斯人也。

和韓浩然韻二首

浩然以昇元寶器、玉潤鳴泉、二琴見贈。勉和來詩。用酬厚意。

標格雄雄蘊藉深。烏龍胸臆隱雷音。一雙神器波及我。不負分金結義心。浩然得四琴。分二

又

一曲風高奏古宮。坐賄神物愧無功。千金厚惠將何報。鵠表慙慙效孔融。

張漢臣因入覲索詩

漢臣千里覲龍庭。欲使天皇致太平。十事便宜言懇切。三千貔虎令嚴明。好籌廟算如留相。莫憶鱸魚似季鷹。一統要荒君勉力。雲臺須占最高名。

和謝昭先韻

失笑爲劣得奚優。遇流而行坎則留。笑視紛紛兒女輩。成是敗非徒相尤。棄人所取取所棄。獨識萬松爲出類。本欲心空及第歸。暮請晨參惟一志。浮生迅速奔隙駒。無窮塵劫元斯須。參透威音劫前事。花開枯木誰云枯。河朔干戈猶未息。西域十年空旅食。賢人退隱予未能。鈞衡曠位虛名極。真人應運康世屯。數願寬詔垂絲綸。沛若恩波淪骨髓。皇皇四海咸蒙春。漢唐疆宇非爲大。戍守西臨玉關界。百濟稱藩過海門。鄙語粗言其大概。天皇自將辦多多。天兵百萬涉長河。京索爲空汴梁下。秦皇漢武疇能過。凜凜威聲震天宇。不殺爲功果神武。朔南一混車書同。皇業巍巍跨千古。先生吾邦之彥兮。□琴書而自怡。勁挺松

柏操磊落英雄姿。明正道。無邪思。一貫詩書繼先覺。兩全才德真吾師。王謝來江左。家學易道豈忘貽。須世須君展驥足。政要再鑿人耳目。小子區區何所視。但願天衷俞奏鸚。

德恆將行以詩見贈。因用元韻以見意云。

國士朝黃屋。無辭路八千。徒嗟蘇子困。誰識禰生賢。腰下無金印。山中有翠煙。英雄須有用。勉力待中年。

送文叔南行

李子敦純不入時。而今矢志又南歸。縱無手內毛生檄。自有囊中菜子衣。未得忠貞毘聖主。且將甘旨事慈闈。鶴雛不忘衝天志。直待三年更一飛。

和馮揚善九日韻

馮君今歲又離家。攜手廣酬海一涯。秦漢興亡真夢寐。蘇張轆軻莫吁嗟。孔融座上樽盈酒。靖節籬邊菊有華。何日公餘同此樂。西風一醉泛流霞。

示石州劉企賢

西州來索湛然詩。笑點霜毫錄鄙辭。底事行藏元有數。斯文否泰本由時。碩材未信明君棄。雅操何慙暴吏欺。此語頗涉人忌諱。等閒勿使細民知。

和劉子中韻

蓬山散人劉翽子中。頗通儒。幼依全真出家。今已還俗。故有擇術不可不慎之句。

蓬山北海遊。珥筆陳良謀。徒步而南來。意氣凌馬周。貪吏亂法令。如茨不可束。子中有大志。每甘跨下辱。他日得從龍。其鋒誰敢觸。今日君子來。非爲五斗粟。君子慎擇術。痛恨陪全真。調心正是妾。堪笑學鳥伸。一日錯下脚。萬劫含酸辛。平生大夢中。不識菴中人。一言贈吾子。宗匠宜相親。

李庭訓和予詩見寄復用元韻以謝之

忝位台司歲月深。中書自笑不如岑。殷周禮樂真子事。唐舜規模本素心。鄭五每慚難作相。胥靡終欲強爲霖。隴西妙語虛推獎。舒卷寒窗盡日吟。

和黃山張敏之擬黃庭詞韻

黃山無媒亦無梯。蕭條白晝關荆扉。凌晨端坐漱玉池。闌干首宿先生飢。惠然寄我黃庭詞。浩然一笑幾脫頤。一鶴南翔一不飛。十年一夢今覺非。故山舊隱蒼松欹。而今老盡虬龍枝。曾學四老餐紫芝。從譏懷寶而邦迷。塵緣一掃無子遺。隔穀觀月猶依稀。汪洋法海無邊涯。螢光詎可窺晨晞。蓮花自是生汗泥。汗泥不染清涼肌。彩雲易散碎琉璃。人間四相天五衰。有爲無爲俱有爲。壽窮塵劫元非遲。湛然醉搖芭蕉卮。薔薇深醺書淋漓。白眼一望須彌低。黃山先生耽書癡。退藏不露龍麟姿。對人不恥弊縕衣。自甘貧困元知微。籬邊黃菊香離披。門前山色寒參差。不以下體遺葑菲。新詩遠寄盤龍螭。胸中滿貯夷齊薇。忘機臨水狎鷗鷺。燕居申申不愆儀。含光隱秀如文犀。乘閑綸釣垂清漪。躬耕禾黍方離離。須信君子能自卑。予知先生之獨悲。深憂海內生民疲。生民擾攘如夢絲。笑予素餐徒位尸。先生識鑒如元龜。旁通發而爲

聲詩照我穹廬生光輝。窮通進退元有時。至人終不貪危機。他時天子求墳隍。欲行周禮脩周基。先生好應千年期。沙堤行人羨輕肥。鳳凰到底鳳池棲。太平鈞石須君持。蒼生未濟無言歸。

寄曩公堂頭同參

曩公閒道住南宮。笑寫新詩託去鴻。準備金桃三百顆。因風寄與老髯公。

寄移刺子春

說與沙城劉子春。湛然雖老整思君。同遊青塚秋將盡。共飲天山酒半醺。蠶紙題詩熟鍊字。氈廬談道細論文。五年回首真如夢。衰草寒煙正斷魂。

寄妹夫人

三十年前旅永安。鳳蕭樓上倚闌干。先叔故居之樓名初學書畫同遊戲。靜閱琴棋相對閑。聚散悲歡燈影裏。興亡成敗夢魂閒。安警風送來天際。望斷中州一髮山。

送姪九齡行

我欲歸休與願違。而方知命正宜歸。閩山自有當年月。一舸西風賦式微。

送姪了真行

吾兄惟世祿。襲封食東平。幼子死王事。長安閨門英。孀居二十年。禮佛讀傳燈。一旦遇宗匠。了真訓其名。前歲陽翟破。道服潛偷生。寧死不受辱。託疾燕山京。湛然憐孤族。贖汝爲編氓。死生本如夢。寵辱真若驚。

莫忘亂離苦。長思厭世情。三學有龍溪。叩參宜盡誠。喝碎須彌山。打破乾闥城。兩頭俱放下。枯木一枝榮。

和少林和尚英釋中山堂詩韻

我愛嵩山堂。山堂杖寂寂。暮煙自搖蕩。白雲風出入。冷冷溪水寒。細細琴絲溼。離塵欲無事。又有閑踪迹。

和武善夫韻

不得潛身似許由。鑿閭辜負萬山秋。未竭犬馬雖爲慊。忽憶猿鶴卻自羞。黃閣賴懸新篆印。白雲元有舊漁舟。他時雪夜尋良友。且學當年王子猷。


和馮揚善韻

揚善從來慕晉卿。滄浪濁處不濯纓。關東易學孰能與。冀北詩聲莫與京。今日窮途雖蹇剝。他時行道自亨貞。須知遜世元無悶。莫怨龍鍾出帝城。

和董彥才東坡鐵杖詩二十韻

女媧未補青天裂。神液飛精散爲鐵。嵇生箕踞鍛洪爐。白汗醜漿滴清血。黑虬彷彿欲飛躍。鱗介蒼蒼生乳節。情知中散氣凌雲。肯與凡工爭巧拙。柳君傳與東坡老。神物終須歸俊傑。坡仙爲壽文定公。酬和新詩誇勝劣。觀妙堂名龍尾硯。睢陽并此爲三絕。睢陽城破兵火炎。神器不隨煙焰滅。了然居士出伊洛。登山度水相扶挈。燕然分付我清谿。妙語雕鐫跨先哲。遠來攜贈白鬢老。天理似爲予所設。湛然忝位本無功。致主澤民媿皋契。再遊北海復何恨。與君同步龍沙雪。大澤深山無所驚。掃除魍魅驅兇豔。輕篔歷歷

吐微語。閑對幽人如鼓舌。有如拈起擊須彌。須彌擊碎同丘垤。雲門遠遁德山去。敢對髯翁開口說。一時
驚倒野狐禪。奔走不來予闖闖。他年神武掛冠去。誰知劫外乾坤別。橫擔此杖入千峯。大方獨步無蹉跌。



湛然居士文集卷十一

用張道亨韻

道亨子故人也。閒關二十年。今寓居平水。以詩見寄。因和其韻以謝之。

大安之季君政乖。屯爻用事符雲雷。邊軍驕懦望風潰。燕南趙北飛兵埃。民財已竭轉輸困。元元思治如望梅。太白經天守帝座。長星勾已拆中台。玄臺密表告天道。災妖變異無不該。奸臣構禍謀不軌。魚鱗鱗首侵宸階。喋血京師萬人死。君臣自此相嫌疑。居庸失守紫荆破。天兵掣電騰八垓。潛議遷都避凶禍。銜枚半夜宮門開。河表偷生聊自固。京城留後除行臺。力窮食盡計安出。元戎守節甘自裁。虬龍奮迅脫大難。微波沈滯獨黃能。王師神武本不殺。一發鹿臺能散財。威聲遠震陝洛懼。勢同拉朽如枯摧。髯公退縮養愚拙。白麻一旦天邊來。萬里龍庭謁天子。輶車軋軋風塵埋。言輕無用自緘默。浮沈鷓鴣相趨陪。布幕氈廬庇風雨。日中一食如持齋。瀚海波聲寒洶湧。金山峯勢高崔嵬。十年行役亦艱苦。鹽車強駕同駑駘。美渾如飴潤喉吻。伶仃獨撥寒爐灰。故園夢斷幾千里。燕然回首白雲堆。彈缺悲歌望明月。山城明月空徘徊。往事如絲不敢憶。令人感慨生餘哀。聖人繼起踐九五。歡聲騰沸天之涯。萬國梯航喜奔走。幣帛交列陳瓊瑰。天子恩威溢中外。遠爾翕然無不懷。四民樂業庶政舉。宗臣戮力諸王諧。行殿受朝設鐘鼓。明堂祭祀陳大壘。卿雲輪菌自紛郁。妖星不復侵天街。否道已窮受諸泰。人心已順天心迴。制度一新從簡

略禁網疎闊如天恢。賢才尙隱若冥雁。區區弋人何慕哉。自慚忝位司鈞軸。可憐多士無梯媒。願學留侯引年去。不與赤松遊蓬萊。閩陽舊隱度殘朽。扁舟蓑笠五湖涯。

題龐居士陰德圖

易易難難各一機。非難非易亦新奇。若將三句分優劣。露挂燈籠暗皺眉。

和馮揚善韻

天道不可窮。此理自古然。大暴壽盜跖。至仁天顏淵。偉材鮮遭遇。君臣難兩全。庸愚厭梁肉。廣文寒無氈。未逢知音人。伯牙故絕絃。我愛馮公子。孔教窮高堅。憂道不憂貧。一室如馨懸。卻笑庠序生。供薦徒備員。詩書貯便腹。一斗吟百篇。遠蹈顏孟迹。近比蘇黃肩。寧受跨下辱。不爲天下先。昇平已有期。上道化日躔。九州成一統。刑賞歸朝權。汴梁三戰定。樂浪一檄傳。先生謁承明。萬里來秦川。徒步沙磧中。往復幾一年。揅著說易傳。應詔命席前。十年符億兆。一世盈十千。男兒志在道。何論賦與胼。一旦得榮遇。閭巷車馬填。窮通固由命。何必興敖煎。用之自可進。舍之便可還。自笑髯中書。有過仍不悛。三代不同禮。勉欲相襲沿。賢人正退隱。強起居官聯。冰炭豈共器。安可渾愚賢。可惜和氏姿。庸工浪雕鐫。不能作大器。取次成棄捐。潛龍喻君子。或躍或在田。未遂馬周志。好壘揚雄廛。伏臘粗酒脯。旦夕充羹饘。窮途不足泣。弔影無自憐。人生一瞬息。日月如瓊旋。學道如牧羊。後者爲之鞭。離羣謝富貴。遁世安林泉。勿學躁進人。扼腕長呼天。

和秀玉韻并序

三學老人背佛說法。教僧幽半藏。謗之。清谿老人有頌。因和之。

清谿作寢語。湛然大笑之。僅能知大用。尙未識天機。貪隨言語轉。錯認二阿師。箇中關捩子。卓然絕百非。三學未嘗坐。何說非與是。半藏未有言。奚論讚與毀。解語非干舌。能知誠匪智。爲報清谿公。無事莫生事。

示從智

知人者明。自知者智。仁人一言。溥哉其利。

答聶庭玉

文章太守鎮榆關。遠寄新詩與湛然。卓爾功名君勉力。歸與活計我加鞭。扶衰幸有東坡杖。遣興猶存玉澗泉。布襪青鞋任真率。東垣山水不拈錢。

繼柏巖大禪師韻

行盡千程與萬程。誰能退步見巖宸。饒渠解釋庭前雪。笑彼難除室外塵。翡翠簾前猶是汝。琉璃殿上更何人。直須鶴出銀籠外。受用壺天不夜春。

和張善長韻

下馬如虹氣焰雄。驚人詩筆有誰同。銀鈎老字學顏體。玉振奇辭類國風。今日白衣聊養素。他年皇屋好推忠。經營江左須豪哲。占取雲臺第一功。

愛棲巖彈琴聲法二絕

須信希聲是大音。猿多則亂吟多淫。世人不識棲巖意。祇愛時宜熱鬧琴。
多著吟猿熱客耳。強生取與媚俗情。純音簡易誰能識。卻道巖棲無木聲。

冬夜彈琴頗有所得亂道拙語三十韻以遺猶子蘭序并

余幼年刻意於琴。初受指於弭大用。其閑雅平淡。自成一家。余愛棲巖。如蜀聲之峻急。快人耳目。每恨不得對指傳聲。閒關二十年。予奏之。索於汴梁得焉。中道而卒。其子蘭之琴事。深得棲巖之遺意。甲午之冬。余扈從羽獵。以足疾得告。凡六十日。對彈操弄五十餘曲。棲巖妙旨。於是盡得之。因作是詩。以記其事云。

湛然有琴癖。不好凡絲竹。兒時已存心。壯年學愈篤。倉忙兵火際。遺譜不及錄。四首二十秋。絲桐高開束。棲巖有後人。萬里來相逐。能繼箕裘業。待予爲季叔。今冬六十日。對彈五十曲。五句記新聲。十朝溫已熟。高山壯意氣。秋水清心目。陽春撼瓊玖。白雪碎瑤玉。洛浦太含悲。楚妃歎如哭。離騷泣鬼神。止息振林木。秋思盡雅興。三樂歌清福。自餘不暇數。渴心今已沃。昔我師弘君。平淡聲不促。如奏清廟樂。威儀自穆穆。今觀棲巖意。節奏變神速。雖繁而不亂。欲斷還能續。吟猿從簡易。輕重分起伏。一聞棲巖聲。不覺傾心服。彼此成一家。春蘭與秋菊。我今會爲一。滄海涵百谷。稍疾意不急。似遲聲不踖。二子終身學。今日皆歸僕。我本嗜疎懶。富貴如桎梏。幸遇萬松師。一悟消三毒。早晚掛冠去。閭山結茅屋。蔬筍粗充庖。糲飯炊脫粟。有我春雷子。豈憚食無肉。旦夕飽純音。便是平生足。

夜坐彈離騷

一曲離騷一椀茶。箇中真味更何加。香銷燭盡穹廡冷。星斗闌干山月斜。

彈秋宵步月秋夜步月二曲

碧玉聲中步月歌。彈來彈去不嫌多。從教人笑成琴癖。老子佯呆不管他。

彈秋水

信意彈秋水。清商促慘成。只疑天上曲。不似世閒聲。海若誠無敵。河神已請平。三朝不彈此。心竅覺塵生。

彈秋思用樂天韻二絕示景賢

秋思而今不入時。平和節奏苦嫌遲。香山舊譜重拈出。不問知音知不知。

齟齬斷似烏蛇蚶。瑟瑟微如古殿苔。玉澗鳴泉獨受用。穹廡祇少景賢來。

彈廣陵散終日而成因賦詩五十韻并序

嵇叔夜能作廣陵散。史氏謂叔夜宿華陽亭。夜中有鬼神授之。韓皋以爲揚州者。廣陵故地。魏氏之季。母丘儉輩皆都督揚州。爲司馬懿父子所殺。叔夜痛憤之懷。寫之於琴。以名其曲。言魏之忠臣。散殄於廣陵也。蓋避當時之禍。乃託於鬼神耳。叔夜自云。靳固其曲。不以傳袁孝尼。唐乾符間。待詔王遼爲季山甫鼓之。近代大定閒。汴梁留後完顏光祿者。命士人張研一彈之。因請中議大夫張崇爲譜序。崇備敘此事。渠云。驗於琴譜。有井里別姊辭卿報。義取韓相投劍之類。皆刺客磊

政爲嚴仲子刺殺韓相俠累之事。特無與揚州事相近者。意其叔夜以廣陵名曲。微示其意。而終畏晉禍。其序其聲。假聶之事爲名耳。韓梟徒知託於鬼物以避難。而不知其序其聲皆有所託也。崇之論似是而非。余以爲叔夜作此曲也。晉尙未受禪。慢商與宮同聲。臣行君道。指司馬懿父子權倖人主。以悟時君也。又序聶政之事。以譏權臣之罪。不啻俠累。安得仗義之士。以誅君側之惡。有所激也。不然。則遠引聶政之事。甚無謂也。秦和閒。待詔張器之。亦彈此曲。每至沈思峻迹二篇。緩彈之節奏。支離未盡其善。獨棲巖老人混而爲一。士大夫服其精妙。其子蘭亦得棲巖之遺意焉。

湛然數從軍。十稔苦行役。而今近衰老。足疾困卑溼。歲暮懶出門。不欲爲無益。穹廬何所有。祇有琴三尺。時復一絃歌。不猶賢博奕。信能禁邪念。閒愁破堆積。清旦炷幽香。澄心彈止息。薄暮已得意。焚膏達中夕。古譜成巨軸。無慮聲千百。大意分四節。四十有四拍。品弦欲終調。六絃一時劃。初訝似破竹。不止如裂帛。忘身志慷慨。別姊情慘戚。衝冠氣何壯。投劍聲如擲。呼幽達穹蒼。長虹如玉立。將彈怒發篇。寒風自瑟瑟。瓊珠落玉器。雹墜漁人笠。別鶴唳蒼松。哀猿啼怪柏。數聲如怨訴。寒泉古澗澀。幾折變軒昂。奔流禹門急。大絃忽一捺。應弦如破的。雲煙速變滅。風雷恣呼吸。數作撥刺聲。指邊轟霹靂。一鼓息萬動。再弄鬼神泣。叔夜志豪邁。聲名動蠻貊。洪爐煨神劍。自覺乾坤窄。鍾會來相過。箕踞方袒裼。一旦譖殺之。始知襟度阨。新聲東市絕。孝尼無所獲。密傳迨王遯。曾爲山甫客。近代有張研。妙指莫能及。琴道震汴洛。屢陪光祿席。

器之雖有聲。鍊此垂頭白。中間另起意。沈思至峻迹。節奏似支離。美玉成破壁。爲山虧一篲。未精誠可惜。我愛棲巖翁。翻聲從舊格。始終成一貫。雅趣超今昔。三引入五序。始作意如翕。縱之果純如。將終繳而繹。嵇生能作此。史臣書簡策。又謂神所授。傳自華陽驛。韓皋破是說。以爲避晉隙。張崇作譜序。似是未爲得。我今通此論。是非自懸隔。商與宮同聲。斷知臣道逆。權臣倖人主。不啻韓相賊。安得聶政徒。元惡誅君側。上欲悟天子。下則有所激。惜哉中散意。千古無人識。

吾山吟

兒鑄學鼓琴。未期月。頗能成弄。有古調絃泛聲一篇。鑄愛之。請余爲文。因補以木聲。稍隱括之。歸於羽音。起於南宮。終於大簇。亦相生之義也。以文之首句有吾山之語。因命爲吾山吟。聊塞鑄之請。不敢示諸他人也。湛然題。

吾山吾山予將歸。予將歸深溪。蒼松圍茅亭。肩柴扉。水邊林下。琴書樂矣。水邊林下。琴書樂矣。不許市朝知。猿鶴悲。吾山胡不歸。

從萬松老師乞玉博山

吾師珍惜玉山爐。可歎雕紋朴喪初。無黨無偏三足峙。不緇不磷一心虛。禮佛誦讀須資汝。示衆拈香正起予。對此好彈三澗雪。因風遠寄萬松書。

寄萬壽潤公禪師用舊韻

懶答禪師一紙書。禪師佳句古誰如。不才歎我垂垂老。美裕憐君綽綽餘。斷臂志能如慧祖。點頭終不似雲居。三關參到縱橫處。識破黃龍腳似驢。

寄聖安澄公禪師

澄公屢有寄來書。不著寒溫問訊予。老柏依然籠古殿。庭中有怪栢數株。旃檀無恙鎖精廬。金鱗透網三乘外。大隱居鄺千載餘。聖安居市中。案聖安崇效兩寺。今皆近南偏。祇有些兒堪恨處。向人剛覓護身符。

寄甘泉禪師謝惠書

萬松節外有孫枝。德業文章冠一時。不惜臨風寄新句。知音消得湛然詩。

送房孫重奴行

汝亦東丹十世孫。家亡國破一身存。而今正好行仁義。勿學輕薄辱我門。

從龍溪乞西巖香并方

余愛龍溪老人之西巖香。屢乞之。每恨得少。旋踵而盡。因道鄙語乞香并方。

我愛龍溪新樣香。西巖風韻卒難忘。深玄欲說舌頭短。妙觀先通鼻孔長。秋水彈時宜受用。碧巖讀處更相當。清香妙譜都拈出。莫惜十年舊藥方。

乙未元日

劫前別有一壺天。萬古長空無後先。建化門頭聊爾爾。也隨徒衆賀新年。

付從究

曠劫茫茫困路塵。回頭便是故園春。而今既遇松軒老。究取元來不死人。

旦日遺從祖

乙未旦日從祖索詩。浪道數句以遺之。

塵世春風歲又遷。僚屬來賀古川前。誰知萬法生心上。不覺雙毛落鬢邊。人生能得幾緡屐。文章不直一文錢。威音那畔乾坤別。且道而今是幾年。

旦日示從同仍簡忘憂

乙未旦日從同索詩。因道拙偈二十韻。仍簡忘憂。

昔我馳星輶。駐車歸化城。汝方來樞衣。從同訓其名。侍予垂十年。百事無一成。律歷且及半。琴道猶未精。禪書置一隅。尙未窮一經。大道若滄海。萬古長澄清。酌之而不竭。注之而不盈。偃鼠得滿腹。亦足飽鯤鯨。又如大圓鏡。歷劫長圓明。中間無影像。應物不現形。漢胡遞相照。出沒能縱橫。又如萬鈞鐘。寂然藏雄聲。隨叩而卽應。圓音自鏘鏗。小擊而小響。大撞而大鳴。又如長明燭。積歲長熒熒。分爲百千萬。光明如日星。惠之而不費。是爲無盡燈。日月照天下。不可語瞽盲。雷霆碎山岳。鬻者未曾聽。枯木元無花。卻怨春不平。作偈以勸汝。可以爲盤銘。

元日勸忘憂進道

乙未元日忘憂居士索詩。勉道數語。因勸其進道云。

劫外風光別人閒。日月遷南洲。添一歲。北海又三年。榮利蝸黏壁。功名蟻慕羶。萬緣都放下。好扣祖師禪。
轉燈

乙未元日安慶以轉燈見贈。忘憂居士索詩。走筆作偈。以警世云。

安慶作戲燈。惠然來贈我。藏燈藉微明。細火薰其座。乘茲風火力。盤旋如轉磨。中有角抵人。揮臂不知禍。團團十方匝。輪迴莫能越。此燈雖戲具。無果大因果。三世塵沙佛。皆如轉燈過。三千大千界。成壞亦風火。所以明眼人。重道輕利貨。生死比夢寐。榮華等涕唾。長行此觀心。人閒都看破。多少看燈人。知音無一箇。

錄寄新詩呈沖霄

沖霄酷愛玉泉詩。媿我年來無好辭。錄寄新詩三十首。莫教俗子等閒知。

寄東林

屢承東林同參賜書。未遑裁答。亂道鄙語。以代手訥云。

同參萬里寄書來。盥手緘封手自開。沒骨舌頭我難說。無根樹子若能栽。金鷄手段平翻海。任老鉤竿不釣能。何日萬松軒側畔。笑談抵掌一開懷。

借琴

龍岡居士本知音。參透淵明得趣心。暫借桐君休吝惜。玉泉習氣未忘琴。

戲景賢

景賢愛彈雉朝飛。作是詩以戲之。

牧犢曾歎雉朝飛。七十無妻是以悲。何事龍岡愛彈此。欲學白傅覓楊枝。

再用前韻

景賢彈雉朝飛。予作詩以戲之。蒙寵和。有若有餘陰乞一枝之句。予再用前韻以拒之。

遇住行雲不敢飛。一聲還噫一聲悲。蠻兒深愜龍岡意。唱得香山楊柳枝。

又

妙舞盤中塵不飛。採蓮一曲繞梁悲。慕素魯蠻獨當兩。貫珠歌韻柳腰枝。

寄景賢

因廷疾在告。彈琴逾時。腕臂作痛。自訟其癡。作詩以寄景賢。

湛然有過必人知。笑寄龍岡自訟詩。閣浮衆生苦爲樂。華嚴皇覺藥能醫。十年撮甲足疾作。三月彈琴臂力衰。因病得閑閑卻病。閑中雖病也便宜。

再用知字韻戲景賢

薄德從來總長知。龍岡又有和來詩。機關不解活龍弄。諺有癩疾還如死馬醫。大舜再逢難永訣。周公不

夢覺吾衰。鳳池元是夔龍宅。山鹿野麋終不宜。

復日前韻戲呈龍崗居士兼善長詩友

君有蠻兒我已知。湛然援筆上新詩。翠眉也惹禪心動。玉頰休教瀨髓醫。舊有藥爐雖竭底。新來鼎器卻扶衰。降降玉準能青眼。不解雲霓也自宜。西人都那白衣。

其二

行雨行雲一夜飛。襄王從此莫含悲。蠻兒侍寢龍崗老。恰似柔稊生柳枝。

慕樂天

荆水荆水出於玉泉。渾如八節灘。玉泉佳趣類香山。韋編周易忘深意。貝葉佛經送老閑。爽我琴書池五畝。侑人詩酒竹千竿。樂天活計都相似。脂粉獨嫌素與蠻。

彈廣陵散

居士閑彈止息時。胸中鬱結了無遺。樂天若得稽生意。未肯獨吟秋思詩。

戲劉潤之

從劉潤之借杜詩。因豪奪之作是詩以戲之。

休噴久假不云歸。長笑還書是一癡。居士親行萬里地。政須百註杜陵詩。

用劉潤之韻

箇中消息本忘言。一念從渠一萬年。大地遍開皆是水。頑石不擊固無煙。成佛莫落謝公後。建業從教祖

氏先。萬法悉從心地起。元來禍福不由天。

10
11
12

1
2
3
4
5

湛然居士文集卷十一

琴道喻五十韻以勉忘憂進道序

予幼而喜佛蓋天性也壯而涉獵佛書稍有所得頗自矜大又癖於琴因檢閱舊譜自彈數十曲似是而非也後見琴士弘大用悉棄舊學再變新意方悟佛書之理未盡遂謁萬松老人旦夕不輟叩參者且三年始蒙見許是知聖諦第一義諦不在言傳明矣邇因忘憂學鼓琴未期月稍成節奏又知學道之方在君子之自強耳故作琴道喻述得旨之由勉子進道之漸云

昔我學鼓琴豪氣凌青天輕笑此小技何必師成連寶架翻舊譜對譜尋冰絃自彈數十弄以爲無差肩有客來勸子因舉莊生篇時君方誦書輪扁居其前釋椎而入請何故讀殘編上古已久矣不得見聖賢遺書糟粕餘與道雲泥懸臣年七十秋雙鬢如垂絲斲輪固小巧巧性非方圓心手兩相應不能語子焉是知聖人道安得形言詮至今千載閒此論不可遷琴書紙上語妙趣焉能傳不學妄穿鑿是爲誰之愆今方謁弭君服膺乃拳拳相對授指訣初請歌水仙吟猱不踰矩節奏能平平起伏與神會態狀如雲煙朝夕從之遊琴事得大全小藝尙如此大道寧不然當年嗜佛書經論窮疏箋公案助談柄賣弄猾頭禪一遇萬松師驚駘蒙策鞭委身事灑掃搥衣且三年圓教攝萬法始覺擔板偏回視平昔學尙未及埃涓漸能入堂奧稍稍窮高堅疑團一旦碎桶底七八穿洪爐片雪飛石上栽白蓮佛祖立下風俯視威音先

忘憂西域時。師我求真筌。經今十五春。進退猶遷延。望涯自退縮。甘心嗟無緣。將求無價寶。未肯酬一錢。未啓半簧土。欲酌九仞泉。美玉付良工。良工得雕鏤。良金不受冶。徒費爐鞴煽。聞君近好琴。停燭夜不眠。彈之末期月。曲調能相連。君初未彈時。曾不知勾蠲。學道亦如此。惟患無精專。誰無摩尼珠。誰無般若船。立志勿猶豫。叩參宜勉旃。他時大徹悟。沛然如決川。毛端吞巨海。芥子含大千。瞬息一世過。生死相縈纏。此生不得覺。曠劫徒悲煎。吾言真藥石。療子沈疴痊。

彈琴逾時作解嘲以呈萬松老師

一曲悲風歷指寒。昔年曾奉萬松軒。本嫌浮脆刪吟抑。爲愛軒昂變撞敦。高趣釀成真有味。頰襟洗盡了無痕。禪人若道聲塵妄。孤負觀音正法門。

勉景賢

昨日景賢坐閒。屢稱東坡真人中之龍也。若慕其才而異其志。採其華而棄其實。又何益於事哉。因作偈以勉之云。

既慕東坡才。當如東坡志。君才如東坡。其志未相似。詩似東坡詩。字如東坡字。胡不學東坡。且學長不死。劉潤之館於忘憂門下。作述懷詩。有弟子二三同會食。誰曾開口問先生之句。余感而和之。

從來重士還相重。到底輕人卻自輕。醜廢翻然便歸去。至今高尙穆先生。

劉潤之作詩有厭琴之句因和之

學士既歸夫子道。吾儒宜識仲尼心。當年刪出詩三百。時復弦歌不廢琴。

懷古一百韻寄張敏之

興亡千古事。勝負一枰碁。感恨空興歎。悲吟乃賦詩。三皇崇道德。五帝重仁慈。禮廢三王謝。權與五伯漓。焚書燬孔孟。峻法用高斯。政出人思亂。身亡國亦隨。阿房修象魏。徐福覓靈芝。偶語真虛禁。長城信謾爲。只知秦失鹿。不覺楚亡雞。約法三章日。恩垂四百基。漢興學校啓。文作典章施。黷武疲中夏。窮兵攘四夷。嗣君恩稍失。劉氏德難衰。新室雖興難。真人已御期。魏吳將奮起。靈獻自荒嬉。賊子權移漢。奸臣鳩築郿。三朝如鼎峙。四海若琴絲。纔奉山陽主。已生司馬師。仲謀服孟德。葛亮倍曹丕。惟晉成獨統。平吳混八維。有初終鮮克。居治亂誰思。蠅螻充蘭掖。羊車遠竹岐。孫謀無遠慮。神器委癡兒。國事歸椒室。民飢詢肉糜。爲人昧菽麥。聞蟻問官私。衛瓘嘗幾諫。何曾已預知。五胡雲擾攘。六代電奔馳。川谷流腥血。郊原厭積屍。天光分曜日。地里裂瓜時。歷數當歸李。驅除暫假隋。西郵開鄯善。東鄙討高麗。鸞駕如江國。龍舟泛汴滌。錦帆遮水面。粉浪汚河湄。府藏金帛積。生靈氣力疲。盜賊天下起。章奏禁中欺。海內空龍戰。河東有鳳姿。元戎展鷹犬。頡利助熊羆。奉表遵朝命。尊王建義旗。經營於盜手。禪讓托君辭。豪哲歸吾轂。要荒入我羈。太宗真令主。貞觀有皇規。正美開元治。俄成天寶悲。曲江還故里。林甫領台司。裂土封三國。樓頭愛八姨。霓裳猶未罷。鼙鼓恨來遲。逆寇陵丹闕。君王捨翠眉。兩京賊黨滅。方鎮重權移。朱李元堪歎。石劉亦可嗤。九州重構亂。五代荐荒饑。遼宋分南北。翁孫謀禮儀。

昔宋事遂爲兄仍請隨代以序昭穆至季年遂爲翁宋爲孫

宣和風侈靡。教主德

庸卑背約絕鄰好。興師借寇資。懸知喪脣齒。何事撤藩籬。失地人皆怨。蒙塵悔可追。遼家遵漢制。孔教祖
宣尼。煥若文章備。康哉政事熙。朝廷嚴袞冕。郊廟奏墳簋。校獵溫馳射。行營習正奇。南州走玉帛。諸國畏
鞭笞。天祚驕人上。朝鮮叛海涯。未終三百祀。不免一朝危。鴨綠金朝起。鴨綠江。武元桑乾玉璽移。金兵逼
許四狩。遣傳國璽於雲後遼興大石。西域統龜茲。萬里威聲震。百年名教垂。大石林牙。遼之宗臣。挈衆而
中之桑乾。河竟不獲。武元平宋地。殷禮雜宗姬。金謂箕子之治國崇文事。拔賢尙賦詞。邦
國幅員數萬里。傳數主。凡百餘年。頗昌君洛汭劉豫立青淄。大定民興詠。明昌物適宜。日中須景昃。月滿必光虧。肘腋獨夫難。丘墟七廟隳。北
朝天輔佑。南國俗瘡痍。天子潛巡狩。宗臣嚴守陴。山西盡荆枳。河朔半豺狸。食盡謀安出。兵羸力不支。長
圍重數匝。久困再周基。太液生秋草。姑蘇遊野麋。忠臣全死節。餘衆入降麾。文獻生三子。東丹第八枝。虛
名如畫餅。遺業學爲箕。自笑蓬垂鬢。誰憐雪滿髭。撫膺長感慨。搔首幾嗟咨。車蓋知何處。衣冠問阿誰。自
天明下詔。我知素通著。發軔裝琴劍。登車執策綬。穹廬或白黑。驛騎半黃馵。肥樹白如瓠。瓊漿甘似飴。天
山連北府。天山之北。唐北瀚海過西伊。伊州之西北有瀚海天馬窮渤海。神兵過月氏。感恩承聖勅。寄住
到尋思。尋思。虔西域城名。西人云尋思。肥也。虔城也。通謂之肥城。秦尋春色多紅樹。秋波總綠陂。西域
家必有園。園必成不須賒酒飲。隨分有驢騎。畎畝棲禾粟。園林足果梨。春粳光璨玉。煮飴滑流匙。聖祖方
輕舉。明君應樂推。龍庭陳大禮。原廟獻明粢。萬國朝金陛。千官列玉墀。求賢爲輔弼。舉我忝丞疑。才德真
爲慊。顛危不解持。願從麋鹿性。豈戀鳳凰池。投老誰爲伴。黃山有敏之。

示忘憂序

余作懷古詩百韻。非徒作己。使世之人。知成敗之可鑑。出世之人。識興廢之不常也。因作偈以見意云。

歷代興亡數張紙。十年勝負一盤碁。因而識破人間夢。始信空門一着奇。

和金城寶宮旭公禪師三絕

知公已得夜明符。任運騰騰無所拘。見說金城多長者。有人青眼待君無。
南北東西總一家。纔生擬議便生瑕。人人錯認髻居士。只有禪師不眼華。
旭老今年錐也無。糞堆卻得舊明珠。穹廬半夜無燈燭。請盡平安一紙書。

再和世榮二十韻寄薛玄之

余嘗和李世榮律詩二十韻。薛玄之和元韻見寄。以求拙語。因再和之。

尚記承平日。爲學體自強。經書興我志。功業逼人忙。蟄窟長思震。葵心本慕陽。蛟龍初得雨。日月近依光。
事主心無隱。遭時策建長。引君當正道。陳事上封章。亦既尊仁義。胡爲失毅剛。箴規盡忠赤。人物敢雌黃。
斷似南山定。言令北斗昂。勸君師魏鄭。嫉惡法張綱。青眼蒙高顧。白眉忝最良。誰知天有數。不覺漢亡疆。
人笑段干木。誰師田子方。上蒼垂大命。天闕册明王。殷室君雖滅。仁人道未亡。南州遠煙水。北海幾星霜。
仁政時將治。明君國寢昌。卿雲知有慶。嘉穀又呈祥。名遂宜思退。機危乃自戕。歸與今好賦。聞道故園荒。

蘭仲文寄詩二十六韻勉和以謝之

我愛仲文公。敦純有古風。科名擢乙選。制策肯宸衷。作事能謀始。爲人克有終。養如鄒軻去聲。氣成自仲尼。鎔致主忠誠。懇容人便腹。空一朝淹驥足。百里試鳩功。牛刀聊施割。囊錐已脫鋒。屯方雷雨動。泰未地天通。聚散悲歡裏。興亡夢寐中。勢傾秦失鹿。奸殞鯨爲熊。不學東方朔。誰徵皇甫嵩。洛陽傳白傅。江夏譽黃童。上國平諸域。輿情達四聰。百司將布置。多士想登庸。未識荊州面。徒思衛玠容。中原期混一。天子訪英雄。嘉運人皆幸。亨時君又逢。汚俗風已變。明主德方隆。施雨皇恩布。如流直諫從。凱元咸戮力。稷契各言忠。我媿凡庸士。恩霑造化工。兵氛箕尾沒。劍氣斗牛衝。西華將歸馬。南陽莫臥龍。孝廉爲選舉。仁義作幪幪。歷運千年合。衣冠萬國同。草儀獨有子。行待泰山封。

又

仲文才筆冠人閒。工部壇前第一班。世上久無孔北海。雲中誰識謝東山。忘懷詩酒醒還醉。適意琴書樂且閑。野有遺賢猶未用。中書寧得不胡顏。

又

室中忝預萬松籟。脫得中間與兩頭。反覆人心厭殷室。咄嗟天下屬宗周。直須勇退中書事。未肯榮貪留國侯。收拾綸竿與蓑笠。華亭卻覓舊漁舟。

用曹楨韻。楨金城人。字幹臣。始冠。上詩於我。文采可觀。因和元韻。以勉後進云。

征南都護得旋旆。平北將軍已罷師。寰海謳歌歸大舜。明堂鐘鼓奏咸池。咸陽父老傾心日。魯國書生得志時。收拾琴書歸我去。朝廷人物有皋夔。

怨浩然

韓浩然嘗以詩許昇元寶器。玉潤鳴泉二琴。予已有謝詩。今得書。以玉潤遺周漢臣。藏昇元而託以他辭。因用浩然新韻以怨之。漢臣小字六合。予嘗戲呼爲六和居士。

先難後易真交契。醉許醒違蓋世情。玉潤白輸六居士。昇元烏有一先生。昔蒙佳句誠歡忭。今得芳緘且歎驚。一入侯門深似海。騷人空夢帳中聲。昇元寶器亦名帳中寶。

從國才索閑閑煎茶賦

聞國才近得閑閑手書煎茶賦。以詩索之。

聞君久得煎茶賦。故我先吟投李詩。爲報君侯休吝惜。照人瓊玖算多時。

贈高善長一百韻

高善長本書生也。屢入御闈而不捷。乃翻然醫隱。悉究難素之學。後造咸師法焉。與龍崗居士善。尤長於詩。而酷愛予之拙語。蓋自厭家雞耳。因漫成偈語一百韻以贈之。

君本遼陽人家。居華表傍。隨任來燕然。卜築金臺坊。幼蒙父兄訓。讀書登上庠。大義治三傳。左氏爲紀綱。詩書究微理。易道宗京房。吏學亦精妙。議論如馨香。行道有餘力。下筆能詩章。典雅繼李杜。浮華笑陳梁。

當年闢科舉。郡國求圭璋。御圍屢不捷。在前饒枇杷。先生乃醫隱。退身慕羲皇。難素透玄旨。鍼砭能起殭。可並華扁跡。可聯和緩芳。門生皆良醫。西海高名揚。昔我知君名。方且王事忙。兵塵隔東西。忽成參與商。君初涉洛瀍。我已達燉煌。瀚海浪奔激。金山路徬徨。西遊幾萬里。兩鬢今蒼蒼。西方好風土。大率無蠶桑。家家植木絲。是爲蠶種羊。年年旱作魃。未識舞鸕鶿。決水溉田圃。無歲無豐穰。遠近無飢人。四野棲餘糧。是以農民家。處處皆池塘。飛泉遶曲水。亦可斟流觴。早春而晚秋。河中類餘杭。濯足或濯纓。肥水如滄浪。雜花閒側柏。園林如綉妝。爛醉蒲萄酒。渴飲石榴漿。隨分有絃管。巷陌雜優倡。佳人多碧髻。皎皎白衣裳。市井安丘墳。吠畝連城隍。貨錢無孔郭。賣飮稱斤量。甘瓜如馬首。大者狐可藏。採杏兼食核。西方杏仁皆生食之甘香如芭。滄瓜悉去瓢。西瓜大如鼎。半枚已滿筐。芭攬賤如棗。可愛白沙糖。人生爲口腹。何必思吾鄉。一住十餘年。物我皆相忘。神祖上仙去。聖主登明堂。驛騎徵我歸。忝位居巖廊。河表寒舊盟。鄜秦成戰場。翠華乃南渡。鸞馭聲鏘鏘。六軍臨孟津。偏師出太行。閒路入斜谷。南鄙侵壽唐。倚角皆受敵。應戰實未遑。一旦汴梁破。何足倚金湯。下詔求名醫。先生隱藥囊。馳軺來北闕。失措空倉惶。我於羣雞中。忽見孤鳳凰。下馬執君手。涕淚其如滂。我歎白頭翁。君亦嗟髯郎。停燈話舊事。談笑吐肺腸。酬酢覓佳句。沈思搜微茫。浩然訪醫藥。預備庸何妨。高君略啓口。確論聞未嘗。醫術與治道。二者元一方。武事類藥石。文事如膏粱。膏粱日日用。藥石藏中箱。一朝有急疾。藥石施鋒鏑。病愈速藏藥。膏粱復如常。緩急寇難作。大劍須長槍。寇止兵弗戢。自焚必不長。發表勿攻裏。治內無外傷。朝廷有內亂。安可搖邊疆。疆場或警急。中變決自戕。陰病陽

脈生陽症陰脈亡。暴法譬之陰。仁政喻之陽。太平雖日久。恣暴降百殃。大亂遍天下。行仁降百祥。一君必二臣。佐使仍參詳。不殊世閒事。烝民無二王。國老似甘草。良將比大黃。一緩輔一急。一柔濟一剛。病來不速治。安居養豺狼。疾作儻無藥。遇水泛舟航。病固有寒熱。藥性分溫涼。療熱用連薺。理寒宜桂薑。君子與小人。禮刑令相當。虛者補其羸。實者瀉其強。扶衰食枸杞。破血服檳榔。仰高舉其下。天道猶弓張。損餘補不足。貧富無低昂。寒多成冷痼。熱盛爲瘡瘍。政猛民傷殘。政慢賊猖狂。保生必求源。胃府爲太倉。四時胃爲主。端居鎮中央。朝廷天下本。本固邦家昌。實實而虛虛。其謀原不臧。五行不偏勝。所以壽而康。太宗平府兵。是致威要荒。未病宜預治。未亂宜預防。賊臣弑君父。禍難生蕭牆。辨之由不早。卽漸成堅霜。心腹尙難治。況復及膏肓。湛然聞此語。不覺興胡牀。謝君贈誨言。苦口如藥良。問一而得二。和璧并夜光。走筆書新詩。一笑呈龍崗。

再廣仲祥韻寄之

金城薛玄之用李世榮舊韻寄詩於予索拙語已和寄忽思冰巖再廣仲祥元韻以寄之

能談仁義兵。經傳宗素臣。字畫如閑閑。

案金人稱趙閑閑李昇山爲老宿元裕之則閑閑門下士也

句法如之純。淡然與世疎。渭水獨

垂綸蒿萊塞庭除。塵土霑衣紳。歸我夫子門。三月無違仁。後生來從學。善誘能循循。顏巷不改樂。范甑長生塵。仰不愧於天。俯不忤於人。進德方乾乾。慎行而修身。旅食秦晉閒。騎驢三十春。珠玉炙人口。麗藻嘉彬彬。今年又絕糧。生涯如在陳。歌詠猶不輟。眞爲葛天民。新詩過子卿。離騷齊靈均。亡機天壤閒。舉措皆

天真濯足滄浪中。鷗鷺來相親。胸中萬卷書。下筆端如神。素負經濟才。人品伊臯倫。桂林祇一枝。亦何慚。
郝詵。

寄金城士大夫

遠聞金城學齋絕糧。因奉粟十斛。助蠶鹽之資。故作小詩以勵本土學士大夫。

金城人士本多奇。何事庠宮久蔑資。周急無輕五秉粟。傷時因寄一篇詩。

誠之索偈

誠之久侍萬松師。何事十年下手遲。劫火光中須退步。青春寧有再來時。

遺姪淑卿香方偈

姪淑卿疾作。索安息香於予。欲辟邪也。將謂汝是箇中人。猶有這箇在。因作香方偈以遺之。


我有一香。香祕之不敢說。心生種種法生。心滅種種法滅。退身一念未生前。此是真香太奇絕。邪神惡鬼永沈蹤。外道天魔皆胸裂。

爲子鑄作詩三十韻

乙未。爲子鑄壽。作是詩以遺之。鑄方年十有五也。

皇祖遼太祖。奕世功德積。彎弓三百鈞。天威威萬國。一旦義旗舉。中原如捲席。東鄙收句麗。西南窮九譯。古器獲軒鼎。神寶得和璧。南陔稱子孫。皇業幾三百。赫赫東丹王。退位如夷伯。藏書萬卷堂。丹青成畫癖。

四世皆太師。名德超今昔。我祖建四節。功烈光黃閣。先考文獻公。弱冠已卓立。學業飽典墳。劇作乙未歷。入仕三十年。廟堂爲柱石。重義而疎財。後世遺清白。我受先人體。兢兢常業業。十三學詩書。二十應制策。禪理窮畢竟。方年二十七。萬里渡流沙。十霜泊西域。自愧無才術。忝位人臣極。未能扶顛危。虛名徒伴食。汝方志學年。寸陰真可惜。孜孜進仁義。不可爲無益。經史宜勉旃。慎毋耽博奕。深思識言行。每戒迷聲色。德業時乾乾。自強當不息。幼歲侍皇儲。且作春宮客。一旦衝青天。翱翔騰六翮。儒術勿疎廢。祖道宜薰炙。汝父不足學。汝祖真宜式。酌酒壽汝年。五福自天錫。



湛然居士文集卷十三

楞嚴外解序

昔洪覺範有言。天台智者禪師。云天台作聞天竺有首楞嚴經。旦暮西向拜祝。願此經早來東土。續佛慧命。竟不得一見。今板屢遍天下。有終身不聞其名者。因起法輕信劣之歎。若夫徵心辨見。證悟窮魔。明三界之根。深七趣之本。原始要終。廣大悉備。與禪理相爲表裏。雖具眼衲僧。不可不熟繹之也。余故人屏山居士。牽引易論語。孟子。老氏。莊。列之書。與此經相合者。輯成一編。謂之外解。實漸消吾儒不信佛書者之餅也。吾儒中喜佛乘者。固亦多矣。其全信者鮮焉。或信其理。而棄其事者。或信其理事。而破其因果者。或信經論。而誣其神通者。或鄙其持經。或訊其建寺塵沙之世界。以爲迂闊之言。成壞之劫波。反疑駕馭之說。亦何異信吾夫子之仁義。詆其禮樂。取吾夫子之政事。舍其文學者耶。或有攘竊相似之語。以爲皆出於吾書中。何必讀經然後爲佛。此輩尤可笑也。且竊人之財。猶爲竊。況竊人之道乎。我屏山則不然。深究其理。不廢其事。其於因果也。則舉作善降祥之文。引羊祜鮑靚之事。其於塵界也。則隘鄒子之說。婉禦寇之談。其神通也。則云左慈術士耳。變形於魏都。皆同物也。疑吾佛不能變千百億化身乎。其於劫波也。則云郭璞日者。卜年於晉室。若合符券。疑吾佛不能記百萬之多劫耶。其於持經也。則云佛日禪師。因聞誦心經咒。言下大悟。田夫俚婦。持念諸果者。詎可輕笑之哉。其於建寺也。則云阿蘭若法當供養。彼區區

者。尚以土木之功爲費。何庸望之甚耶。其品評三聖人。理趣之淺深也。初云。稍尋舊學。且窺道家之言。又繙內典。至其邃處。吾中國之書。似不及也。晚節復云。余以此求三聖人。垂化之理。而後知吾佛之所以爲人天師。無上大法王者。非諸聖之所能侔也。學至於佛。則無可學者。乃知佛卽聖人。聖人非佛。西方有中國書。中國無西方書也。或問屏山何好佛之深乎。答云。感恩之深。則深報之。屏山所謂心不負人者矣。渠又云。吾佛之所誨人者。其實如如不誑不妄。豈有毛髮許可疑者耶。噫。古昔以求篤信佛書之君子。未有如我屏山之大全者也。近代一人而已。泰和中。屏山作釋迦文佛贊。不遠千里。以序見託於萬松老師。永長巨豪劉潤甫者。笑謂老師曰。屏山兒時聞佛。以手加額。旣冠排佛。今復贊佛。吾師之序。可慎與之。庸詎知他日得不復似韓歐排佛乎。老師曰。不然。今屏山信解人微。如理而說。豈但悔悟於前非。亦將資信於來者。且兒時喜佛者。生知宿稟也。旣冠排佛者。華報蠱惑也。退而贊佛者。不遠而復也。而今而後。世尊所謂吾保此木。決定入海矣。後果如吾師言。余與屏山通家相與。爾汝曹不檢羈。其子阿同輩待余以叔禮。天兵旣克汴梁。阿同挈遺薰來燕。寓居萬松老師之席。老師助鉸木之資。欲廣其傳。阿同致書請余爲引。余亦不讓。援筆疾書。以題其端。不惟彰我萬松老師冥有知人之鑑。抑亦記我屏山居士克終全信之心。且爲方來淺信竊道者之戒云。甲午清明後五日。澆然居士漆水移刺楚材晉卿序於□□城。

心經宗說後序

白華山主。摺折腳鐺。煮沒米粥。萬松野老。用穿心碗。盛與無口人。雖然指空說空。爭奈依實具實。嗟見渾

掄吞棗。只管誦持。故教混沌開。勿妄生穿鑿。如明以字。莫認經頭。未解本文。且看註腳。湛然居士漆水移刺楚材晉卿。詳勘印行。

糠孽教民十無益論序

昔余友以此論見寄。屬余求序以行世。余恐謾歸於講主者。辭而不序。遂採萬松老師賦意。及講主餘論。述辨邪論之意。以謂世人皆云。釋子黨教護宗。由是飛謗流言。得以藉口。予本書生。非釋非糠。從傍仗義。辨而證之。何爲不可乎。予又謂昔屏山居士序輔教編。有云。儒者嘗爲佛者害。佛者未嘗爲儒者害。誠哉。是言也。蓋儒者率掌銓衡。故得高下其手。其山林之士。不與物競。加以力孤勢劣。曷能爲哉。余觀作頭陀賦數君子。皆儒也。予不辨則成市虎矣。不獨成市虎。抑恐崔浩李德裕之徒。一唱一和。撼搖佛教。爲患不淺。故率引儒術。比而論之。以勵吾儒爲糠孽所感者。論既述。所謂余友者。復以書見示。其大略曰。講主上人者。以糠孽叛教。積風乃檢閱藏教。尋釋儒經。積有年矣。窮諸佛之深意。達三乘之至真。列十篇之目。成一家之言。語辨而詞溫。文野而理親。聞之者。是非莫逃。誦之者。邪正斯分。雷震獅吼。邪摧魔奔。良謂偃德之仕風。釋疑冰之陽春。噫。或佛道之未喪也。諒必由于斯文乎。是以信奉佛教者。展轉錄傳。不可勝記。京城禪伯尊宿。欲流之無窮。不憚萬里。往復教書。託子爲序。今之士大夫。才筆勝子者。固亦多矣。豈不能序此一書乎。以子素淘汰禪道。涉獵佛書。頗知旨歸。故也。子何讓焉。此老不避嫌疑。自興謗譏。而爲此書。彼且不避。子何代彼而避謗乎。吾觀子所著辨邪論。正爲儒者述。儒者之信糠者。止三子而已矣。市井工商之

徒信糠十居四五。自非此書。彼曹何從而化之乎。子所得者少。所失者不爲不多矣。書既至。余不能答。謹以書意序之論者。丙戌重午日。題於肅州鄯善城。

釋氏新聞序

昔仰嶠叢林爲燕然之最。主事僧輩歷久不更。執權附勢。搖動住持人。泰和中。本寺奏請萬松老人住持。上許之。萬松忻然奉詔。人或勸之曰。師新出世。彼易師之年少。彼不得施其欲。必起風波。無遺後悔乎。師笑而不答。既住院。師一遵舊法。無所變更。惟拱默而已。夏罷。主事輩依例辭職。師因其辭也。悉罷之。師預於衆中。詢訪耆德。爲衆推仰者數人。至是咸代其職。積歲頽風。一朝頓革。遠近翕然稱吾師。素有將相之材矣。云其因仍也。守如處女。其展布也。出如脫兔。此中有殺活手段。邇後章廟秋獵於山。主事輩白師曰。故事。車駕巡幸。本寺必進珍玩。不然。則有司必有詰問。師責之曰。十方檀信布施。爲出家兒。余與若不具正眼。空口施物。理應償報。汝不聞木耳之緣乎。富有四海。貴爲一人。豈需吾曹之珍貨也哉。且君子愛人也以德。豈可以此瑕類貽君主乎。因手錄偈一章。詣行宮進之。大蒙稱賞。有成湯狩野恢天網。呂尙漁磯侵月釣之句。誠仁人之言也。翌日。章廟入山行香。屢垂顧問。仍御書詩一章。遺之。師亦泊如也。車駕還宮。遣使賜錢二百萬。使者傳敕命師跪聽。師曰。出家兒安有此例。使者怒曰。若然。則予當迴車。師曰。傳旨則安敢不聽。不傳則亦由使者。意竟焚香立聽詔旨。章廟知之。責其使曰。朕施財祈福耳。安用野人閑禮耶。上下悚然服吾師不屈王公之前矣。此二事天下所共知者也。自餘師之隱德默行。未播於人閒者。何勝道哉。師之切於扶聖教。急於

化人心也。萬分之一見之於此書乎。師應物傳道之暇。手不釋卷。凡三閱藏教。無書不讀。每有多聞。能利害於佛乘。闡涉於教化者。悉錄之。目之曰釋氏新聞。將使見書而知歸。聞言而嚮道。真謂治邪疾之藥石。濟迷途之津梁也。豈小補哉。石門洪覺範著林閒錄。辨而且文。閒有偏黨之語。後之成人之美者。未嘗不歎息於斯焉。我萬松老師之意。扶教利人也深。是以推舉他宗。談不容口。此與覺範之用心。相去萬萬者也。讀是書者。當知是心矣。嗚呼偉哉。子請刊是書行於世。因爲之序。甲午上元後一日。湛然居士漆水移刺楚材題。

屏山居士金剛經別解序

佛法之西來也。二千餘祀。寶藏琅函。幾盈萬軸。可謂廣大悉備矣。獨金剛一經。或明眼禪客。若脫白沙彌。上至學士大夫。下及野夫田婦。里巷兒女子。曹無不誦者。以類見如閔。姑置而不問者有之。以至理叵測。望涯而退者有之。噫。信其小而不信其大。信其所見而不信其所未見。自是而非他。執一而廢百者。比比然。又何訝焉。偉哉。屏山居士取儒道兩家之書。會運契二師之論。□□□牽引雜說。錯綜諸經。著爲別解。一編。莫不融理事之門。合性相之義。析六如之生滅。剖四相之鍵關。謂真空不空。透無得之得。序圓頓而有據。識宗說之相須。辨因緣自然。喻以明珠。諸佛衆生。譬之圓鏡。若出聖人之口。冥契吾佛之心。可謂天下之奇才矣。噫。此書之行於世也。何止化書生之學佛者。偏見衲僧無因外道。皆可廢棄矣。昔余與屏山同爲省掾時。同僚譏此書。以爲餌餽餽之具。余尙未染指於佛書。亦少惑焉。今熟釋之。自非精於三聖人。

之學者。敢措一辭於此書乎。吁。小人之言。誠可畏哉。乙未元日。浩然居士漆水移刺楚材晉卿。題於大磧黃石山。

書金剛經別解後

孔子有云。吾十有五而志於學。三十而立。四十而不惑。是知學道未至於純粹精微之域。雖聖人亦少惑焉。昔樂天答制策。稍涉佛教之譏。中年鄙海山而修兜率。垂老爲讚佛發願文。乃因起因張本。其事見於本集。子瞻上萬言。頗稱釋氏之弊。晚節專翰墨爲佛事。臨終作神咒浪出之偈。且曰着力卽差。其事見於年譜。退之屈論於大巔。而稍信佛書。韓文公別傳在焉。永叔服膺於圓通。而自稱居士。歐陽公別傳在焉。是知君子始惑而終悟。初過而後俊。又何害也。屏山先生幼年排佛說。殆不忍聞。未幾翻然而改。火其書。作二解以滌前非。所謂改過不吝者。余於屏山有所取焉。後之人立志未定。惑於初年者。當以此數君子爲法。乙未清明日。浩然居士題於別解之後。

賈非熊修夫子廟疏

天產宣尼降季周。血食千祀德難酬。重新庠序獨無力。試向滄溟下釣鉤。

孝義永安寺請余爲功德主因作疏

塵緣不盡淹鳳池。而有年習氣難忘慕祥林。而未暇適遇昭然老子。請作永安主人。乞聞一聲。何須再讓。葛藤舊案。宛如馬耳之風。松菊新堂。便是終焉之計。謹疏。

請旭公禪師住應州寶宮寺疏

孫枝出入萬松中。便好移來植寶宮。覆蔭人天正今日。不妨鼓動劫前風。

請文公菴主住玉山開堂出世疏

兒大做翁。當仁不讓。使請承當。何須再勸。

請嚴菴主持東堂出世疏

西堂棄東堂。山東過山西。禪師開狗口。居士展驢蹏。

請希菴主持晉祠奉聖寺開堂疏

晉祠山水冠人間。好請希公向此閑。飯了蒙頭三覺睡。逢人休說趙州關。

請學菴主持翠微山寶林寺開堂出世疏

金城元有翠微山。寶刹禪林積歲閑。笑請學公來領略。一瓶遊戲白雲閒。

請石州海秀首座住文水壽永寺疏

霖公實沾秀法屬也

聞道霖師退壽寧。秀公難弟亦難兄。新詩遠寄石州去。貶起眉毛便好行。

太原山開化寺灰燼之餘。再興故宇。請余爲功德主。因作疏。

竊以塵緣有數。否則泰泰則亨。聖道無窮。變則通通則久。惟開化之故刹。實太原之名藍。兵火以來。劫灰而已。住持人固有定老。功德主乃請湛然。良慰殷勤。強爲領略。禪心佛語。誰知教外別傳。梵刹蓮宮。更看

無中唱出謹疏。

重修宣聖廟疏

精藍道觀已重新。獨有庠宮尙坳垣。試問中州士君子。誰人不出仲尼門。

燕京大萬壽寺化水陸疏

竊以生死蒙恩。便見法門不二。恐親普濟。始知檀度無私。仰惟佛陀興悲。乃是阿難張本。欲啓無遮之大會。必資有衆之良緣。但肯同心。便希垂手。謹疏。

請與公禪師開堂疏五首

竊以深達大本。何妨摘葉尋枝。截斷衆流。便是隨波逐浪。欲整雲門窠窟。必求佛覺兒孫。伏惟與公和尚。道合圓通。法傳圓照。逢人便出。方爲禪子家風。戀土難移。未是衲僧氣息。謹疏。

竊以轉身就父。從來禪子宗風。借路還家。好箇衲僧消息。伏惟與公和尚。受戒崇壽。得法聖安。未闌徽猷。權棲大覺。因席就請。何須特地人情。準帖奉行。折合遮翻公案。謹疏。

竊以釋迦慳。迦葉富。無物與人。與公俏。聖安愁。慢藏誨盜。既收鋤斧子。不藉破皮鞋。須要妝龍似龍。何礙將錯就錯。抱將十字街裏。便好投街。推來百尺竿頭。更教進步。謹疏。

竊以法海彌深。曹水五流分派。化風猶扇。雲門一葉重華。與公菴主。透圓照之重關。提圓通之正令。善作降龍相。能談文字禪。鬧裏刺頭。最好途人便出。穩處下腳。何礙遇緣卽宗。謹疏。

竊以當年嚼飯喂嬰兒。聖安左錯。今日把棒喚狗子。居士風顛。你打開漆桶。徹底承當。我劈破面皮。須要相見。橫榔栗木。獨行正令。莫壓弱倚強。與旃檀佛。共演梵音。好撓行奪市。謹疏。

請湘公上人住持新院仍名興教寺者因作疏

寶刹成空。隨劫灰而已滅。精廬如聖。逐化日而重新。爲國報恩。可名興教。赤軸黃卷。且圖摘葉尋枝。寶藏琅函。何礙尋行數墨。謹疏。

德興府巖峪雲巖寺請東林老人住持疏

昔日山中養聖胎。峪中松檜手親栽。院荒松老無龍象。便請東林更一來。公幼年在此寺。有手植松在焉。

請柏巖儼公疏

良弼施宅割天寧。卻請天寧舊衲僧。爲報柏巖休遜讓。閑中續出祖師燈。

邳州重修宣聖廟疏

宣尼萬古帝王師。可歎荆榛沒古祠。重整庠宮闡文教。顯觀日月再明時。

安慶織萬佛疏

余自參預政事。以文懶爲疏文。恐物議挾勢故也。安慶者工巧妙天下。自創新意。織萬佛爲施。嘉其意。因破戒作此疏云。

十方三世萬如來。不犯梭頭寶座開。單手元知不成拍。三臺須要大家催。

請聰公和尚住山陰縣復宿山世傳文殊顯化再宿於此山故得名

昔日文殊曾復宿當年聰老可重來公舊常住此山此山便是真佛窟何必區區禮五臺

題萬壽碑陰

昔達磨西來禪宗大播門庭峻峭機變驟馳非世智辯聰所能曉也其予奪之間固有賓主抑揚之際不無權實其未具透關眼者豈克隨語注解之病哉香山俊公和尚受法於大明渠謂洞山之後偏正五位失其本意亦行權之語與同參榮公聞之果吞鉤餌俊公門人輩從而勒諸石遠發後世之一笑噫受師之道而反謗之是自謗也何止自謗也曹山枝子青山諸師之道皆不足法矣顧香山亦近世之豪邁者也忍爲此事耶昔雲門拈世尊初生因緣云我當時若見一棒打殺與狗子喫琅琊覺云雲門可謂將此身心奉塵刹是則名爲報佛恩臨濟臨終謂三聖云誰知吾正法眼藏向這瞎驢邊滅卻至今道法大行是知宗門之語一擡一搨豈可以世閒語言定其準的也哉若香山果無毀大明意後之子孫宜改覆車之轍不然則自有勝默老人之韻語余手書於故碑之陰以爲來者誠其辭曰燕俊與朔榮齊足出大明俊禪住巨刹黨奮鼻獍獍探抱洞山足逆坊大明睛聞見弔澆季榻腕皆含情榮甘溺齏甃掉尾求羶腥曲助碑其言欺欺晚來誠我覽取諸譬譬彼秦築城秦非不謀固無德秦亦傾上德無可德下德方記銘端然居上德非碑道亦行況聖不自會古德云其足聖人法聖人不會其肯自矜盈修母致子有反是而未聆目花只自見耳聲約誰聽雖欲信天下未必同爲聲不見三葉剏削跡捨身名兒孫愈岳立史傳愈金鏗不見北宗

下功勳石上爭期昌竟何昌。千古招論許。俄柔慶基敗。大明老師嘗記曰。彼有黠僧。必不得好嗣。果敗於慶柔基三人也。玷累斯文貞。齋然寘虛堂。徒表黨宗明。

和公大禪師塔記

師本平水人。俗姓段氏。幼習儒業。甫冠。應義舉。因閱春秋左氏傳。悟興衰之不常。慨然投筆。退居山林。年二十。棄俗出家。禮平陽大慈雲寺僧宗言爲師。受戒披剃。頗習經論。後聞教外別傳之旨。乃傾心焉。遍謁諸方。因緣不契。師知萬松老人之聲價。照映南北。直抵燕然。而見之。居數載。師資道契。始獲密許。人頗知之。丙戌夏六月。故勸農使王公爲功德主。作大齋。又蒙行省相公。泊以下僚佐。專使賡疏。勸請開堂出世。因住持大萬壽禪寺。師素剛毅寡合。未甚。退居漁陽之盤山報國寺。建州元帥葛公。權府朱公。彈壓樊公。聞師之名。飛疏敦請。辭不獲已。杖錫北行。詣建州梨花道院。以塞其命。未幾。示微疾。移居閭山之崇福寺。養病。一日。忽召門人普淨輩。謂之曰。生死去來。猶空花水月。何足爲訝。遂淨髮更衣。端坐而囑後事。乃作頌曰。臨行一句。當面不諱。皓月清風。不居正位。頌畢。石脇而寂。師將順世。有本寺傳戒大師。臨謂之曰。善爲道路。師笑而不答。令衆且去。勿隨。衆皆出。聞師咄一聲。衆驚視之。師已寂矣。三日。神光不變。茶毘之日。頗有祥異。數州士民。焚香拜禮者。絡繹於路。師俗壽四十六。僧臘一十六。其徒迎其靈骨。藏於萬壽祖塋之側。噫。師之處萬壽也。每聞誦經之聲。形不憚之色。由是人皆譏之。臨行之際。命其徒諷尊勝咒者何哉。殊不知大善知識。臨機應物。一抑一揚。一奪一縱。若珠之走盤。千變萬化。詎可以一途而測耶。至於巨

川海和尚平日亦行此令。執相者諷之。而謂毀梵行。掠虛者讚之。而謂無礙禪。皆失之矣。後之學者當以此爲誡。己丑之清明。其徒屬余爲記。遂以所聞之語。信筆記之。湛然居士云。

萬壽寺創建廚室上梁文

萬壽寺創建廚室。浪著上梁文六首。幸付工人輩歌之。用光法席。

拋梁東。香積移來不犯功。卻笑維摩無手段。但將孟飯到塵中。

拋梁南。底箇因緣最好參。試問助緣多少衆。前三三與後三三。

拋梁西。巧匠騎驢倒上梯。四面無門何用鎖。十方沒壁不須泥。

拋梁北。石柱宛有擎天力。欲模此樣向諸方。懃殺僧繇描不得。

拋梁上。手不傷材真大匠。虛堂窮劫鎮叢林。借與兒孫爲榜樣。

拋梁下。聊倩般輸成大廈。朝朝香飯供諸佛。承事悉無空過者。

茶榜

今辰齋退。特爲新堂頭奧公長老設茶一鍾。聊表住持開堂陳謝之儀。仍請知事大衆同垂光降者。

竊以个中滋味。誰是知音。向上封題。罕逢藻鑑。伏惟新堂頭長老。名超絕品。價重諸方。黃金碾畔。析微塵。輸他三昧手。碧玉甌中。轟白浪。別是一家春。睡鬼潛奔。便是至人無夢。湯聲微發。解教醉眼先醒。諗老三

甚。孟莫作道理會。盧公七椀。且是仁義中。雖然櫛桶新陳。不得顛預甘苦。便請大家下口。且圖一衆開懷。幸甚。

約善長和詩戰書

余奉善長詩百韻。仍乞光和。渠謙抑退讓。以降啓見戲。余亦戲作戰書以督之。聊發一笑耳。

維旂蒙協洽之歲。三月甲午朔。湛然謹致書於詩將善長先生幕府。愚聞李杜齊名。已有登壇之序。元白並駕。嘗與定伯之書。在昔云然。於今亦可。既久陳於師旅。宜一決於雌雄。無約而和者。必謀有備。則所以亡患。在德不在險。雖粗聞於古語。受降如受敵。則爲戒於兵家。伏惟善長先生。冀北無雙。斗南第一。能投壺而講禮。善橫槊而賦詩。詞鋒折萬里之衝。筆陣掃千人之敵。將略多多而益辦。雄材一一而難陳。遇險韻而愈奇。見大敵而倍勇。君唱之而來挑戰。我和之以爲應兵。方及出綏。輟陳降啓。前鋒少卻。尙未損於一毫。勇氣未衰。遂引退於三舍。張羸師而誘我。遺厚利以餌余。曠日持久。以老我師。重幣甘言。以驕我志。深藏九地。必發九天。故示以不能。將攻我之所短。倘弗遵於仁術。勝亦非功。苟不推於至誠。盟之何益。此奚疑耳。理亦灼然。兵不戰而屈人。可爲上策。心未服而納款。豈無詐謀。若非先見之明。徒貽後悔之誚。是以載嚴文壁。爰整詩兵。比爾干立爾矛。一乃心齊。乃力文章燦爛。依稀整整之旗。聲律精嚴。彷彿堂堂之陣。乃一鼓而成列。決再戰而立功。顧天下之英雄。惟使君與操。歎文章之微婉。非夫子而誰。竚持兵麾。願聞金諾。謹奉戰書以聞。指不多及。

寄萬松老人書

嗣法弟子從源。頓首再拜師父丈室。承手教諭。及弟子有以儒治國。以佛治心之語。近乎破二作三。屈佛道以徇儒情者。此亦弟子之行權也。教不云乎。無爲小乘人而說大乘法。弟子亦謂舉世皆黃能。任公之餌不足投也。故以是語餌東教之庸儒。爲信道之漸焉。雖然。非屈佛道也。是道不足以治心。僅能治天下。則固爲道之餘滓矣。戴經云。欲治其國。先正其心。未有心正而天下不治者也。是知治天下之道。爲治心之所兼耳。普門示現三十二應。法華治世資生。皆順正法。豈非佛事門中。不捨一法者歟。孔子稱夷齊之賢。求仁而得仁。死而不怨。後世行者難之。又安知視死生如逆旅。坐脫立亡。乃衲僧之餘事耳。且五善十戒。人天之淺教。父益慈。子益孝。不殺之仁。不妄之信。不化自行於八荒之外。豈止有恥且格哉。是知五常之道。已爲佛教之淺者。兼而有之。弟子且讓之。以儒治國。以佛治心。庸儒已切齒。謂弟子叛道忘本矣。又安足以語大道哉。又知稚川子尚以參禪卜之。立見其効。師嘗有願。試招本分鉗鎚一下。便知真假。正謂此耳。呵呵。春深萬翼爲道珍重。區區不備。

萬松老人萬壽語錄序

余忝侍萬松老師。謬承子印。因遍閱諸派宗旨。各有所長。利出害隨。法當爾耳。雲門之宗。悟者得之於緊俏。迷者失之於識情。臨濟之宗。明者得之於峻拔。昧者失之於莽鹵。曹洞之宗。智者得之於緜密。愚者失之於廉纖。獨萬松老人。得大自在。三昧決擇玄微。全曹洞之血脈。判斷語緣。具雲門之善巧。拈提公案。備

臨濟之機鋒。馮仰法眼之爐鑪。兼而有之。使學人不墮於識情。莽鹵廉纖之病。真閒世之宗師也。略舉中秋日。爲建州和長老圓寂上堂云。有人問。既是建州遷化。爲甚萬壽設齋。師云。此夜一輪滿。清光何處無。又問。不是盡七百日。又非周年。大祥。鬪勘。今日設齋。師云。月色四時好。人心此夜偏。衆中道。長老座上。誦中秋月詩。佛法安在。師云。萬里此詩同皎潔。一年今夜最分明。將此勝因。用嚴和公覺靈中秋玩月。徹曉登樓。直饒上生兜率。西往淨方。未必有燕京蒸梨餹。粟燒桃。衆中道。長老只解說食。不見有纖毫佛法。師云。謝子證明。卽且致爲甚。中秋閉目坐。卻道月無光。有餘勝利。迴向諸家檀信。然輒蒸豈角。新煮雞頭。蒲萄駐顏。西瓜止渴。無邊功德。難盡讚揚。假饒今夜天陰。暗裏一般滋味。忽若天晴。月朗。營定不索點燈。老師語緣。似此之類尤多。不可遍舉。且道五派中。是那一宗門風。具眼者試辨看。噫。千載之下。自有知音。乙未夏四月。湛然居士漆水移刺楚材晉卿序於和林城。

祭姪女淑卿文

今案靈照
麗居士女

維乙未之春。三月二十六日。叔湛然居士。謹以蔬食清茗。致祭於猶子舜婉淑卿之靈。維靈肯出遼室。支分大宗。我考賢王。夙植於令德。吾兄按察。載振於清風。汝幼奉母訓。長知父從。禪理頗究。儒學悉通。稟鄭娘之標格。有靈照之心胸。不食葷於笄年。欲爲尼於高嵩。德播人口。名達帝聰。遣使求於故鄉。有詔入於深宮。守志持節。慎心飾躬。垂及知命。尙爲嬰童。古所未有。來者孰同。章奏久掌。名位日隆。上謂之女學士。人呼之官相公。屢有諫諍。多所彌縫。德殊辭輦之班。功勝當熊之馮。忽家亡而國破。歎勢盡而途窮。果全

身而不辱。示微疾而善終。正悟之名。得之於空老。徒悟之號。乞之於髻翁。信幻有之非有。如真空之不空。來兮無跡。去兮無踪。來無跡兮。出燕山之白雲。去無踪兮。聳和林之青松。明日灰飛煙滅後。天涯何處不相逢。嗚呼哀哉。伏惟尙饗。

和林城建行宮上梁文

拋梁東。萬里山川一望中。靈沼靈臺未爲比。行宮不日已成功。
拋梁南。一帶南山挹翠嵐。創築和林建宮室。鄴侯功業冠曹參。
拋梁西。碧海寒濤雪拍堤。臣庶稱觴來上壽。嵩呼拜舞一聲齊。
拋梁北。聖主守成能潤色。明堂壯麗鎮龍沙。萬世巍巍威萬國。
拋梁上。棟宇施功遵大壯。鳴鞘聲散翠華來。五雲深處瞻天仗。
拋梁下。柱石相資成大廈。君臣鐘鼓樂清時。喜見山陽歸戰馬。

爲武州摩訶院勸建佛牙塔疏

佛日增輝國政和。靈牙有詔賜摩訶。因風吹火何勞力。垂手同修窣堵波。

湛然居士文集卷十四

法語示猶子淑卿

汝自謂幼年嘗禮禪空師求名。因書頌云。父母未生前。凝然一相圓。釋迦猶不會。迦葉豈能傳。此語極妙。且道汝作麼生會。古昔以來。有志師僧。辭親出家。尋師訪道。千辛萬苦。三二十年。祇爲此一段空劫以前大事。尙有未透脫者。汝幼居閨閣。久在掖庭。未嘗用功。叩參大善知識。但博尋宗師語錄。徒增狂慧。深背真道。賣弄滑頭。於道何益。所以古人道。參須實參。悟須實悟。又云。滿肚學來無用處。闔王不要葛藤看。真良言也。只如空老所書頌。亦論父母未生前面目。又道釋迦猶不會。迦葉豈能傳。此是何意趣。若云釋迦不會。能仁四十九年。橫說豎說。貝藏琅函。遍滿人間。未後拈花。以傳教外之旨。且道此法從何而得。若云迦葉無傳。西天二十八祖。東土歷代諸師。相傳之道。自何而來。若謂釋迦不會。迦葉無傳。這空禪師亦是佛祖兒孫。寫此頌圖。箇甚麼。箇中關捩。盡在此兩句。不可不細口參詳。余爲汝透漏些子消息。父母未生前。老夫云。水泄不通。云此禪家參語頭也。凝然一相圓。老夫云。針割不入。釋迦猶不會。老夫云。非思量處。迦葉豈能傳。老夫云。識情難測。父母未生前。老夫云。三更神世界。凝然一相圓。老夫云。半夜鬼乾坤。釋迦猶不會。老夫云。只許老胡知。迦葉豈能傳。老夫云。直饒將來。他亦不要。父母未生前。老夫云。頭圓象天。凝然一相圓。老夫云。足方象地。釋迦猶不會。老夫云。寒山撫掌。迦葉豈能傳。老夫云。拾得呵呵。老夫爲汝橫批豎判。

一用顛拈十字打開兩手分付了也。一句子薦得可與佛祖爲師。一句子薦得可與人天爲師。一句子薦得自救不了。閑中試定省看其或未明。若到燕然問取萬松老子。

潤之館於忘憂門下。生徒乘駟渠徒步抵和林城。有詩云。破帽麻鞋布腿棚。強扶衰病且徒行。區區不道圖他甚。一夜山妻罵到明。子憐而和之。

疎筍籬邊正脫棚。故山清處便宜行。鏡湖他日應屬我。好向湖邊訪四明。

贈景賢

茶鄰藥物成邪氣。琴伴簫聲變鄭音。可惜龍崗老居士。卻教邪教污真心。

寄東林

東林已秀兩三枝。覆蔭人天正此時。貪向龍宮翻貝葉。惱人不寄玉泉詩。以來書云。見闕藏經。故有是語。

寄萬壽潤公禪師

東林人笑鳳凰枝。我慕林泉歎後時。盼得人來問消息。大平和尙又無詩。

寄甘泉慧公和尙

東林枝勝桂林枝。不惜甘泉濟旱時。鐵額鋼頭含笑面。可人能字更能詩。

去歲秋獮余謁龍崗。因彈秋水龍崗出。山羊一雙爲贈。渠笑曰。已過價矣。余愛客多。設鹿尾漿。今年上獵於秋山。龍崗記以鹿尾可入藥。得數十枚。悉以遺余。因錄近和人詩數篇以報。仍作詩二絕。

爲引聊發一笑耳。

秋水清聲忽變商。龍崗曾遺二山羊。今年祇奉詩三首。爲報先生鹿尾漿。
去歲山羊酬過價。今年鹿尾不值錢。龍崗藥物都竭底。只得髯翁詩數篇。
和景賢贈鹿尾二絕

日暮長楊獵騎歸。西風弓硬馬初肥。今年鹿尾休嫌少。且喜君王不合圍。
禁鬻醕思濃鹿汁。香蔬久厭小兒拳。龍崗探得班龍尾。一串穿來寄玉泉。
中秋召景賢飲

中秋北海景淒淒。好判今宵醉似泥。快請龍崗疾過我。與君同泛玉東西。
請定公住大覺疏

龍龕寶藏照人寒。與老功成住聖安。卻請定公來領略。收拾香火禮旃檀。
補大藏經板疏

十年天下滿兵埃。可惜經文半劫灰。欲析微塵出經卷。隨緣須動世閒財。
武川摩訶院勅建瑞像殿疏

邦人創刻旃檀像。寺衆新修窣堵波。兩段因緣非細事。成功須仗大檀那。
請與公住崇壽院

泥湫昔日隱蟄龍。一震重新大覺宮。卻請收雲歸舊壑。晨昏香火禮師翁。泥湫院。圓通禪師真堂在焉。

寄聖安澄老乞藥

登高回首望燕山。試道新詩怨聖安。賺得護身符子去。三年不寄大還丹。

信之和余酬賈非熊三字韻見寄因再廣元韻以復之四首

鷄鶉徒羨大鷗南。鷲馬終須後覆鞍。至理猶刪萬歸一。庸儒剛說二生三。透關活眼嫌金屑。戀土癡人宿草菴。寄與雲川賢太守。洗心滌慮與君參。

惱人捷徑起終南。虛忝沙堤相國驂。幻術莫驚般七七。真詮誰識後三三。家鄰荆水玉泉也。宜栽竹。緣在香山好結庵。斫斷葛藤窠已後。閑家破具不須參。

鴻雁翩翩自北南。歸與何日駕歸驂。潛龍在下宜初九。卽鹿無虞戒六三。洛下好遊白傅寺。濟源重覓侍中菴。衰翁自揣何多幸。昨夢齋中得罷參。萬松老人住持大覺寺。榜其齋曰昨夢。

舊隱翳閭白鬢南。故山住處好停驂。噴貪癡者元無一。詩酒琴之樂有三。野云。菱芡香中橫短艇。松筠聲裏稱危菴。有人問道來相訪。一碗清茶不放參。

雲漢遠寄新詩四十韻因和而謝之

兌爻符太乙。天相忝文昌。泛海難追蠹。封留欲學良。穢形伴珠玉。朽木廁松樟。直節心雖赤。衰年鬢也蒼。伴食居相府。無德報君王。草甲濡春雨。葵心傾太陽。大權歸禁闕。成算出巖廊。自北王師發。平南上策長。

皇朝將革命。亡國自頽綱。漢水偏師渡。長河一葦航。股肱無敢惰。元首載歌康。號令傳諸域。英雄守四方。大勳雖已集。遺命未嘗忘。萬國來馳幣。諸侯敬奉璋。兆民涵舜德。百郡仰天光。大有威如吉。重乾體自強。碩賢起編戶。良將出戎行。太廟陳籩豆。明堂服冕裳。宋朝微寢滅。皇嫡久成戕。政亂人思變。君愚自底亡。右師潛入劍。元子直臨襄。殺氣侵南斗。長庚壯玉堂。幽州之分弓猶藏寶玉。劍未識干將。皇業超千古。天威聳八荒。元戎施虎略。勇士展鷹揚。武繼元封跡。文聯貞觀芳。宮庭敢諫鼓。帷幄上書囊。佇待卿雲見。行觀丹鳳翔。武文能迭用。威德足相當。多士思登用。遺賢肯退藏。詩書搜鳥篆。功業抑龍驤。國用恆無缺。民財苦不傷。八音歌雅頌。可戲屏優倡。聖澤傳朝露。明刑肅暮霜。永垂塵劫祚。一混九州疆。重任司鈞石。微才匪棟梁。思歸心似醉。感愧淚如澆。嚴子終辭漢。黃公合隱商。窮通真有數。憂樂實難量。雖愛千鍾祿。何如歸故鄉。乙未閏月上旬日。玉泉書。

德新先生惠然見寄佳製二十韻和而謝之

當年職都水。會不入其門。德重文章傑。年高道義尊。雖聞傳國士。恨不識王孫。韻語如蘇武。雖騷類屈原。煙霞供好句。江海入雄吞。意氣輕三傑。才名冠八元。著述歸至蹟。議論探深源。藉藉名雖重。區區席不溫。家貧謁魯肅。國難避王敦。北鄙來雲內。西邊退吐蕃。勉將嚴韻寄。不得細論文。遠害雖君智。全身亦聖恩。大科宜應詔。豪氣傲司關。學識光先哲。風流遺後昆。莫尋三島客。好謁萬松軒。六度真光發。三毒妄影奔。素絲忘染習。古鏡去塵昏。爐上飛寒雪。胸中洗熱煩。到家渾不識。得象固忘言。心月孤圓處。澄澄泯六根。

乙未閏月上休日玉泉書

子鑄生朝潤之以詩爲壽予因繼其韻以遺之

巖松傲歲寒。枝幹騰千尺。月兒若稽古。功名垂竹帛。我祖東丹王。施仁能善積。我考文獻公。清白遺四壁。盛名流萬世。馨香光赫赫。余生歎不辰。西域十年客。貧困志不渝。未肯忘平昔。昔日出燕然。辰當攝提格。鶉尾得鳳毛。續後予無責。汝知學不學。何啻雲泥隔。爲山虧一篑。龍門空點額。遠襲周孔風。近追顏孟迹。優游禮樂方。造次仁義宅。繼夜誦詩書。廢時毋博奕。勤惰分龍豬。三十成骨骼。孜孜寢食廢。安可忘朝夕。行身謹而信。於禮順而摠。祥麟具五趾。冥鴻全六翮。爲人備五常。奚憂任與譎。成功不自滿。始知謙受益。慎毋忘此詩。吾言真藥石。甲子重午前三日。湛然居士書。

扈從旋師道過東勝秦帥席上繼杜受之韻

去國十年久。還鄉兩鬢皤。三川猶梗澀。百越正干戈。東勝城無恙。西征事若何。凭高吟望久。樽酒酬長河。

屏山居士鳴道集序

屏山居士年二十有九。閱復性書。知李習之亦二十有九。參藥山而退著書。大發感歎。曰。抵萬松老師。深攻亟擊。宿稟生知。一聞千悟。注首楞嚴。金剛般若。贊釋迦文。達磨祖師夢語。贊談翰墨佛事等數十萬言。會三聖人理性之學。要終指歸佛祖而已。江左道學。倡於伊川。昆季和之者十有餘家。涉獵釋老。膚淺一二。著鳴道集。食我園棗。不見好音。誣謗聖人。聾瞽學者。噫。憑虛氣。任私情。一釀一毀。獨去獨取。其如天下。

後世何屏山哀於著鳴道集說。廓萬世之見聞。正天下之性命。發揮孔聖隱幽不揚之道。將攀附游龍。駸駸乎吾佛所列五乘教中人天乘之俗諦疆隅矣。鳴道諸儒力排釋老。排陷韓歐之隘黨。孰如屏山尊孔聖。與釋老鼎峙耶。諸方宗匠皆引屏山爲入幕之賓。鳴道諸儒鑽仰藩垣。莫窺戶牖。輒肆浮議。不亦僭乎。余忝歷宗門堂室之奧。懇爲保證。固非師心昧誠之黨。如謂不然。報惟影響耳。屏山臨終。出此書付敬鼎臣曰。此吾末後把交之作也。子其祕之。當有賞音者。鼎臣聞予購屏山書甚切。不遠三數百徒步之燕。獻的稿於萬松老師。轉致於予。予覽而感泣者累日。昔予嘗見鳴道集。甚不平之。欲爲書糾其無謬而未暇。豈意屏山先我着鞭。遂爲序引。以鍼江左書生膏肓之病焉。中原學士大夫有斯疾者。亦可發藥矣。甲午冬十有五日。湛然居士漆水移刺楚材晉卿序。

用梁斗南韻

丁年學道道難成。卻得中原浪播名。否德自慚調鼎籍。微才不可典璣衡。誰知東海潛姜望。好向南陽起孔明。收拾琴書作歸計。玉泉佳處老餘生。

贈姪正卿

遼室東丹九葉芳。曾陪劍佩侍明昌。今案明昌金章宗年號學書寫盡千林葉。習射能穿百步楊。輿廢人閒戰白蟻。榮枯枕上夢黃梁。故山咫尺宜歸去。莫使因循三徑荒。

寄張鳴道

張君宗派自留侯。壯歲成名入士流。一代詩聲如玉振。千鈞筆力挽銀鈎。平山邂逅初青眼。汴水伶仃已白頭。遙想荷花好時節。故人吟倚仲宣樓。

送省掾郭仲仁行

蘭省而今已預名。還鄉衣錦也爲榮。遼陽幹事須詳悉。速駕星輶上玉京。

送燕京高慶民行

國事煩多我政憂。上章清選倅徵收。好陪劉晏勤王事。早使錢如地上流。

和趙廷玉子贊韻

萬里龍庭白草秋。時時歸夢舊漁舟。酌殘白酒難成醉。老盡黃花無限愁。久識人心多厭政。喜逢天下已歸劉。而今子入中州去。莫惜寒梅寄隴頭。

贈東平主事王玉

聖主方思治。邊臣未奉行。憑君達此意。無得負蒼生。

周敬之修夫子廟

天皇有意用吾儒。四海欽風盡讀書。可愛風流賢太守。天山創起仲尼居。

寄萬壽堂頭乞湖山

削玉剜瓊出自然。依稀巖竇吐雲煙。禪師手段掀山嶽。便好攜來向玉泉。

寄東林同參

東林屢有寄來詩。忙裏何嘗報一辭。豈是玉泉生吝惜。言無滋味不宜時。

寄簡堂頭

巨川生下此村牛。千百頭中祇一頭。鼻孔撩天無主伴。不風流處也風流。

寄孔雀使面奉萬松老師

風流彩扇出西州。寄與白蓮老社頭。遮日招風都不礙。休從侍者索犀牛。

答倪公故人

玉泉回報故人書。問子參玄着意無。且趁萬松鑪鐵熱。疾忙索取護身符。一作夜明符

送王璘行

天涯九日出龍沙。冬後冬前卻到家。餽運功成須報我。好遊天漢上浮槎。

繼介丘穆景華韻

北海慵傾北海樽。予懷爲向景華伸。奇才管葛堪爲匹。何事唐虞不得臣。行遣欲期丹鳳出。忘機且與白

鷗親。龍庭萬里休辭遠。六出奇畫正須陳。

繼平陶張才美韻

才美風流自一時。因風來寄湛然詩。新朝制度知將近。晚節功名未是遲。識子固爲天下士。微君孰撫我

民瘼。撥毫欲繼清新句。笑我卻無黃絹辭。

德柔嘗許作鞍玉轡。且數年矣。作詩以督之。

異物當時許晉卿。幾年思渴動詩情。龍庭風細沙堤軟。玉轡雕鞍正好行。

卜鄰一絕寄鄭景賢

龍沙幽隱子真家。自撥寒泉出沒沙。我願卜鄰穹帳側。旋分清酌煮新茶。

寄岳君索玉博山

玉爐精巧若裁肪。寄與髯翁也不妨。古廟多年無氣息。直消一炷返魂香。

雲中重修宜聖廟疏

槐宮悉混玉石焚。廟貌依然惟古雲。須仗吾儕更脩葺。休教風世喪斯文。

寄光祖

漁陽光祖冠當時。筆法詞源我獨知。君有家雞君自厭。爲何偏愛玉泉詩。

送德潤南行

燕然民庶久瘡痍。摩撫瘡痍正此時。暴吏猾胥諂君日。開械三復味予詩。

再和萬壽潤禪師書字韻五首

憂道

不肯參禪不讀書。徒喧口鼓說真如。未能卽色明真色。只道無餘已有餘。法眼凋殘浮海去。瀉山寂寞少人居。一從三聖承當後。季世寥寥無瞎驢。

述懷

寶藏翻窮貝葉書。方知真理本如如。一心不動無生滅。萬古長空豈欠餘。妙藥更靈難忌口。長安雖肯不堪居。毛吞大海渾閑事。誰訝瓢中出白驢。

警世

看盡人間萬卷書。較量佛法總難如。本無妄疾剛尋藥。幸有回波好乞餘。方丈名山真碧海。含元古殿是皇居。行人半老家何在。終日騎驢卻覓驢。

傷時

金馬門前數上書。子虛新賦笑相如。萬言警策才無敵。六國縱橫智有餘。千里兵車討奸宄。五更朝馬候興居。功名賺得頭如雪。不悟團團如磨驢。

投老

囊裏瑤琴架上書。箇中真味更何如。伴閑美竹千竿許。養老田園二頃餘。誰起焚香誦圓覺。興來緩軫品幽居。宮音有此曲。夕陽半下山偏好。吟入煙霞穩跨驢。

贈景賢玉湖鳴泉琴

玉泉珍惜玉泉琴。不遇高人不許心。素軫四三排碧玉。明徽六七粲黃金。臨風好奏朝飛曲。對月宜彈清夜吟。渠能彈維朝贈與龍崗老居士。須教下指便知音。

丙申元日爲景賢壽

龍沙一住二十年。獨識龍崗鄭景賢。詩筆饒君甘在後。琴棋笑我強爭先。冷官何啻廣文樂。歸計猶存谷口田。劫外壺天壽無量。請分勤叩祖師禪。

景賢作詩頗有思歸意因和元韻以勉之

我訪龍崗老。珠璣咳唾聞。酒熟香覆覆。琴滑水潺潺。王吉河中栽菊。和林也有山。但能放心下。何處不安閑。

景賢召余飲以事不果翌日余訪景賢值出余開樽盡醉而歸留詩戲之

昨日命我初無與。今日尋君不在家。不問主人都飲盡。醉今倒載黑氈車。

和景賢召飲韻

書滿穹廬酒滿樽。龍崗召我謝殷勤。琴中別有無絃曲。醉裏開懷舉似君。

丙申上元夜夢中有得

超佛越祖透真空。也與瀉山說夢同。面貌眼睛鼻孔裏。大千沙界一漚中。

送門人劉德真征蜀

門第遼陽劉德真。剛直木訥近乎仁。憐君粗有才學術。師我精通天地人。今日從軍征兩劍。他時擁旆入三秦。三辰測驗須吾子。創作天朝寶曆新。

送門人劉復亨征蜀

誠之識我二十年。不讀經書不學禪。悞爾儒冠好投筆。過人勳業好加鞭。浣花溪畔春如畫。濯錦江邊酒似川。壯歲從軍真樂事。鄧侯遺躅勉爭先。

趙州柏樹頌

古佛猶存舊道場。庭前依舊柏蒼蒼。莫謗諸州無此語。禪林奔走錯商量。

黃龍三關頌

我手何似佛手

稱頭斤兩須端的。短少毫釐不可欺。函關辨認合同券。未肯輕輕放過伊。

我脚何似驢脚

行令如同車脚圓。你三文後我三錢。直饒道底分明是。也是當年鸚鵡禪。

如何是上座生緣

只打野盤無寺宿。不供糊口趁村齋。上戶莫春虛物口。僧司無得錯推排。

和太原元大舉韻

今案此和元裕大舉韻詩。大舉疑誤。

魏帝兒孫氣似龍。而今飄泊困塵中。君遊泉石初無悶。我秉鈞衡未有功。元氏從來多慷慨。并門自古出英雄。李唐名相沙隄在。好與微之繼舊風。

喜和林新居落成

今案和林在庫倫之西有闕特勒碑

登車憑軾我怡顏。飽看和林一帶山。新構幽齋堪偃息。不閑閑處得閑閑。

題新居壁

舊隱西山五畝宮。和林新院典刑同。此齋喚醒當年夢。白晝誰知是夢中。

太原修夫子廟疏

并門連歲不年豐。証父攘羊禮義空。既倒狂瀾扶不起。直須急手建庠宮。

和林建佛寺疏

龍沙玄教未全行。故築精藍近帝城。須仗檀那垂手力。一輪佛日煥然明。